

[ԵՐԵՎԱՆԻ ՊԵՏԱԿԱՆ
ԷԱՍՏԱԼՍԱՐԱՆ]

ՄԵՆՈՒԱ ՍՈՂՈՄՈՆՅԱՆ



ՄԻԶԱԳՎԱՅԻՆ
ԴԱՐՁԲԵՐՈՒԹՅՈՒՆՆԵՐԻ
ՏԵՍՈՒԹՅՈՒՆՆԵՐ
ԵՎ ՎԵՐԼՈՒԾՈՒԹՅԱՆ
ՄԱԿԱՐԴԱԿՆԵՐ

ԵՐԵՎԱՆԻ ՊԵՏԱԿԱՆ ՀԱՍՏԱԼՍԱՐԱՆ

Մենուա Սողոմոնյան

ՄԻԶԱՋԳԱՅԻՆ
ՀԱՐԱԲԵՐՈՒԹՅՈՒՆՆԵՐԻ
ՏԵՍՈՒԹՅՈՒՆՆԵՐ ԵՎ
ՎԵՐԼՈՒԾՈՒԹՅԱՆ ՄԱԿԱՐԴԱԿՆԵՐ

Դասախոսություններ

ԵՐԵՎԱՆ
ԵՊՀ ՀՐԱՏԱՐԱԿՈՒԹՅՈՒՆ
2014

ՀՏ 327(042.4)

ԳՄԴ 66.4 ց7

Ս 694

Հրատարակության է երաշխավորել
ԵՊՀ միջազգային հարաբերությունների ֆակուլտետի
գիտական խորհուրդը

Սողոմոնյան Մ. Ա.

Ս 694 Միջազգային հարաբերությունների տեսություններ և վերլու-
ծության մակարդակներ: Դասախոսություններ: -Եր., ԵՊՀ
հրատ., 2014, 100 էջ:

Ժողովածում ներկայացված են միջազգային հարաբերու-
թյունների առավել ընդունված տեսությունների՝ լիբերալիզմի, ռեա-
լիզմի, ռադիկալիզմի և կոնստրուկտիվիզմի հիմնական դրույթները,
որոնք տեսական համարույթներ են միջազգային հարաբերություն-
ների երևույթները մեկնաբանելու համար: Ժողովածուն կարող է
օժանդակել ուսանողներին «Միջազգային հարաբերությունների տե-
սության հիմունքներ» առարկայի տեսական գիտելիքները պրակտի-
կայում և հետազոտական աշխատանքներում կիրառելու հարցում:

ՀՏ 327(042.4)

ԳՄԴ 66.4 ց7

ISBN 978-5-8084-1913-1

© ԵՊՀ հրատարակչություն, 2014

© Մ. Սողոմոնյան, 2014

ԲՈՎԱՆԴԱԿՈՒԹՅՈՒՆ

Դասախոսություն 1

Միջազգային հարաբերությունների տեսությունը: Միջազգային հարաբերությունների վերլուծության մակարդակները 5

Դասախոսություն 2

Միջազգային հարաբերությունների տեսություններ: Լիբերալիզմ... 12

Դասախոսություն 3

Միջազգային հարաբերությունների տեսություններ: Ռեալիզմ 20

Դասախոսություն 4

Միջազգային հարաբերությունների տեսություններ:
Նեռլիբերալիզմ և նեռռեալիզմ 27

Դասախոսություն 5

Միջազգային հարաբերությունների տեսություններ:
Ռադիկալիզմ 33

Դասախոսություն 6

Միջազգային հարաբերությունների տեսություններ:
Կոնստրուկտիվիզմ 40

Դասախոսություն 7

Միջազգային հարաբերությունների տեսությունները
«գործողության մեջ»: Ծոցի պատերազմը՝ որպես դեպքային
ուսումնասիրություն 45

Դասախոսություն 8

Միջազգային համակարգը (միջազգային հարաբերությունների
համակարգը) 50

Դասախոսություն 9

Միջազգային հարաբերությունների վերլուծության
միավորային/պետական մակարդակը 64

Դասախոսություն 10

Միջազգային հարաբերությունների վերլուծության ինդիվիդուալ
մակարդակը 88

Դասախոսություն 1

Միջազգային հարաբերությունների տեսությունը: Միջազգային հարաբերությունների վերլուծության մակարդակները

Առհասարակ տեսությունը երևույթների, իրողությունների վերաբերյալ ընդհանրական, վերացարկված մտակառույցների ամբողջություն է: Ցանկացած տեսություն իրենից ներկայացնում է ուսումնասիրության առարկա հանդիսացող երևույթների, գործընթացների և հարաբերությունների վերաբերյալ ուսմունքների, գիտական թեզերի, մոտեցումների ամբողջություն: Քանի որ միջազգային հարաբերությունները բարդ համակարգ է՝ բազմաբնույթ գործընթացներով ու օրինաչափություններով, ուստի միջազգային հարաբերությունների տեսությունը նույնպես պարունակում է խնդրո առարկա հարցերի շուրջ թեզեր, մոտեցումներ, համոզմունքներ:

Միջազգային հարաբերությունների տեսության մեջ տարածված և ընդունված հարացույցերն են հանդիսանում **լիբերալիզմը** (ավանդական իդեալիզմ, նեոլիբերալ-ինստիտուցիոնալիզմ և այլն), **քաղաքական ռեալիզմը** (որն իր մեջ ներառում է հիմնականում դասական ռեալիզմը և նեոռեալիզմը կամ կառուցվածքային ռեալիզմը), **մարտահիմքը** կամ **ռադիկալիզմը** (դասական մարքսիզմ և նեոմարքսիզմ), **միջազգային հարաբերությունների անզիական դպրոցը**, **կոնստրուկտիվիզմը** և այլն: Սրանցից յուրաքանչյուրը յուրովի է մեկնաբանում միջազգային հարաբերությունների բնույթը:

Միջազգային հարաբերությունների տեսության առաջացումը սերտորեն կապված է երկու կարևորագույն հիմնախնդրի հետ. պատերազմների կանխում և խաղաղության պահպանում: Մարդկության պատմությունը լի է եղել ավերիչ, կորստարել պատերազմներով, որոնց առաջացումը գիտնականները կապել են մի շարք հան-

գամանքների հետ՝ մարդու կուրյուն¹, պետության շահ, պետության քաղաքական համակարգի կառուցվածք² և այլն։ Ուստի պատերազմները բացառելուն ուղղված նորմատիվ քաղաքականության մշակումն ու իրագործումը անհնար կլինի իրականացնել, եթե այդ քաղաքականության հիմքում չդրվի պատերազմի առաջացումը պայմանավորող բազմապիսի հանգամանքների խորագնին ուսումնասիրությունը։

Միջազգային հարաբերությունների բազմաբնույթ հարցերի ուսումնասիրությունը ձիցու և նպատակահարմաք է իրականացնել վերլուծության մակարդակներով, այսինքն, որևէ իրողության կամ իրադարձության պատճառները, բացատրությունները փնտրել մակրո (միջազգային համակարգ), մեզո (պետություն) և միկրո (անհատ) մակարդակներում։ ԱՄՆ Քենսորութիվ համալսարանի դասախոս Քերեն Մինզաթը պատերազմի առաջացման «բանալին» գոնելու հարցում առաջարկում է դիտարկել 1991թ. Պարսից ծոցի պատերազմը։ Հակիրծ նկարագրելով իրադարձությունների զարգացումը³ Մինզաթը հանդես է գալիս հարցադրումներով։

¹ Ասվածի իմաստը այն է, որ ցանկացած քաղաքական կազմավորման (իմնականութ՝ պետության) կողմից պատերազմել-չպատերազմելու վճռական որոշումը ընդունում են մարդիկ, որոնց ընկալումները, արժեքները, կրթվածության մակարդակը և այլ հատկանիշներ ունեն և ընդհանրություններ, և՝ տարբերություններ։ Այս իմաստով պատերազմի առաջացման-չստացման հարցը շաղկապվում է մարդկային կուրյան հետ, ուստի և մեծ նշանակություն է ձեռք բերում մարդու կուրյան ուսումնասիրություն՝ պատերազմների առաջացման կամ խաղաղության պահպանման հարցերը քննարկելիս։

² Գիտնականներից շատերը կարծում են, որ պետության քաղաքական համակարգի կառուցվածքը էական նշանակություն ունի կոնֆլիկտային հարաբերություններում, այլ կերպ ասած, օրինակ, որքան դեմքվառառական է պետության ռեժիմը, այնքան տվյալ պետությունը պատերազմելու քիչ հակվածություն է դրսւում։

³ 1990թ. օգոստոսի 2-ին Իրաքը բռնազավթեց Քուվեյթի տարածքը, որին անմիջապես հաջորդեց ՄԱԿ-ի կողմից առևտրային էմբարգոն Իրաքի նկատմամբ, ինչին էլ հետևեց ԱՄՆ-ի, ՄԵՃ Բրիտանիայի և արարական մի շարք երկրների համատեղ պատժի ուժերի հավաքագրման աշխատանքը։ Նոյեմբերի 29-ին ՄԱԿ-ն ընդունեց բանաձև, որով բազմազգ ուժերին իրավունք էր տալիս ուժ կիրառել Իրաքի դեմ և Քուվեյթից Իրաքի գորքերի դրւու բերման վերջնաժամկետ հայտարարեց 1991թ.

- 1) ինչո՞վ էր պայմանավորված Իրաքի ներխուժումը Քուվեյթ,
- 2) ինչո՞ւ Իրաքը հաշվի չնստեց միջազգային հանրության կարծիքի, քննադատության ու սպառնալիքների հետ,
- 3) ինչո՞վ էր պայմանավորված ԱՄՆ-ի գլխավորած դաշինքի վճռականությունը Իրաքին պատմելու հարցում:

Միջազգային հարաբերությունների տեսությունը նման հարցերին առաջարկում է պատասխանել տեսության դիրքերից, դեղուկ-տիվ մեթոդով: Այլ կերպ ասած, այս մասնավոր բնույթի հարցերին պատասխանելու համար անհրաժեշտ է զաղափար կազմել, թե 1) առհասարակ ինչո՞ւ է մի պետությունը մյուսի հանդեպ տարածքային ոտնձգություն կատարում:

2) ի՞նչն է ազրեսիվ պետությանը թույլ տալիս իրականացնել իր ազրեսիան:

3) ի՞նչը կարող է կասեցնել պետության ազրեսիվ մտադրությունը: Կոնկրետ այս դեպքի առումով կարելի է ընդհանրական բնույթի, վերացարկված բացատրություններ տալ. օրինակ՝ պետության լիդերի ազրեսիվ բնավորությունը մեծացնում է այդ պետության արտաքին քաղաքականության ազրեսիվ լինելու հավանականությունը, բնական ռեսուրսներով հարուստ, բայց փոքր ու թույլ պետությունները մշտապես կանգնած են ազրեսիայի հավանականության առաջ և այլն, և այլն: Այսպիսով, մենք Իրաքի կողմից Քուվեյթի զավթման շուրջ կարող ենք ընդհանրական, տեսական բնույթի դատողություններ անել և, ըստ այդմ, կարող ենք այդ ներխուժումը բացատրել հետևյալ դատողություններով.

1. Սաղդամ Հուսեյնը (Իրաքի նախագահն այդ ժամանակ) ազրեսիվ անձնավորություն էր:
2. Իրաքի իշխանությունները չեն վայելում հասարակության վստահությունը (լեզվիմ չեն), ուստի պատերազմը դըր-

հունվարի 15-ը: Վերջնաժամկետի հաջորդ օրն իսկ՝ հունվարի 16-ին, բազմազգութերը սկսում են իրականացնել «Անապատահողմ» գործողությունը: Պարտված Իրաքը փետրվարի 28-ին ստորագրում է զինադադարը:

սում հնարավորություն կտար իշխանությունների շուրջ համախմբել այդ հասարակությանը:

3. Քուվեյթի զավթմամբ Իրաքը ձգում է նավթի, տարածքի ու այլ ձեռքբերումների հաշվին ավելացնել իր հզորությունը՝ այն իր մշտական թշնամու՝ Իրանի դեմ հաջողությամբ գործածելու համար:
4. Իրաքի նման ավտորիտար երկրները մշտապես աչքի են ընկնում ազրեսիվ արտաքին կեցվածքով:
5. ՄԱԿ-ի անվտանգության խորհրդի սպառնալիքները ի գորու չեղան ահաբեկելու Սադրամ Հուսեյնի վարչակազմին,
6. Իրաքը մեծապես զգում էր Քուվեյթի նավթի կարիքը՝ իր պետական պարտքերը վճարելու և տնտեսությունը զարգացնելու համար:
7. Արաբական երկրների լիգան միասնականություն չդրսութեց անդամ արաբական երկրի կողմից մյուսի զավթման կապակցությամբ:
8. Միջազգային հանրությունը տարված էր այլ խնդիրներով, կապված Սաոր պատերազմի ավարտին ուղեկցող աշխարհաքաղական փոփոխությունների հետ, ուստի չէր կարող անհրաժեշտ ուշադրություն դարձնել մերձավորարևելյան այդ զարգացումների վրա:
9. Սադրամ Հուսեյնի խորհրդականներն ու առհասարակ շրջապատը չէր հանդգնում անկեղծորեն հուշել նրա կողմից իրազործվելիք քայլերի վտանգավոր հեռանկարի մասին:
10. Սադրամ Հուսեյնը թերահաշվարկել էր այլ երկրների, մասնավորապես, Սաուդյան Արաբիայի և ԱՄՆ-ի հնարավոր հակազդեցության չափը:

Այսպիսով, Իրաքի ներխուժման վերաբերյալ վերը թերված այս տասը հավանական պատասխանները դատողություններ են, որոնք կարելի է դասակարգել ըստ մակարդակների: Եթե հարցին պատաս-

խանում ենք անհատի դիտանկյունից, ապա գործ ունենք միջազգային հարաբերությունների վերլուծության անհատական մակարդակի հետ (միկրո), պետության դիտանկյունից՝ պետական մակարդակի հետ (մեզո), միջազգային համակարգի դիտանկյունից՝ համակարգային մակարդակի հետ (մակրո): Այլ կերպ ասած, Իրաքի՝ Քուվեյթ ներխուժելու հարցի բանալին կարելի է փնտրել կամ մարդու էռության, բնույթի, կամ պետության քաղաքական համակարգի, տնտեսության, ձևակերպված շահի և այլնի մեջ, կամ ել միջազգային հարաբերությունների համակարգի կառուցվածքի մեջ: Վերոհիշյալ 10 պատասխանները ստորև խմբավորված են՝ ըստ մակարդակների:

**Իրաքի՝ Քուվեյթ ներխուժման պատճառների ու հանգամանքների
բացատրությունը՝ ըստ միջազգային հարաբերությունների
վերլուծության մակարդակների**

Անհատական մակարդակ

1. Սադրամ Չուսեյնը (Իրաքի նախագահն այդ ժամանակ) ագրեսիվ անձնավորություն էր,
9. Սադրամ Չուսեյնի խորհրդականներն ու առհասարակ շրջապատը չէր հանդգնում անկեղծորեն հուշել նրա կողմից իրագործվելիք քայլերի վտանգավոր հեռանկարի մասին,
10. Սադրամ Չուսեյնը թերահաշվարկել էր այլ երկրների, մասնավորապես, Սաուդյան Արաբիայի և ԱՄՆ-ի հնարավոր հակազդեցության չափը:

Պետական (միավորային) մակարդակ

2. Իրաքի իշխանությունները չէին վայելում հասարակության վստահությունը (լեզիտիմ չէին), ուստի պատերազմը դրսում հնարավորություն կտար իշխանությունների շուրջ համայնքել այդ հասարակությանը:
3. Քուվեյթի զավթմամբ Իրաքը ձգտում է նավթի, տարածքի ու այլ ձեռքբերումների հաշվին ավելացնել իր հզորությունը՝ այն իր մշտական թշնամու՝ Իրանի դեմ հաջողությամբ գործածելու համար:

- 4. Իրաքի նման ավտորիտար երկրները մշտապես աչքի են ընկնում ազրեսիվ արտաքին կեցվածքով:
- 6. Իրաքը մեծապես զգում էր Քուվեյթի նավթի կարիքը՝ իր պետական պարտքերը վճարելու և տնտեսությունը զարգացնելու համար,

Միջազգային (համակարգային) մակարդակ

- 5. ՄԱԿ-ի անվտանգության խորհրդի սպառնալիքները ի գորու չեղան ահաբեկելու Սադրամ Հուսեյնի վարչակազմին:
- 7. Արաբական երկրների լիգան միասնականություն չդրսուրեց անդամ արաբական երկրի կողմից մյուսի զավթման կապակցությամբ:
- 8. Միջազգային հանրությունը տարված էր այլ խնդիրներով՝ կապված Սաոր պատերազմի ավարտին ուղեկցող աշխարհաքաղաքան փոփոխությունների հետ, ուստի չէր կարող անհրաժեշտ ուշադրություն դարձնել մերձավորարևելյան այդ զարգացումների վրա,

Թեև միջազգային հարաբերությունների տեսարանները ընդհանուր առմամբ համամիտ են վերլուծության մակարդակների գոյության հարցում, սակայն երբեմն տարակարծիք են դրանց քանակի հարցում: Մասնավորապես, Բարբի Բուզանը գտնում է, որ համակարգային և պետական մակարդակների միջև կա ևս մեկ մակարդակ՝ տարածաշրջանայինը, այսինքն, իրողությունները պետք է բացատրել ոչ միայն համաշխարհային, այլև տարածաշրջանային հատույթի հանգամանքներով: Նա գտնում է նաև, որ անհրաժեշտ է դիտարկել մեկ մակարդակ ևս՝ ենթամիավորայինը, որը գտնվում է պետական և անհատական մակարդակների միջև. խոսքն այստեղ գնում է իրողությունները բացատրելիս ներպետական տարբեր տիպի դերակատարների վրա ֆոկուսավորման անհրաժեշտության մասին (քաղաքական կուսակցություններ, շահերի խմբեր, տնտեսագրող սուբյեկտներ և այլն):

Հանձնարարվող գրականություն

1. Karen A. Mingst, “Essentials of International Relations”, Norton&Company, NY-London, 2003, pp. 57-62
2. Juanita Elias and Peter Sutch, “International Relations: The Basics”, Routledge, London, New York 2007, pp. 1-20
3. Chris Brown and Kirsten Ainley, “Understanding International Relations”, 3rd edition, Palgrave Macmillan, New York, 2005, pp.1-18
4. Scott Burchill, Andrew Linklater, Richard Devetak, Jack Donnelly, Matthew Paterson, Christian Reus-Smith and Jacqui True, “Theories of International Relations”, 3rd edition, Palgrave Macmillan, New York, 2005, pp. 1-28
5. www.irtheory.com
6. www.geocities.com

Դասախոսություն 2

Միջազգային հարաբերությունների տեսություններ

Լիբերալիզմ

Ինչպես արդեն նշել ենք նախորդ դասախոսության մեջ, միջազգային հարաբերությունների մասին գիտաճյուղի ի հայտ գալը բխում էր ավերիչ պատերազմների առաջացումը կանխելուն, խաղաղությունը պահպանելուն միտված միջազգային քաղաքականության գիտական, տեսական բազա ստեղծելու պահանջից: Այլ կերպ ասած, միջազգային հարաբերությունների տեսությունը կոչված է գիտական հիմնավորմամբ պետություններին և միջազգային հարաբերությունների այլ մասնակիցներին առաջարկել այն «դեղամիջոցները», որոնց օգտագործմամբ կարելի կինի բացառել պատերազմները կամ պահպանել խաղաղությունը: Նման «դեղամիջոցներ» առաջարկելու համար նախ անհրաժեշտ է խորությամբ ընկալել պատերազմի պատճառը, բացահայտել, թե որտեղ են գտնվում ռազմատենչ քաղաքականության արմատները, հասկանալ, թե միջազգային հարաբերություններում ո՞ր սուբյեկտներն են առավել որոշիչ դեր խաղում (հատկապես պատերազմ սկսելու որոշում կայացնելու հարցում), որպեսզի հենց նրանց վրա սևեռվի ուսումնասիրությունների ֆոկուսը: Պատերազմի պատճառների հետ կապված նման «ախտորոշում» իրականացնելուց հետո միայն կարելի է առաջարկել «դեղամիջոցները»:

Պատերազմի և խաղաղության հիմնահարցերին առնչվող դիտարկումներով, գիտական թեզերով, տեսակետներով ու առաջարկություններով հանդես եկած առաջին գիտական դպրոցը **լիբերալիզմն** է: Միջազգային հարաբերությունների լիբերալ տեսության առաջացումը մեծապես կապված է 1913-21 թթ. պաշտոնավարած ԱՄՆ նախագահ Վուլլր Վիլսոնի հետ, ով պատերազմների կանխ-

ման և խաղաղության պահպանման համար առաջարկեց այնպիսի միջոցներ, ինչպիսիք են միջազգային իրավանորմերի կատարելագործումը, հարստացումն ու տարածումը, այդ նորմերի պահպանման ու կենսագործման համար պատասխանատու միջազգային ինստիտուտների ստեղծումը, ազատ, առանց սահմանափակումների միջազգային տնտեսական հարաբերությունները և այլն:

Մինչ Վիլսոնի գաղափարների իրականացման մասին խոսելը, համառոտ ակնարկով հասկանանք, թե ինչո՞ւ է այս տեսությունը լիբերալիզմ կոչվում: Միջազգային հարաբերությունների լիբերալ տեսությունը կառուցված է հասարակական երևույթների, իրողությունների ընկալման լիբերալ փիլիսոփայական մտքի հիմնադրույթների վրա: Լիբերալ փիլիսոփայությունը կյանքի տարրեր կողմերն ընկալում է ազատականության դիրքերից: Այդ մտքի տեսանկյունից բարձրագույն արժեքը մարդն է ու նրա ազատությունը, մարդը կարող է իր կարիքները լավագույնս բավարարել, շահերն առաջ տանել լիարժեք ազատական կացութաձևի, ռեժիմի պայմաններում. նման դեպքում, երբ հասարակության բոլոր անդամներն են ազատ արտահայտում իրենց կամքը, ձեռնամուխ լինում իրենց կարիքների բավարարմանը և շահերի իրացմանը, հասարակությունը դառնում է ինքնին ազատ հասարակություն, ազատությունը դառնում է այդ հասարակության համար բարձր արժեք, այդ հասարակությունում սկսում է գործել ուրիշի ազատությունը չսահմանափակելու սկզբ-բունքը և հետևապես, սկսում է չգործել գայլային օրենքը: Լիբերալ մտքի համաձայն՝ անհատի ազատությունն ու ինքնուրույնությունը լավագույնս իրացվում և ապահովվում են դեմոկրատական ռեժիմ ունեցող պետություններում, որոնց բնորոշ է անհատի անձնական, քաղաքացիական և քաղաքական ազատությունները և ազատ, շուկայական ներքին ու արտաքին տնտեսական հարաբերությունները: Եթե նման ազատ հասարակություններում գործում է համագործակցության, փոխադարձ հարգանքի ողին, եթե չեն գործում գայլային օրենքները, ապա նույն պատկերը կլինի նաև միջազգային

հարաբերություններում, եթե զնալով շատանան լիբերալ հասարակություններ ունեցող պետությունները: Լիբերալիզմն ընդունում է, որ դեմոկրատական երկրները միմյանց դեմ չեն պատերազմում (այս մասին կանորադառնանք քիչ ավելի ուշ): Այսպիսով, ըստ լիբերալ տեսության՝ մարդու, համայնքի, հասարակության և պետության կողմից ազատականության արժեքի յուրացվելու և նշված սուբյեկտների կողմից այդ արժեքներին համահունչ փարքագիծ դրսութելու հետ է կապված պատերազմների բացառումը: Ազատականության (լիբերալիզմի) արժեքների ու գաղափարների կիրառման անհրաժեշտության կանխադրույթի վրա կառուցված այս տեսությունն էլ ստացել է լիբերալիզմ կամ լիբերալ տեսություն անվանումը:

Միջազգային հարաբերությունների լիբերալ տեսության արմատները գտնվում են դեռ 17-րդ դարի մի շարք մտածողների, 18-րդ դարի լուսավորիչների, 19-րդ դարի լիբերալ փիլիսոփաների գաղափարների մեջ: Այսպիսով, 20-րդ դարի սկզբի միջազգային հարաբերությունների լիբերալ տեսության առաջին ներկայացուցիչները միջազգային կարգի (աշխարհակարգ) վերաբերյալ իրենց մոտեցումները կառուցում էին նախորդ դարերի լիբերալ փիլիսոփայական մտքի շատ դրույթների վրա: Միջազգային հարաբերությունների վերաբերյալ լիբերալ մտածողության զարգացմանը նպաստած մտածողների թվում հատկանշական են Հուգո Գրոցիուսը (1583-1645), Սամուել Պուֆենդորֆը (1632-1694), Շառլ Լուի Մոնտեսը (1689-1755), Իմանուիլ Կանտը (1724-1804) և այլք: Հանդիսանալով «առաջին համակարգական պատերազմի»՝ 30-ամյա պատերազմի ականատեսը՝ Գրոցիուսը գտնում էր, որ հնարավորություն կա ստեղծել և տարածել համընդհանուր բարոյական չափանիշներ, որոնց կիրառմամբ կվերանա պետությունների կողմից իրականացվող ինքնօգնության սկզբունքի անհրաժեշտությունը⁴: Գրոցիուսը միջազգային

⁴ Միջազգային հարաբերություններում՝ համընդհանուր կենտրոնական իշխանության բացակայության պայմաններում պետությունները, իրենց գոյատևումն ապահովելու համար առաջնորդվում են ինքնօգնության (self-help) սկզբունքով՝ հույսը

իրավունքի նորմերի նախասահմանողներից էր. նրա գաղափարները հետազոյւմ մեծապես նպաստեցին միջազգային իրավունքի նորմերի ստեղծմանը: Ինչպես Գրոգիուսը, *Պուֆենդորֆը* և գտնում էր, որ միջազգային հարաբերությունները հնարավոր է սոցիալականացնել⁵, դարձնել այնպիսին, ինչպիսին զարգացած հասարակությունն է երկրի ներսում: Լուսավորության շրջանի ֆրանսիացի մտածող *Շառլ Սոնտեսըյոն* գտնում էր, որ մարդկային էության մեջ ընդհանրապես դրական հատկանիշներն են գերակշռում, սակայն մարդկային գործունեությունը սկսում է պրոբեմներ ծնել այն պահից սկսած, երբ մարդիկ միավորվում են տարբեր սոցիումների՝ հասարակությունների, ազգերի մեջ: Պատերազմը, ըստ նրա, հասարակական հարաբերությունների ծնունդ է, այլ ոչ անհատ մարդու էությունից բխող երևույթ: Հասարակությունում առկա այս գայլային պրոբեմները հաղթահարելու լավագույն միջոցը մարդկանց կրթություն տալն է: Մոնտեսըյոն միջազգային հարաբերությունների մասին իր լավատեսությունն արտահայտում է հետևյալ մտքում. «Ազգերը խաղաղության ժամանակ պետք է հնարավորինս օգտակար լինեն միմյանց, իսկ պատերազմի ժամանակ պետք է հնարավորինս քիչ վնասեն միմյանց»: Լիբերալ փիլիսոփայության նշանավոր ներկայացուցիչ *Բուանուիլ Կանտոն* էլ գտնում էր, որ միջազգային հարաբերություններում առկա անիշխանությունը⁶ հաղթահարելի է պետությունների դաշնություն ստեղծելու գնով. ընդ որում պետք է պահպանել յուրաքանչյուր պետության ինքնիշխանությունը:

միայն սեփական ուժերի վրա դնելով և հետևապես սեփական հզորությունն ավելացնելու միջոցով

⁵ Միջազգային հարաբերությունների սոցիալականացումը ենթադրում է նորմերի միջոցով պետություններից ձևավորել պետությունների միջազգային հասարակություն, երբ պետությունները կսկսեն գիտակցել փոխադարձ շահերը հարգելու անհրաժեշտությունը

⁶ Խոսքն այսուհետ այն մասին է, որ եթե ներպետական հարաբերություններում կա բոլորի կողմից ընդունված բարձրագույն կենսորնական իշխանություն (պետական իշխանությունը), ապա միջազգային հարաբերություններում չկա նման իշխանություն, այնուեղ անիշխանություն է, անարխիա:

Ստեղծվելիք դաշինքը կպարտավորեցնի պետություններին ձեռնպահ մնալ այնպիսի քայլերից, որոնք կարող են մեկմեկու վնասել. Այսպիսով, լուրջ նախադրյալներ կստեղծվեն հարատև խաղաղության համար: Կանտը նույնպես լավատեսություն է հայտնում, որ մարդկությունն ի վերջո կգտնի պատերազմներից խուսափելու լավագույն ուղիները, ինչը թեկուզե հեշտ գործ չէ: Վուդրո Վիլսոնը, զարգացնելով Կանտի գաղափարները, գտնում էր, որ միայն դեմոկրատական պետությունները կարող են մասնակցել միջազգային նման հասարակության ձևավորմանը, որ դեմոկրատիաները խաղաղասեր են. ցանկացած պատերազմ չի բխում նրանց շահերից: Վիլսոնը գտնում էր, որ եթե 1914 թ. դրությամբ պատերազմի մեջ մտած բոլոր պետությունները լինեին դեմոկրատիաներ, ապա պատերազմն ինքնին չեր ծագի:

19-րդ դարի լիբերալիզմը, իր մեջ կրելով 18-րդ դարի լուսավորական ռացիոնալիզմի գաղափարները⁷, սահմանեց դրույթներ այն մասին, որ հասարակական հարաբերություններում արիստոկրատիան պետք է փոխարինվի դեմոկրատիայով, իսկ առևտրային պետական հովանավորչական քաղաքականությունը՝ արտաքին ազատ առևտրային հարաբերություններով:

Աշխարհում հարատև խաղաղության հասնելու հարցում լիբերալների ունեցած լավատեսության հիմքում նրանց կանխադրույթն է առ այն, որ մարդկային էության մեջ գերակայում են դրական հատկանիշները. խաղաղասիրություն, հարգանք, բարիություն և այլն: Այս հանգամանքը, ըստ նրանց, հնարավորություն է ընձեռում մարդկանց զարգացնել, բարելավել իրենց կացութաձևը, ունենալ առավել խաղաղ ու բարեկեցիկ պետություն, հասարակական հարաբերություններ և արդյունքում ստեղծել խաղաղ ու բարեկեցիկ միջազգային հարաբերություններ: Եթե արդար, խաղաղ հասարակություն, հասարակական ու քաղաքական կարգեր կառուցելու հա-

⁷ Խոսքն այն դրույթի մասին է, որ մարդը ռացիոնալ, բանական էակ է:

մար անհրաժեշտ է, որ յուրաքանչյուր ոք օժտված լինի ռացիոնալիզմով և իրեն հանձնառու, պատասխանատու զգա նշված նպատակին հասնելու համար, ապա այդ նպատակին հասնելն անխուսափելի կլինի, նույնկերպ և անխուսափելի կլինի խաղաղ, արդար միջազգային հարաբերությունների կարգերի կառուցումը: Վուդրո Վիլսոնը ԱՄՆ-ը ներքաշեց 1-ին համաշխարհային պատերազմի մեջ այն համոզմամբ, որ պատերազմի համար մեղավոր պետությունները կպատժեն, ինչից հետո կարելի կլինի ստեղծել կայուն և ուժեղ միջազգային կազմակերպություն, որը կոչված կլինի պահպանել միջազգային խաղաղությունն ու անվտանգությունը: Այս խնդրի լուծումը նա տեսնում էր ազգային պետությունների ընկերակցության ստեղծման մեջ: Այդ ընկերակցության անդամ պետությունները պետք է փոխադարձ երաշխիքներ տային միմյանց տարածքային ամբողջականությունը հարգելու և քաղաքական ու տնտեսական անկախությանը վնասող ցանկացած քայլից ձեռնպահ մնալու հարցում: Վիլսոնյան այս նկատառումները շուտով մարմնավորվեցին նոր ստեղծված միջազգային կառույցի՝ Ազգերի լիգայի կանոնադրության մեջ:

Ինչ վերաբերում է Առաջին աշխարհամարտի ավարտն ազդարարած վերսայլյան պայմանագրի՝ խաղաղության հետագա պահպանման տեսակետից արդյունավետությանը, պետք է նկատել, որ պայմանագրի կնքմանը Ֆրանսիայի մարշալ Ֆոշն արձագանքել է հետևյալ կերպ. «Սա ոչ թե խաղաղություն է, այլ հրադադար քան տարով»: Հատկանշական է, որ Ֆոշը ոչ միայն ճիշտ է գուշակել պայմանագրով ստեղծված խաղաղության անփառունակ վախճանը, այլև այդ վախճանի ժամկետը. բանն այն է, որ արդեն իսկ նշմարելի էր, որ խաղաղության պայմանագիրը ստորագրած, Ազգերի լիգայի մեջ մտած բոլոր պետությունները իրենց հանձնառու չեին զգում միջազգային խաղաղության պահպանման, փոխադարձ շահերը ընկալելու, տեսակետները հաշվի առնելու հարցում. յուրաքանչյուր պետություն իր շահը տեսնում էր խիստ կարճաժամկետ հեռանկա-

րում, խիստ առարկայորեն, այսպէս ասած «գայլային օրենքը» շարունակում էր գործել: Այդ իսկ պատճառով, երբ 1939թ. բռնկվեց նոր՝ ավելի ահարկու 2-րդ աշխարհամարտը, երբ խաղաղապահպան գործիք Ազգերի լիգան սնանկ դուրս եկավ իր առաքելությունը իրացնելու հարցում, միջազգային հարաբերությունների լիբերալ տեսությունը սկսեց լուրջ, կործանարար քննադատության արժանանալ. չէ՞ որ այս տեսության դրույթների կենսագործման արդյունքում էր ստեղծվել Ազգերի լիգան: Լիբերալիզմը որպէս իդեալիզմ:

Պետք է նշել, սակայն, որ չնայած քննադատությունների տարափին, 20-րդ դարասկզբի լիբերալ մտածողներն իրավամբ հանդիսանում են միջազգային հարաբերությունների տեսության՝ որպէս առանձին գիտակարգի (ոլիցիզմին) հիմնադիրները: Ինչպես կտեսնենք, հետազայում՝ հատկապես Սառը պատերազմի ավարտից հետո, լիբերալիզմը վերագտավ իր դիրքերը աշխարհակարգի մասին գիտականապես հիմնավորված առաջարկություններ ներկայացնելու առումով:

Հանձնարարվող գրականություն

1. Robert Garner, Peter Ferdinand & Stephanie Lawson, *Introduction to politics*, Oxford University Press, 2009, pp. 346-49
2. Juanita Elias and Peter Sutch, “International Relations: The Basics”, Routledge, London, New York 2007, pp. 64-72
3. Chris Brown and Kirsten Ainley, “Understanding International Relations”, 3rd edition, Palgrave Macmillan, New York, 2005, pp.20-24
4. Scott Burchill, Andrew Linklater, Richard Devetak, Jack Donnelly, Matthew Paterson, Christian Reus-Smith and Jacqui True, “Theories of International Relations”, 3rd edition, Palgrave Macmillan, New York, 2005, pp. 55-83
5. Ole Holsti, *Theories of International Relations*, Essay, pp. 11-16
6. Cynthia Weber, *International Relations Theory: A Critical Introduction*, 2nd edition, Routledge, NY-London, 2005, pp. 37-58

7. А. П. Цыганков, “Теория международных отношений”, М., “Гардарики”, 2007, стр. 106-109
8. www.irtheory.com
9. www.geocities.com

Դասախոսություն 3

Միջազգային հարաբերությունների տեսություններ

Ռեալիզմ

Ինչպես տեսանք, լիբերալ մտածողության և տեսության հիման վրա մշակված և իրագործված միջազգային քաղաքականությունը ոչ միայն չտվեց սպասված արդյունքը խաղաղության հարատևման հարցում, այլև, հաշվի առնելով 2-րդ աշխարհամարտի՝ իր դաժան դրսնորումներով առաջինին քանից գերազանցելու հանգամանքը, պարզ դարձավ, որ պատերազմի կանխարգելման ու խաղաղության հարատևման վերաբերյալ լիբերալ դրույթներն ավելի քան ժամանակավորեալ էին:

Խաղաղության հարատևման օգտին հանդես եկող լիբերալ դրույթները՝ մարդու խաղաղասեր էության, դեմոկրատական երկրքների խաղաղասիրության, միջազգային իրավական ու սովորութային խաղաղաստեղծ նորմերի, միջազգային խաղաղապահպան կառույցների ստեղծման մասին, որքան էլ անթերի ու համոզիչ ձևակերպված էին և պայծառ ապագա էին խոստանում, այդուհանդերձ կտրված էին այն ժամանակի միջազգային հարաբերություններում առկա իրականությունից, չէին արտահայտում ժամանակի միջազգային հարաբերությունների ողին: Իրականությունից կտրված լինելու պատճառով լիբերալիզմն իդեալիզմ հորջորջած ուղղության ներկայացուցիչներն իրենց համարում էին ռեալիստներ, քանզի, ըստ նրանց, խաղաղության պահպանման հարցում իրենց տեսակետները կառուցում են ոչ թե «ինչպիսին պիտի լինի աշխարհը», այլ «ինչպիսին է իրականում աշխարհը» կանխադրույթի վրա: Խաղաղության ապահովումը, ըստ ռեալիստների, պետք է իրականացնել միմիայն առկա, ձեռքի տակ եղած հնարավորություններն օգտագործելով. խաղաղության համար պետք է ապավինել ոչ թե բարոյական

արժեքներով հագեցած նորմերին, այլ պետության հզորությանը, հզորացմանը, ուժային հավասարակշռությանը և այլն:

Ուշալիստական մտածողության մեջ կենտրոնական դիրք է զբաղեցնում **պետական/ազգային շահի⁸** գաղափարը, որը, ըստ նրանց, միջազգային հարաբերությունների գլխավոր շարժիչ ուժն է, պետության վարքագծի գլխավոր որոշիչ գործոնը (դետերմինանտ): Ավանդաբար տարածված կանխադրույթ է, որ քաղաքական ռեալիզմը օտարված է բարոյական նորմերից: Հստ ռեալիզմի ուղղության հիմնադիրներից մեկի՝ Հանս Սորգենթաուի (1904-1980), բարոյականության մասին պետք է դատել ոչ թե հաշվի առնելով պետության վարքագիծը, որա հիմքում եղած դրդապատճառները, մոտիվը, այլ հաշվի առնելով այդ վարքագծի արդյունքը, թե որքան է այդ արդյունքը իրացնում պետության շահը: Բարոյականության գլխավոր չափորոշիչն ազգային շահի իրացումն է, անկախ նրանից, թե այդ շահի իրացումն ինչպես և ինչքան կվնասի այլ պետությանը, ազգին:

Ուշալիստական մտածողությունում **ազգային շահն ընկալվում է իշխանության իմաստով**, որտեղ իշխանությունը (power) ընդունվում է որպես մի սուբյեկտի կողմից մյուսի վարքագիծը վերահսկելու, իրեն ցանկալի հունով ուղղորդելու կարողություն: Այս իմաստով իշխանությունը պետության անվտանգության ապահովման գլխավոր ռեսուրսն է. եթե մի սուբյեկտը կարողանում է վերահսկել իր իրական կամ հավանական հակառակորդի վարքագիծը, ուրեմն այդ ախոյանի կողմից կարող է իրեն հանգիստ, անվտանգ զգալ: Իսկ վարքագծի վերահսկում կարող է կատարվել միայն ուժի, հզորության, որանց շարունակ ավելացման միջոցով:

Հստ ռեալիստների՝ միջազգային հարաբերությունները բնութագրվում են **անիշխանությամբ**, անարխիայով, այսինքն՝ միջազգային ասպարեզում կենտրոնական իշխանության բացակայու-

⁸ Արևմտյան քաղաքագիտական միբության նույնացնում է ազգային շահն ու պետական շահը: Ազգն այստեղ բնութագրվում է ոչ այնքան որպես էրնիկական ընդհանրություն, այլ որպես պետության քաղաքացիների, հպատակների ամբողջություն:

թյամբ (այնպիսի իշխանության, ինչպիսին կա ներպետական ասպարեզում, պետական իշխանությունը, որը կարգավորում, կանոնակարգում է ներպետական բոլոր սուրյեկտների, դերակատարների միջև փոխհարաբերությունները և ունի նրանց նկատմամբ հարկադրանք կիրառելու օրինական իրավասություն): Այսպիսով, միջազգային հարաբերություններում գոյություն ունեցող հենց այդ անիշխանությունն է ստիպում, որ պետությունները սեփական գոյության, անվտանգության ապահովման համար ապավինեն ուժին, հզորությանը, առավել որոշակի՝ այդ հզորության ռազմաքաղաքական քաղադրիչն: Սեփական գոյությունը երաշխավորելու միակ միջոցը, ըստ ուսալիստների, **ինքնօգնությունն է (self-help)**:

Եթե հաշվի ենք առնում, որ բոլոր պետություններն ել ուզում են գոյատևել և դրա համար դիմում են ինքնօգնության սկզբունքին, հետևապես միջազգային հարաբերությունների **զլիավոր գործնրացը պետք է համարել կոնֆլիկտը**: Ըստ Մորգենթաուի, եթե ներպետական քաղաքականությունը հանդիսանում է պայքար իշխանության համար քաղաքական ուժերի միջև, ապա միջազգային քաղաքականությունը պայքար է իշխանության համար պետությունների միջև: Հատկանշական է, որ եթե ներպետական քաղաքական հարաբերություններում իշխանության համար պայքարն առավել քիչ կարող է բռնության հակվածություն ցուցաբերել (քանզի առկա է այդ քաղաքական հարաբերությունները կանոնակարգող ինստիտուտը՝ պետությունը), ապա միջազգային հարաբերություններում իշխանության համար պայքարում կոնֆլիկտը գրեթե անխուսափելի է: Մեկ անգամ ևս նշենք, որ ըստ ուսալիստների՝ կոնֆլիկտը միջազգային հարաբերությունների կենտրոնական գործնթացն է, մինչդեռ համագործակցությունը, որպես գործնթաց, ուսալիստների կողմից իմաստավորվում է զուտ նրանով, որ մի պետության հետ համագործակցությունը ծառայեցվում է մեկ այլ պետության հետ կոնֆլիկտային հարաբերություններում վերջինիս հանդեպ իշխանության հասնելու նպատակին:

Հնարավոր կոնֆլիկտներում հաղթող դուրս գալու համար պետությունը մշտապես մեծացնում է իր հզորության ռեսուրսները, ավելացնում է իր հզորությունը, ինչը տրամաբանորեն նշանակում է մյուս պետության՝ դրանով իսկ անվտանգության մակարդակի իջեցում: Վերջինս, զգալով դա, նույնպես ձեռնամուխ է լինում իր հզորության ավելացմամբ հավանական հակառակորդի հանդեպ իշխանության հասնելուն. այսպիսով պետությունները կանգնում են **անվտանգության դիլեմայի** առջև, որի զիսավոր արտահայտությունը սպառագինությունների մրցավազքն է:

Միջազգային հարաբերություններում պատերազմների պատճառների բացահայտման խնդրի համատեքստում կարևոր նշանակություն ունի այն հարցը, թե որո՞նք են **միջազգային հարաբերությունների սկզբնական դերակատարները**, ու ո՞մ վարքագի մեջ պետք է փնտրել կոնֆլիկտի արմատները: Այս առումով ռեալիզմը գտնում է, որ ուսումնասիրությունները պետք է ֆոկուսավորվեն պետությունների վրա. հենց նրանք են միջազգային հարաբերությունների սկզբնական և իրական դերակատարները: Մյուս դերակատարները (օրինակ՝ միջազգային կազմակերպությունները) սկզբնական ու իրական դերակատարներ չեն, նրանք ածանցվում են պետություններից, ու թեև միջազգային ասպարեզում հանդես են զայխությունների շահերն են ընկած: Ընդսմին, դասական ռեալիզմը ոչ բոլոր պետություններին է համարում սկզբնական դերակատար, այլ միայն հզորներին, ովքեր կարող են իշխանություն հաստատել այլոց հանդեպ, ներազդել միջազգային համակարգի վրա, անհրաժեշտության դեպքում փոփոխել այն: Հստ ռեալիստների՝ մեծ կամ հզոր պետություններն անում են այն, ինչ ուզում և կարող են, թույլ կամ փոքր պետություններն անում են այն, ինչ նրանց թույլ են տալիս անել հզոր պետությունները:

Ռեալիզմը պետությանը համարում է **ունիտար դերակատար**: Խոսքն այն մասին է, որ պետական իշխանությունն ունակ է ընդու-

նել և ընդունում է քաղաքական որոշումներ ներպետական բոլոր սուբյեկտների համար և նրանց անունից, պատկերավոր ասած՝ «պետությունը խոսում և գործում է մեկ ձայնով, միաձայն»: Պետական կոնկրետ քաղաքականությունն իրականացնող մարմինը կամ անհատը, անկախ իր համոզմունքներից տվյալ քաղաքականության հարցում, իրականացնում է պետության իշխանության ընդունած քաղաքական որոշման պահանջները: Ի հակադրություն ռեալիզմի, լիբերալիզմը պետությանը չի համարում ունիտար դերակատար: Պետության միջազգային քաղաքականությունը, ըստ նրանց, հանդիսանում է այդ պետության բյուրոկրատիայի, առանձին իշխանական կառույցների, քաղաքական կուսակցությունների, այլ խմբերի ու անհատների շահերի պայքարի ու համաձայնեցման խտացված արտահայտություն:

Ռեալիզմի մյուս կարևոր դրույթը վերաբերում է պետության՝ ռացիոնալ դերակատար լինելու համոզմունքին: Պետության անունից հանդես եկող, որոշում կայացնող անհատները գործում են ռացիոնալիզմի սկզբունքով, ինչը ենթադրում է որոշումների կայացման հարցում հնարավոր օգուտների և վնասների կշռադատում՝ վերջնական նպատակ ունենալով պետական շահի իրացումը: Ըստ հին հույն պատմիչ Թուկիդիտի՝ հնարավոր է, որ ռացիոնալ որոշում կայացնելուն խոշնորտող հանգամանք լինի դեպի ցանկալի արդյունքը միտված մտածողությունը (այլ ոչ դեպի իրականությունը միտված), երբ որոշ լիդերների որոշումների հիմքում կլինի ցանկալի արդյունքին հասնելու մտադրությունը, այլ ոչ պետության օբյեկտիվ շահի ընկալումը: Սակայն այս հանգամանքը ևս չի կարող լիդերների վարքագիծը բնորոշել որպես ոչ ռացիոնալ: կարևորն այն է, որ որոշման կայացման հիմքում պետական շահն է: պարզապես այստեղ խնդիրը շահի արդյունավետ և ոչ արդյունավետ ձևակերպելու մեջ է: Լիբերալիզմը գտնում է, որ պետությունը ռացիոնալ դերակատար չէ, որ պետության կողմից ընդունված որոշման հիմքում ներ-

պետական մեկ կամ ավելի ակտորների շահերն են, ինչնց այդ շահերն են ներկայացվում, հրամցվում որպես պետական շահ:

Ըսդունված մոտեցում է, որ ռեալիզմի արմատները գտնվում են իին, միջին և նոր շրջանի մի շարք հայտնի մտածողների գաղափարական դրույթների մեջ: Այս տեսանկյունից ռեալիզմի նախահայր է համարվում հին հույն մտածող, պատմիչ *Թուկիդիդեսը*, որն իր *Պելոպնեայան* պատերազմների պատմության մեջ արծարծում է պետության՝ ռացիոնալիզմով օժոված լինելու, շահն ամեն ինչից վեր դասելու վերաբերյալ տեսակետներ: Ռեալիստական տեսության հետագա ձևավորման առումով կարևոր հիմք է հանդիսացել նաև 4-5-րդ դարերի մտածող *Օգոստինոս Երանելու* գաղափարները, որոնցում նա մարդու եռությունը համարում է ազահ, ժատ, եսասեր և պատերազմների առաջացումը սերտորեն շաղկապում է մարդու այդ բացասական եռութենական հատկանիշների հետ: 15-16-րդ դարերի գործիչ, մտածող *Նիկոլո Մաքիավելլիի* «*Տիրակալը*» աշխատանքը ևս գերազանցապես բովանդակում է պետության շահն ամենամեծ արժեքը համարելու և այն իրացնելու համար ոչ մի բարոյական նկատառման առջև կանգ շառնելու մոտեցումը: Իր հովանավոր, *Ֆլորենցիայի* տիրակալ *Լորենցո Հրաշագեղին* Մաքիավելլին խորհուրդ է տալիս «լինել առյուծ զայլին հաղթելու համար» և «օձ՝ խորամանկությամբ աղվեսին հաղթելու համար»: Զորեղ հակառակորդին դիմակայելու համար Մաքիավելլին առաջարկում է դաշինքներ կազմել, մատնանշում պաշտպանական և հարձակողական որոշ ռազմավարություններ: Միջազգային հարաբերությունների անարխիկ բնույթի և որպես դրա հետևանք՝ ինքնօգնության սկզբ-բունքով առաջնորդվելու ռեալիստական հանրահայտ դրույթի հիմքում էլ ընկած են 17-րդ դարի անզիացի մտածող *Թումաս Հորսի* գաղափարները:

Ինչ վերաբերում է միջազգային հարաբերությունների բնույթի հետագա բարելավման, միջազգային հարաբերությունների ապագայի հարցին, ապա այստեղ ռեալիստները գտնում են, որ այնքան

ժամանակ, որքան գոյություն կունենան պետությունները, միջազգային հարաբերությունների բնույթը կշարունակվի մնալ անարիսիկ։ Պետությունը մշտապես առաջնորդվելու է սեփական շահերով։ Այլ կերպ ասած, քաղաքական ռեալիզմի տեսարանների համոզմամբ, հնարավոր է փոփոխել ուժերի փոխդասավորությունը, մեղմել միջազգային անարիսիայի հետևանքները, ձևավորել առավել կայուն և անվտանգ միջազգային հարաբերություններ, բայց միջազգային հարաբերությունների բնույթն անհնար է փոփոխել։ Նման ենթադրությունը հիմնված է դասական ռեալիզմի տեսության կողմից առաջշաբաթ այն համոզունքի վրա, որ պետության վարքագիծը բխում է մարդու էգոիստական էությունից։

Հանձնարարվող գրականություն

1. Robert Garner, Peter Ferdinand & Stephanie Lawson, *Introduction to politics*, Oxford University Press, 2009, pp. 349-54
2. Juanita Elias and Peter Sutch, “*International Relations: The Basics*”, Routledge, London, New York 2007, pp. 41-49, 54-62
3. Chris Brown and Kirsten Ainley, “*Understanding International Relations*”, 3rd edition, Palgrave Macmillan, New York, 2005, pp.24-28
4. Scott Burchill, Andrew Linklater, Richard Devetak, Jack Donnelly, Matthew Paterson, Christian Reus-Smith and Jacqui True, “*Theories of International Relations*”, 3rd edition, Palgrave Macmillan, New York, 2005, pp. 29-54
5. Ole Holsti, *Theories of International Relations*, Essay, pp. 3-11
6. Cynthia Weber, *International Relations Theory: A Critical Introduction*, 2nd edition, Routledge, NY-London, 2005, pp. 13-36
7. А. П. Щиганков, “Теория международных отношений”, М., “Гардарики”, 2007, стр. 106-109
8. www.irtheory.com
9. www.geocities.com

Դասախոսություն 4

Միջազգային հարաբերությունների տեսություններ

Նեղլիբերալիզմ և նեռուեալիզմ

Նեղլիբերալիզմ

Ինչպես գիտենք, Երկրորդ աշխարհամարտի փաստը ծանր հարված հասցրեց միջազգային հարաբերությունների լիբերալ տեսությանը: Լիբերալիզմը նահանջեց իր դիրքերից:

1970-ականներից ի վեր լիբերալիզմի տեսության մեջ վերափոխումներ սկսեցին տեղի ունենալ, ինչի արդյունքում ի հայտ եկավ Նեղլիբերալիզմի ուղղությունը: Նեղլիբերալները, ինչպես օրինակ՝ *Ռոբերտ Աքսելըրոդն ու Ռոբերտ Կոհեյնը* հարցադրում էին անում առաջն, թե ինչու են պետությունները նախընտրում համագործակցել միջազգային անարխիկ համակարգի պայմաններում: Հարցադրման պատճախանը նրանք առաջարկում են գտնել բանտարկյալների դիմայի տեսության մեջ: Բանտարկյալների դիմայի բովանդակությունը հակիրճ կարելի է ներկայացնել հետևյալ կերպ: Երկու բանտարկյալների առանձին-առանձին հարցաքննում են կատարված հանցանքի կապակցությամբ: Հարցաքննության պայմանն այն է, որ եթե բանտարկյալներից մեկը խոստովանի, լոռողը կդատապարտվի երկարաժամկետ ազատազրկման: Եթե երկուսն էլ խոստովանեն, երկուսն էլ կդատապարտվեն միջնաժամկետ ազատազրկման: Եթե երկուսն էլ լրեն, կդատապարտվեն կարճաժամկետ ազատազրկման: Թե ինչ վարքագիծ կարող են դրսերել բանտարկյալները, կարելի է դատել հետևյալ մտայնությունից ենթակա: **Ա** բանտարկյալը անպայման կմտածի, որ **Բ**-ն կտարվի ազատ արձակվելու գայթակղությամբ և կխոստովանի, ուստի **Ա**-ն նույնպես հակվածություն կդրսերի խոստովանելու: Եթե **Ա**-ն չխոստովանի, ապա շատ թանկ կվճարի **Բ**-ի խոստովանելու դեպքում: Այսպիսով, ամենահավանականը և

ոացիոնալն այն է, որ 2-ն էլ կիսուտովանեն և դրանով իսկ կդատապարտվեն միջնաժամկետ ազատազրկման (մրցակցային, կոնֆլիկտային վարքագծի դրսեռութ): Սակայն, եթե բանտարկյալները երկրորդ անգամ հայտնվեն նույն իրավիճակում, հավանականը և ռացիոնալն այն է, որ երկուսն էլ կլռեն (դրանով նրանք ցուցաբերում են համագործակցային վարքագիծ): Հատկանշական է, որ յուրաքանչյուր բանտարկյալ իր վարքագծի վերաբերյալ որոշում ընդունելիս անպայմանորեն հաշվի է առնում մյուս բանտարկյալի որոշման հավանականությունը: Փաստորեն, նեռլիբերալիզմը գտնում է, որ համագործակցությունը բխում է ոչ թե դերակատարների բնույթից (ինչպես պնդում էին դասական լիբերալները), այլ նրանց շահերից: Իհարկե, պետությունները մի անգամ չեն, որ հայտնվում են համագործակցություն-կոնֆլիկտ այլընտրանքի առաջ, քանի որ նրանց հարաբերությունները կրում են շարունակական բնույթ, ուստի և նման իրավիճակներում երկու պետությունները հայտնվում են շարունակաբար:

Թե՛ լիբերալները, թե՛ նեռլիբերալները համագործակցությունը համարում են միջազգային հարաբերությունների առաջնային գործընթաց: Սակայն հարցին, թե ինչու են դերակատարները համագործակցում, տարբեր պատասխաններ են առաջադրվում: Ըստ դասական լիբերալների՝ համագործակցությունը կայանում է այն պատճառով, որ համագործակցության մղումը բխում է մարդու էությունից (ինչն էլ իր տեղն է գտնում պետության վարքագծի մեջ) և որ համագործակցությունն արդյունքն է ինստիտուտների բարեփոխման: Նեռլիբերալների պնդմամբ, համագործակցությունը տեղի է ունենում, քանզի միմյանց հետ շարունակաբար փոխիհարաբերվող, փոխազդող դերակատարների շահերից է բխում համագործակցելը:

Նեռլիբերալները կարևորագույն նշանակություն են տալիս անվտանգության խնդրին. Ինստիտուտները, ըստ նրանց, նպաստում են անվտանգության կայացմանը:

Սառը պատերազմից հետո լիբերալիզմի դիրքերն ամրապնդվեցին: Լիբերալ տեսաբանները հանդես էին գալիս փաստարկներով առ այն, որ Սառը պատերազմի ավարտը նպաստում է լիբերալ-դեմոկրատիայի հաղթարշավին: *Ֆրենսիս Ֆուկույաման* իր «Պատմության ավա՞րտ» հորվածում գրում էր, որ քանզի լիբերալ-դեմոկրատիան կառավարման ամենակատարյալ ձևն է, որ լիբերալ-դեմոկրատիան հաղթանակում է, ուստի լիբերալիզմն այլընտրանք այլևս չունի: Առհասարակ, հիմնվելով այն կանխադրույթի վրա, որ ժողովրդավարությունները միմյանց դեմ չեն պատերազմում, լիբերալ տեսաբանները պնդում էին, որ Սառը պատերազմի ավարտից հետո գլոբալ խաղաղության համար անհրաժեշտ պայմաններ են ստեղծվել:

Նեռեալիզմ

Միջազգային հարաբերությունների գիտաճյուղի մեջ նեռեալիզմի ուղղության առաջացումը կապված է *Քեննեթ Ուոլտ* (*Kenneth Waltz*) «Միջազգային քաղաքականության տեսությունը» (“Theory of international politics”) աշխատության լույս տեսնելու հետ (1979 թ.): Ինքը՝ «Նեռեալիզմ» տերմինն արտացոլում է ամերիկյան մի շարք գիտնականների ձգտումը՝ պահպանել դասական ռեալիզմի կարեւոր հիմնարրույթները և միաժամանակ թարմացնել ու հարստացնել ռեալիստական տեսությունը՝ հաշվի առնելով միջազգային հարաբերություններում առկա նոր իրողություններն ու այլ տեսությունների ձեռքբերումները:

Ուոլտը գտնում էր, որ տեսական ընդհանրացումներ անելիս անհրաժեշտ է հիմքում դնել ոչ թե առանձին պետությունների վարքագիծը, այլ միջազգային համակարգը: Համաշխարհային քաղաքականությունը ոչ թե պետությունների արտաքին քաղաքականությունների պարզ հանրագումարն է, այլ միջազգային համակարգի տրամաբանությունից բխող համայիր քաղաքականություն: Ուոլտը քննադատում էր Մորգենթաուին այն բանի համար, որ նա պետու-

թյան ներքին և արտաքին քաղաքականությունները որպես ամբողջություն չեր դիտարկում, օտարում եր միմյանցից: Իսկ Ռայմոն Արոնին քննադատում եր միջազգային հարաբերությունների ավտոնոմ, ինքնուրույն տեսություն կառուցելու հնարավորության հանդեպ սկեպտիկ կեցվածք դրսւորելու համար:

Նեռեալիզմը նախ և առաջ միջազգային քաղաքականությունը միջազգային հարաբերությունների համալիրից անջատ է դիտարկում. միջազգային քաղաքականությունը առանձին երևույթ է համարում. միջազգային հարաբերությունների քաղաքական ոլորտը առանձնացվում է մյուս ոլորտներից (տնտեսական, մշակութային և այլն), ուսումնասիրման առանձին ոլորտ է դառնում: Նեռեալիզմը դասական ուղղությունից տարբերվում է նրանով, որ միջազգային քաղաքականությունը դիտարկում է որպես ամբողջական համակարգ, որը գործառնում է որոշակի օրենքների համաձայն: Դեռևս 1959 թ. լույս տեսած իր «Մարդը, պետությունը և պատերազմը» ("Man, The State and War") աշխատության մեջ Ռուլյար գալիս է այն եզրահանգման, որ կախված այն բանից, թե հետազոտողները կոնֆլիկտների որ պատճառներն են համարում էական, միջազգային հարաբերությունների և մասնավորապես զինված կոնֆլիկտների վերաբերյալ ուսումնասիրությունները կարելի է բաժանել 3 խմբերի: Հետազոտությունների 1-ին խումբը կոնֆլիկտների պատճառները, էռությունը ուսումնասիրելիս կենտրոնանում է մարդու բնության վրա, նրա ֆիզիոլոգիական և բարոյական որակների վրա (էգոիստական էռություն, ազրեսիվ իմպուլսներ, ինտելեկտի ոչ բավարար վիճակ և այլն). այսինքն այդ կոնֆլիկտների պատճառները կապում է մարդածին (անթրոպոգեն) գործոնների հետ: 2-րդ խումբը կոնֆլիկտների պատճառները կապում է պետության ներքին բնույթի և ասրիբուտների հետ (տոտալիտար կամ դեմոկրատական ռեժիմ, տնտեսավարման շուկայական կամ վարչականայական կարգ և այլն): Իսկ 3-րդ խումբը կոնֆլիկտներին համակարգային բնույթ է վերագրում, այսինքն, կոնֆլիկտների պատճառները փնտրում է համակարգի կառուցվածքում:

Հստ Ուոլցի՝ միջազգային հարաբերությունների վերլուծության առաջին երկու մոտեցումները թեև օգտակար են, բայց միայն այդ երկուսի կիրառմամբ անհնար է բացահայտել միջազգային կոնֆլիկտների խորքային պատճառները։ Այս կապակցությամբ միայն երրորդ՝ համակարգային մոտեցումը կարող է արդյունավետ լինել։ Միջազգային հարաբերությունների համակարգային բնույթը բխում է ոչ թե պետությունը բնութագրող յուրահատկություններից (տարածք, աշխարհագրական դիրք, ժողովրդական ներուժ, սոցիալ-մշակութային յուրատիպություն), թեև նման յուրահատկությունների նշանակությունը չի կարելի անտեսել, այլ միջազգային համակարգի կառուցվածքի բնութագրիչներից։ Միջազգային համակարգի կառուցվածքը, հանդիսանալով միջազգային դերակատարների փոխազդեցությունների, փոխհարաբերությունների հետևանք, իրենից ներկայացնում է ուրույն ֆենոմեն (երևույթ)։ Կառուցվածքն ինքն է թելադրում պետություններին այս կամ այն վարքագիծը դրսերել։ Կառուցվածքն է սահմանագծում, սահմանափակում պետության վարքագիծը, կամ, ընդհակառակը, միջազգային ասպարեզում պետության գործունեության համար նպաստավոր պայմաններ ստեղծում։ Միջազգային համակարգի հենց կառուցվածքային յուրահատկություններով է բացատրվում այն, որ պետությունների արտաքին քաղաքական գործունեության ոլորտում նպատակներն ու արդյունքները հաճախ չեն համապատասխանում։

Հարցին, թե ինչու տարբեր քաղաքական համակարգեր ունեցող և տարբեր քաղաքական գաղափարախոսություններ դավանող պետությունները համանման վարքագիծ են դրսենորում միջազգային նմանատիպ իրադրություններում, Ուոլցը պատասխանում է, որ պատճառը պետք է փնտրել համակարգի կառուցվածքի մեջ։ Մովայլ պարագայում այդ կառուցվածքը դիտվում է որպես պայմանների և սահմանափակումների ամբողջություն, որը հարկադրանքի եֆեկտով ստիպում է պետությանը դրսենորել այս կամ այն վարքագիծը։ Այդ պատճառով պետության միջազգային քաղաքականության ձիշտ

հասկանալը, միջազգային քաղաքականության ձիշտ կանխատեսումը, պլանավորումը կախված են նշված պայմանների ձիշտ գիտակցումից: Համակարգի կառուցվածքը բնութագրվում է առաջին հերթին միջազգային հարաբերությունների անարխիկ բնույթով և երկրորդ հերթին՝ պետությունների միջև ուժային հարաբերակցություններով: Պետության հզորությունն է որոշում նրա տեղն ու դերը համակարգում:

Ուժային հավասարակշուության սկզբունքը ինչպես դասական ռեալիզմի, այնպես էլ նեռուալիզմի առանցքային սկզբունքն է: Բայց ի տարբերություն դասական ռեալիստների, նեռուալիստները պընդում են, որ միջազգային համակարգի կառուցվածքն է պայմանավորում ուժային հավասարակշուությունը պետությունների միջև:

Հանձնարարվող գրականություն

1. Robert Garner, Peter Ferdinand & Stephanie Lawson, *Introduction to politics*, Oxford University Press, 2009, pp. 359-64
2. Juanita Ellias and Peter Sutch, “*International Relations: The Basics*”, Routledge, London, New York 2007, pp. 49-53, 72-75
3. Chris Brown and Kirsten Ainley, “*Understanding International Relations*”, 3rd edition, Palgrave Macmillan, New York, 2005, pp.40-48
4. Scott Burchill, Andrew Linklater, Richard Devetak, Jack Donnelly, Matthew Paterson, Christian Reus-Smith and Jacqui True, “*Theories of International Relations*”, 3rd edition, Palgrave Macmillan, New York, 2005, pp. 29-54, 64-83, 84-109,
5. John Mearsheimer, Structural Realism, in Dunne’s textbook chapter 4, Oxford, 2007, pp. 71-88
6. Ole Holsti, *Theories of International Relations*, Essay, pp. 3-16
7. Cynthia Weber, *International Relations Theory: A Critical Introduction*, 2nd edition, Routledge, NY-London, 2005, pp. 13-58
8. А. П. Цыганков, “Теория международных отношений”, М., “Гардарики”, 2007, стр. 126-140
9. www.irtheory.com
10. www.geocities.com

Դասախոսություն 5

Միջազգային հարաբերությունների տեսություններ

Ռադիկալիզմ

Ռադիկալիզմի տեսությունը մաքսիստական հարացույցի (պարադիգմա) և դրա վարիացիաների ամբողջությունն է: Ռադիկալիզմ անվանվում է այն պատճառով, որ այս տեսությունը հանդես է գալիս միջազգային հարաբերությունների մյուս երկու կանոնիկ տեսությունների՝ լիբերալիզմի և ռեալիզմի սուր քննադասության, այդ տեսությունների դրույթների ամբողջական բացառման և միջազգային հարաբերությունների հիմնախնդիրների լուծման ռադիկալ, արմատական դրույթների առաջքաշման դիրքերից: Եթե ռեալիզմի ու լիբերալիզմի համար միմյանց որոշ տեսակետներ փոխընդունելի են (օրինակ՝ միջազգային հարաբերությունների անարխիկ բնույթի, պետության՝ զլանավոր դերակատար լինելու և այլնի մասին), ապա ռադիկալիզմը լրիվ այլ կերպ է մեկնաբանում միջազգային հարաբերությունների բոլոր երևույթներն ու գործընթացները՝ շեշտը դնելով գերազանցապես տնտեսական գործոնների, տնտեսական նկատառումների վրա:

Ռադիկալիզմը որդեգրել է զիտական այն գործելակերպը, երբ միջազգային հարաբերությունների, համաշխարհային քաղաքականության տարբեր երևույթների, գործընթացների, հիմնախնդիրների դիտարկումը, մեկնաբանությունն ու հետազոտումը իրականացվում են մարդկության արտադրական հարաբերությունների էվոլյուցիայի պատմական վերլուծության հիման վրա: Այսինքն, արտադրական գործընթացի էվոլյուցիայի (արտադրության ստրկատիրական, ֆեոդալական եղանակներ, պրոտոնդրուտրացում, արդյունաբերական հեղաշրջում, ինդրուստրացում) վերլուծությունը միջազգային հարաբերությունների ուսումնասիրման բանալին է: Միջազգային հարա-

բերությունների ներկայիս բնույթը, ըստ ռադիկալների, հասարակության պատմական զարգացման արդյունքն է: Այդ պատմական զարգացման առանցքում մշտապես գտնվել և գտնվում են արտադրական հարաբերությունները (արտադրության գործընթացի վրա խարսխված հասարակական հարաբերությունները): Արտադրական գործընթացի զարգացումը շարունակ վերափոխում է հասարակական հարաբերությունների բնույթը: Միջազգային հարաբերությունները, հանդիսանալով հասարակական հարաբերությունների մի բաղադրիչը, նույնպես ենթարկվում են այս օրինաչափությանը: Պատմությունը, պատմության դերն առհասարակ, խիստ կարևորվում է ռադիկալ մտածողության մեջ հասարակական հարաբերությունները (այդ թվում միջազգային հարաբերությունների) դիտարկելիս, վերլուծելիս: Եթե ռեալիստների համար պատմությունը կրկնվող շրջափուլերի ամբողջություն է, և եթե այն օգտակար է գուտ անցյալի համանման իրավիճակներից դասեր քաղելու, ընդհանրացումներ անելու, տեսության դրույթները վերահաստատելու տեսանկյունից (օրինակ՝ ռեալիստները գտնում են, որ պատմության ցանկացած փուլում միջազգային հիմնախնդիրները նույնն են, միշտ էլ մարդու եռությունը մնացել և մնում է գծուծ, եսասեր, իշխանատենչ, միշտ էլ պետության վարքագծի հիմքում շահն է եղել և կա և այլն), ապա ռադիկալների կարծիքով պատմությունն է հենց տալիս միջազգային հարաբերությունները հասկանալու, ընկալելու, ուսումնասիրելու բանալին:

Կարլ Մարքս (1818-1883) աշխատությունները ֆունդամենտալ նշանակություն են ունեցել ռադիկալ մտածողության ձևավորման հարցում: Ռադիկալիզմի հարցույցն իր մեջ ընդգրկում է դասական մարքսիզմը և այդ դրույթների հետագա վերաձևակերպման հիման վրա առաջացած տեսությունները: Մարքսը գտնում էր, որ կապիտալիզմի էվոլյուցիան տեղի է ունեցել տնտեսական փոփոխությունների, զարգացումների և դրանցով պայմանավորված՝ դասակարգային, սոցիալական պայքարի հիման վրա: 19-րդ դարի եվրոպական

կապիտալիզմի հիմքում ավելի վաղ դարերի ֆեոդալական քաղաքական ու տնտեսական կացութաձևերն են եղել: Կապիտալիստական հասարակարգում գործընթացների շարժից ուժը մասնավոր շահն է (անհատի կամ խմբի), ինչը ուղղորդում է շուկայական հարաբերությունները և պայմանավորում աշխատաշուկայի վիճակը: Այս համատերասում իշխող բուրժուական և հարատահարվող բանվորական դասակարգերի միջև բախումն անխուսափելի է, որը պետք է ի վերջո հանգեցնի հասարակության նոր՝ սոցիալիստական կարգի ձևավորմանը:

Հստ մարքսիզմի՝ միջազգային հարաբերությունների գլխավոր գործող անձինք սոցիալական դասակարգերն են՝ համաշխարհային բուրժուազիան և միջազգային բանվոր դասակարգը (պրոլետարիատ): Պետությունները՝ որպես միջազգային հարաբերությունների մասնակիցներ, երկրորդական նշանակություն ունեն: Բուրժուազիայի՝ գերշահույթներ ձեռք բերելու ձգտումը նրան ամենուր և միշտ դրդում է. 1) ուժեղացնել բանվոր դասակարգի շահագործումը և 2) հումքի, էժան աշխատումի նոր աղբյուրներ, ինչպես նաև իր պատրաստի ապրանքների իրացման շուկաներ ձեռք բերել: Սա առաջ է բերում այնպիսի իրողություն, երբ աշխարհը բաժանվում է երկու բևեռների՝ իմպերիալիզմի և աշխատավորության: Ընդ որում՝ իմպերիալիզմի բևեռում զնալով սաստկանում է իմպերիալիստական տերությունների, իշխանությունների միջև շահերի հակասությունը, պայքարը, մինչդեռ մյուս բևեռում նկատվում է աշխատավոր դասակարգերի համախմբում, կոնսուլիդացիա: «Բանվորները հայրենիք չունեն. նրանց միավորում է պրոլետարական ինտերնացիոնալիզմի ինքնազիտակցությունը», սա է մարքսիստական լոգունգներից մեկը: Մարքսիստների պնդմամբ՝ բուրժուազիան իր էռուժյամբ և բնույթով ևս ինտերնացիոնալ կատեգորիա է, բուրժուան նույնն է թե՝ Ֆրանսիայում, թե՝ Բրիտանիայում, թե՝ այլուր: Պարզապես պետությունը գործիք է բուրժուազիայի ձեռքին՝ աշխատավոր զանգվածների շահագործումը կայուն հիմքերի վրա դնելու, նրանց մշտապես

իրեն ենթարկելու համար (ինչպես հիշում ենք, ուշավիզմը հենց պետությանն էր վերապահում միջազգային հարաբերությունների սկզբունքային դերակատարությունը): Դետության արտաքին քաղաքականության ռեսուրսները (ռազմավարությունը և դիվանագիտությունը) ծառայեցնելով իր ներ էգոխատական շահերին՝ բուրժուազիան մշտապես նպաստում է միջազգային հարաբերությունների անկայունացմանը (դեստաքիլիզացիային), կոնֆլիկտների և պատերազմների բռնկմանը:

Մարքսիստները գտնում են, որ միջազգային հարաբերությունների բնույթը նույնն է ինչ ներպետական հարաբերություններինը, իսկ ներպետական հարաբերությունները կառուցված են բուրժուազիայի կողմից աշխատավորության շահագործման հիման վրա: Հզոր կապիտալիստական տերությունները շահագործում են ոչ միայն իրենց քաղաքացի աշխատավորներին, այլև ավելի թույլ պետությունների, զաղութների պրոլետարիատին: Իմպերիալիստական տերությունների կողմից վարվող զաղութային էքսպանսիայի քաղաքականությունը ասվածի վառ դրսուրումն է: Այսպիսով, ըստ մարքսիզմի՝ միջազգային հարաբերությունների բնույթը կապիտալիստական է: Վերոնշյալից ելնելով՝ մարքսիստները համարում են, որ միջազգային գործընթացները դասակարգային կոնֆլիկտներ, ճգնաժամեր, պատերազմներ և սոցիալական հեղափոխություններ են: Ռուսաստանում, Կուրայում, Չինաստանում և այլուր տեղի ունեցած սոցիալիստական հեղափոխությունները միջազգային գործընթացներ են:

Միջազգային հարաբերությունների գլխավոր մասնակիցների նպատակները տրամադրեն հակասում են միմյանց: Եթե համաշխարհային բուրժուազիայի նպատակը շահույթի ավելացումն ու կապիտալի կուտակումն է, ապա համաշխարհային աշխատավորական դասի նպատակը բուրժուազիայի տապալումը, պրոլետարիատի ազատագրումը, երկրի երեսին սոցիալիզմի և կոմունիզմի կառուցումն է: Բնականաբար, տարբերվում են նաև նշված նպա-

տակներին հասնելու միջոցները: Եթե բուրժուազիան իր նպատակին փորձում է հասնել շահագործումն ուժեղացնելու միջոցով, ապա պրոլետարիատը իր նպատակին փորձում է հասնել համաշխարհային սոցիալական հեղափոխությունների մեջ ալիք բարձրացնելու միջոցով:

Հստ մարքսիստական տեսության՝ միջազգային հարաբերությունների ապագան կանխորոշված է հասարակական զարգացման օրենքներով: Հստ այդ օրենքներից մեկի՝ հասարակական հարաբերությունների զարգացումը ի վերջո հանգեցնելու է նրան, որ պետությունները՝ որպես հասարակության քաղաքական կազմակերպման ձևեր, վերանալու են, ձևավորվելու է կապիտալիստական շահագործումից զերծ, բարոյական նորմերով ինքնակառավարվող համաշխարհային մի հասարակություն:

Ռադիկալ հարացույցի ժամանակակից ներկայացուցիչներից սոցիոլոգ Իմմանուել Վալլերշտայնը իր «Ժամանակակից աշխարհամակարգը» աշխատության մեջ զարգացնելով համաշխարհային կապիտալիստական համակարգի մասին տեսությունը, կապիտալիզմի զարգացման պատմական յուրաքանչյուր փուլին համապատասխան առանձնացնում է այն աշխարհագրական տարածաշրջանները, որտեղ արտադրության պրոցեսն առավել զարգացած էր, իսկ գյուղատնտեսական սեկտորն ի վիճակի էր հոգալ արդյունաբերության մեջ ներգրավված աշխատուժի բազային սպառողական կարիքները (նման տարածաշրջանը կոչվում է «կենտրոն» կամ «միջուկ» (core)): Նա առանձնացնում է նաև այնպիսի աշխարհագրական տարածաշրջաններ, որտեղ «կենտրոնը» թույլ չի տալիս, որ արդյունաբերական զարգացում տեղի ունենա. (նման տարածաշրջանն էլ կոչվում է «պերիֆերիա» (ծայրամաս), պերիֆերիան կենտրոնի էժան հումքի մատակարարն է ու էժան աշխատուժը: Կենտրոնի և պերիֆերիայի միջև միջանկյալ դիրք էր գրավում «սեմիպերիֆերիան», որտեղ զարգացման ինչ-ինչ միտումներ են արձանագրվում: Նման դասակարգումը պատմական տեսանկյունից

նույնացվում է **Մետրոպոլիա-կիսազաղութ-գարութ** դասակարգմանը: Իսկ ներկա իրողություններին համահունչ դիտարկման դեպքում կունենանք զարգացած երկրներ-զարգացող երկրներ-ազգարային (հետամնաց) երկրներ դասակարգումը: Վալերշտայնը նշում է, որ այս տարածաշրջանների, երկրների շրջանում կարգավիճակային-դերային զարգացումներ են գրանցվում: Այսպես, նախկինում սեմիպերիֆերիայի կարգավիճակում գտնվող Հարավային Կորեան և Թայվանը 1980-90-ական թթ. ընթացքում դարձան կենտրոնի կարգավիճակ ունեցող երկրներ, իսկ Մալայզիան ու Թայլանդը դարձան սեմիպերիֆերիկ երկրներ: Այսպիսով, Վալերշտայնի ու նրա համախոհների համար միջազգային հարաբերությունների վերլուծության գլխավոր ելակետ դիտարկվում է աշխարհի կապիտալիստական համակարգը: Միջազգային-քաղաքական բոլոր փոխակերպումները, փոխասավորությունները, ըստ նրանց, անհրաժեշտ է մեկնաբանել միայն աշխարհակարգի կապիտալիստական կառուցվածքի տրամաբանությունից ենթելով. համաշխարհային համակարգը, ըստ նրանց, տնտեսական պրոցեսների և հարաբերությունների փոխկապակցված ամբողջություն է:

Ռադիկալ գաղափարների մյուս խումբը միջազգային քաղաքական գործընթացների մեկնաբանման հիմքում դնում է պետությունների տնտեսական շահերի գաղափարը: Արանով ռարիկաները հստակ զանազանվում են լիբերալներից ու ռեալիստներից: Վերջիններս տնտեսական գործոնին այդքան մեծ դերակատարություն չեն վերապահում, ինչպես ռադիկալները: Լիբերալները գտնում են, որ տնտեսական փոխկապվածության երևույթը միայն մեկ ասպեկտ է հանդիսանում համագործակցությունը՝ որպես միջազգային գործընթաց մեկնաբանելու համար: Այսինքն՝ համագործակցության երևույթը բացատրելու, մեկնաբանելու համար մի շարք ասպեկտներ գոյություն ունեն, տնտեսական փոխկապվածությունը, այս, յուրովի իմաստավորում է համագործակցությունը, բայց համագործակցությունն իմաստավորող այլ ասպեկտներ ել կան: Ռեալիստները

տնտեսական գործոնն արժնորում են այնքանով, որքանով այն նպաստում է պետության հզորության ավելացմանը կամ պահպանմանը: Մադիկալները, ընդհակառակը, տնտեսական գործոնն ամենաառաջնահերթն են համարում: Մարքսիստական գաղափարախոսության հիմքի վրա ձևավորված «ֆեմինիզմ» մարգինալ տեսությունը, օրինակ, գտնում է, որ կանանց հանդեպ առկա խորականության արմատները պետք է փնտրել շահազործողական կապիտալիստական համակարգի մեջ:

Հանձնարարվող գրականություն

1. Robert Garner, Peter Ferdinand & Stephanie Lawson, *Introduction to politics*, Oxford University Press, 2009, pp. 367-72
2. Scott Burchill, Andrew Linklater, Richard Devetak, Jack Donnelly, Matthew Paterson, Christian Reus-Smith and Jacqui True, “Theories of International Relations”, 3rd edition, Palgrave Macmillan, New York, 2005, pp. 110-161,
3. Ole Holsti, *Theories of International Relations*, Essay, pp. 16-18
4. Cynthia Weber, *International Relations Theory: A Critical Introduction*, 2nd edition, Routledge, NY-London, 2005, pp. 123-150
5. А. П. Цыганков, “Теория международных отношений”, М., “Гардарики”, 2007, стр. 113-116, 149-154
6. www.marxists.org/archive/marx/
7. www.marxists.org/archive/gramsci/
8. www.marxists.org/subject/frankfurt-school/index.htm
9. <http://plato.stanford.edu/entries/critical-theory/>
10. www.geocities.com

Դասախոսություն 6

Միջազգային հարաբերությունների տեսություններ

Կոնստրուկտիվիզմ

Միջազգային հարաբերությունների կոնստրուկտիվիզմի տեսությունն իր անվանումը վերցրել է սոցիալական կոնստրուկտիվիզմի տեսության այն կանխադրույթից, որ սոցիալական իրականությունը և սոցիալական հարաբերությունները մտքերի, գաղափարների, արժեքների ամբողջության արտացոլում, արտապատկերում են: Սոցիալական իրականությունը, հարաբերությունները առարկայական, նյութական կատեգորիաներ չեն. ըստ սոցիալական կոնստրուկտիվիզմի՝ դրանց ինչպիսին լինելը պայմանավորված է մարդկանց կողմից դրանց ընկալելու ձևից:

Կոնստրուկտիվիզմը միջազգայնագիտության ասպարեզ մուտք գործեց՝ իր հիմնախնդրային օրակարգում ունենալով այնպիսի ավանդական հիմնահարցեր, ինչպիսիք են պետության բնույթը, սուվերենության գաղափարաբանությունը, միջազգային անարխիան և այլն, միևնույն ժամանակ քննարկումների սեղանին դնելով այնպիսի հարցեր, ինչպիսիք են միջազգային հարաբերություններում սեռի/գեներերի, ինքնության, եթնիկության դերակատարության հարցերը, որոնք մինչ այդ բացակայել էին միջազգային հիմնախնդիրների օրակարգից: Ի տարբերություն լիբերալիզմի, ռեալիզմի և ռադիկալիզմի, կոնստրուկտիվիզմը չի հանդիսանում միջազգային հարաբերությունների բոլոր կողմերի, երևույթների, գործընթացների վերաբերյալ միանշանակ համոզմունքներ հանդես բերող տեսություն: Փոխարենը կոնստրուկտիվիզմը գանում է, որ միջազգային հարաբերություններն այնքան բազմաբարդ են, որ դրանք անհնար է դիտարկել ընդունված համադրույթի մեջ տեսության շրջանակներում, մեկնաբանել մեկ տեսության դիրքերից. չէ՝ որ բազմաթիվ իրավիճակ-

ներ, իրողություններ, երևույթներ կան, որոնց այս կամ այն տեսությունը դժվարանում է կամ չի կարողանում բացատրել:

Կոնստրուկտիվիստներն առաջնորդվում են այն կանխադրույթով, որ միջազգային դերակատարների վարքագծերը, գործողությունները պայմանավորված են էլիտաների համոզմունքով, բխում են նրանց ինքնության առանձնահատկություններից, նրանց միջավայրում առկա սոցիալական նորմերից: Անհատները, միավորվելով էլիտաների մեջ, ստեղծում են, կոում են քաղաքական նոր մշակույթ, հավատամք՝ համոզմունքների, զաղափարների, արժեքների, մտածելակերպերի մի ամբողջություն, կամ զարգացնում, վերափոխում են եղած մշակույթը, հավատամքը: Պետական/ազգային շահերը ձևակերպվում են հենց նշված դերակատարների ինքնության, մշակույթի, արժեքային համակարգի ու մտածելակերպի հիման վրա: Այսպիսով, կոնստրուկտիվիզմը գտնում է, որ միջազգային հարաբերությունների (ինչպես նաև ներպետական ոլորտի) բազմաբնույթ հիմնահարցերը, երևույթները, գործընթացները դիտարկելիս, վերլուծելիս, հետազոտական ֆոկուսը պետք է կենտրոնացնել անհատների, էլիտաների ինքնության, մշակույթի, նորմերի ու արժեքների, ավանդույթի ու սովորույթի վրա⁹:

Կոնստրուկտիվիզմը խուսափում է միջազգային հարաբերությունների կառուցվածքի հարցին անդրադառնալուց: Կոնստրուկտիվիզմի դպրոցի ամենակարկառուն ներկայացուցիչներից Ալեքսանդր Վենդուի պնդմամբ՝ քաղաքական / միջազգային կառուցվածքի վրա ֆոկուսավորումը խիստ մակերեսային բացատրություն կտա

⁹ Գիտահետազոտական այս գործելակերպի իմաստն ավելի ցայտուն ներկայացնելու համար Թեղ Հոփֆը առաջարկում է հետևյալ անալոգիան. Թատրոնում հանկարծակի հրդեհ է բռնկվում, և յուրաքանչյուր որ վազում է դեպի միակ ելքը: Եթե պատկերացում չունենանք այդ թատրոն հաճախած հանրույթի սոցիալական նորմերի, արժեքների, ինքնության, մտածելակերպի և այնի մասին, չենք կարող նույնիսկ աս պարզ իրավիճակում հաստատապես ասել, թե ովքե՞ր դուրս կան առաջինը, ամենաուժեղնե՞րը, թե՞ հաշմանդամները, կանա՞յթ, թե երեխաները, ծերե՞րը, թե երիտասարդները, թե՞ փախուստը կվերածվի բոլորի մեջ մոլեզին մի պայքարի:

պետության վարքագծի մասին: Նրա խոսքերով, միայն կառուցվածքը հաշվի առնելով, «հնարավոր չէ կանխատեսել՝ արդյո՞ք տվյալ երկու պետությունները կբարեկամանան իրար, թե՞ կթշնամանան, կճանաշեն մեկմեկու սուվերենությունը, կվարեն ստատո՞ւ քվոյի քաղաքականություն¹⁰, թե՞ ուսիզիոնիզմի քաղաքականություն¹¹: Վենդտը գտնում է, որ ուսումնասիրության կարևորագույն օբյեկտը պետք է հանդիսանա ինքնությունն ու դրա գիտակցման ձևը (գերազանցապես նկատի ունենալով էլիտաների կողմից ինքնության գիտակցման ձևը), ինչպես նաև ինքնազիտակցման փոփոխության երևույթը: Միջազգային համակարգի բնույթն անարխիկ է ոչ թե որովհետև իրականությունն է այդպիսին, այլ քանի որ պետությունների էլիտաներն են հակված այն անարխիկ դիտելու, հետևապես այդ նույն էլիտաները, ենելով իրենց համոզմունքներում «կառուցված»¹² անարխիայից, ձգոում են ինքնօգնությամբ մեղմել անարխիայի հնարավոր հետևանքներն իրենց պետության վրա: Անարխիան, ըստ Վենդտի, կախված է Էլիտաների ինքնազիտակցման ձևերի բաշխվածությունից, ոչ թե ուազմական հզորության, ուժի բաշխվածությունից, ինչպես պնդում են ռեալիստները: Եթե պետության ինքնությունը տեղորոշվում է գուտ տվյալ պետության մակարդակում¹³, և եթք շատ են այդպիսի պետությունները, ապա համա-

¹⁰ Իրավիճակի պահպանմանն ուղղված քաղաքականություն:

¹¹ Վերանայման, իրավիճակի փոփոխմանն ուղղված քաղաքականություն:

¹² Հենց այստեղ է գտնվում «կոնստրուկտիվիզմ» տերմինի հասկացության բանալին, որ աշխարհն այսպիսին է, ոչ թե քանի որ իրականում այդպիսին է, այլ որ այդպիսին են պատկերացնում, «մտակառուցում» մարդիկ

¹³ Խոսքն այստեղ հետևյալի մասին է. յուրաքանչյուր անձ ինքնության տեղորոշման տարբեր մակարդակներ ունի, մարդու ինքնությունը կարող է տեղորոշվել, օրինակ՝ տոհմի մակարդակում (ես Սողոմոնյան եմ, դրանով ինձ առանձնացնում եմ ոչ Սողոմոնյաններից), ինքնության տեղորոշման ավելի բարձր մակարդակ է համայնքային ինքնությունը (ես վանաձորցի եմ), ել ավելի բարձր կարող է լինել ազգայինը կամ պետականը (հայ եմ կամ հայստանցի եմ, նայած որն է ինձ համար ավելի կարևոր), կրոնական ինքնությունը ևս կարենու է (քրիստոնյա եմ), շատ ավելի ընդգրկուն մակարդակ է քաղաքակրթային ինքնությունը (արևմուտքի եմ), կարող են նաև լինել բազմաթիվ սոցիալական, գաղափարական այլ ինքնություններ

կարգն անարխիկ լինելու ավելի մեծ հավանականություն ունի: Եթե պետության ինքնությունը տեղորոշվում է ավելի բարձր մակարդակում, ըղգրկելով այլ պետություններ, այլ հասարակություններ ևս, և երբ շատ են նման պետությունները, ապա մեծանում է անարխիայի բացակայության հավանականությունը:

Կոնստրուկտիվիզմը, ինչպես և մյուս տեսությունները, ենթարկվել են քննադատության: Քննադատության գլխավոր առանցքն այն է, որ ըստ այս տեսության, գրեթե գոյություն չունի օբյեկտիվ իրականություն, ամեն ինչ չափվում, չափորոշվում է անհատի, խմբի, էլիտայի աչքերով, մտածողությամբ, պատկերացմամբ, համոզմունքով, հավատով. ուստի և չկա ճիշտ ու սխալ, չկան ճիշտ ու սխալ պատասխաններ:

(մանկավարժ եմ, պահպանողական եմ և այլն): Յուրաքանչյուր անհատի մոտ ինքնության բոլոր մակարդակները չեն կարող նույն չափով կարևորվել, ինքնությունների կարևորության աստիճանը փոխվում է միջավայրից միջավայր, իրավիճակից իրավիճակ: Երբ խոսքը գնում է միջազգային հարաբերությունների մակարդակում ինքնության տեղորոշման մասին, ապա պետության դեկավարը/ները, էլիտան կարող է խիստ կարևորություն տալ լոկ ազգային կամ պետական ինքնությանը, կարող է կարևորություն տալ ազգային/պետական և քաղաքակրթական ինքնությանը հավասարաշափ (հավասարաշափ և գերմանացի եմ և եվրոպացի), կարող է կարևորել նաև համամարդկային ինքնությունը: Կոնստրուկտիվսիստները անարխիայի մասին դատողություններ անում են՝ հենց ենելով դեկավարի, էլիտայի ինքնության ընկալման, գիտակցման ձևից:

Հանձնարարվող գրականություն

1. Robert Garner, Peter Ferdinand & Stephanie Lawson, *Introduction to politics*, Oxford University Press, 2009, pp. 372-74
2. Scott Burchill, Andrew Linklater, Richard Devetak, Jack Donnelly, Matthew Paterson, Christian Reus-Smith and Jacqui True, “Theories of International Relations”, 3rd edition, Palgrave Macmillan, New York, 2005, pp. 188-212
3. International Relations Theory for the 21st century, An Introduction, edited by Martin Griffiths, Routledge, London-NY, 2007, pp. 60-74
4. Ole Holsti, Theories of International Relations, Essay, pp. 18-20
5. Cynthia Weber, *International Relations Theory: A Critical Introduction*, 2nd edition, Routledge, NY-London, 2005, pp. 59-80
6. Alexander Wendt, *Social Theory of International Politics*, Cambridge University Press, 1999

Դասախոսություն 7

Միջազգային հարաբերությունների տեսությունները «գործողության մեջ»:

Ծոցի պատերազմը՝ որպես դեպքային ուսումնասիրություն

1990-91 թթ. Պարսից ծոցում ռազմաքաղաքական իրադրության զարգացումները և դրանց զագաթնակետը՝ Ծոցի պատերազմը («Անապատահողմը»), բավականին ուսանելի, ընդունված և հարմար մոդել է միջազգային հարաբերությունների տեսությունները փորձաքննելու, «գործողության մեջ դնելու» (putting theory in action) իմաստով։ Ինչպես արդեն տեղյալ ենք նախորդ դասախոսություններից, այդ տեսությունները, կապված այն հարցի հետ, թե ովքեր են միջազգային հարաբերությունների կարևորագույն, սկզբնական դերակատարները, տարրեր նախընտրություններ ունեն միևնույն երևույթն ու գործընթացն ուսումնասիրելու, վերլուծելու տեսանկյունից։

Այսպես, լիբերալները Ծոցի պատերազմի բռնկման հարցի շուրջ դիտարկումներ կատարելիս **նախևառաջ** կկենտրոնանան Սադրամ Հուսեյնի կողմից իրավիճակն ադեկվատ չընկալելու, միջազգային հանրությանը թերագնահատելու վրա։ Այսինքն, իրադրության սրումն ու պատերազմի բռնկումն առաջին հերթին կկապեն Սադրամ Հուսեյնի անձնական հատկանիշների՝ պետական քաղաքականության մեջ գործադրման հետ։ Քուվեյթի տարածքի զավթումը լիբերալները կվերագրեն Հուսեյնի այն մտայնությանը, որ ազրէսիվ այդ արարքով Հուսեյնը ձգտում էր, տեր կանգնելով Քուվեյթի նավթային ռեսուրսներին, բարելավել 1980-88 թթ. իրաք-իրանյան պատերազմի հետևանքով Իրաքի վատթարացած սոցիալ-տնտեսական աղքատ պայմանները։ **Երկրորդ**՝ լիբերալները առանձնիատուկ կընդգծեն միջազգային հանրության կազմակերպվելու, միասնաբար ազրեսորին հակահարվածելու, հավաքական անվտանգու-

թյան գիտակցմամբ ու ոգով առաջնորդվելու հանգամանքը (չէ՝ որ եթե այդ հանրությունն օժտված չլիներ նշված գիտակցմամբ, հասուն դիրքորոշմամբ, ոգով, ապա հակահրաքյան ռազմական գործողությունները տեղի չեն ունենա): Լիբերալներն այս առնչությամբ կմատնանշեն, հատկապես **ՄԱԿ-ի մանդատի ներքո**, հակահրաքյան կոալիցիայի ձևավորման հանգամանքը՝ որպես հիմնավորում լիբերալ այն կանխադրությի, թե միջազգային կազմակերպությունների ամրապնդմանը, նրանց ազդեցության ընդլայնմանը գուզընթաց, նրանք, պետությունների կողքին, դառնում են միջազգային հարաբերությունների սկզբնական դերակատարներ՝ երբեմն կարողանալով ուղղորդել կամ սահմանափակել պետությունների՝ գուտ սեփական շահի վրա հիմնված վարքագծերը:

Ուսալիստներն առաջին հերթին կրնդեն ոչ թե անհատի հատկանիշների հանգամանքը, այլ միջազգային հարաբերությունների անարխիկ բնույթի (միջազգային ասպարեզում լեզիտիմ իշխանական կառույցի բացակայություն)՝ պետություններին հատուկ վարքագիծ պարտադրելու հանգամանքը: Այսպես, միջազգային անարխիկ համակարգը պարտադրեց, որ Իրաքը, առաջնորդվելով ինքնօգնության սկզբունքով, իր անվտանգության հարցի լուծումը տեսնի Քուվեյթի տարածքի, մասնավորապես, նրա նավթային ռեսուրսների բռնազավթման մեջ (հատկապես կապված այն հանգամանքի հետ, որ Քուվեյթը հրաժարվում էր Իրաքին այդքան անհրաժեշտ նավթը կանոնավոր կերպով մատակարարել): ԱՄՆ-ի պատասխանը (որպես կոալիցիան կազմակերպող, առաջնորդող ու ռազմական գործողություններում ամենամեծ ներդրումն ունեցող պետություն), ըստ ուշալիստների, դարձյալ պայմանավորված էր միջազգային անարխիկ համակարգի պարտադրանքի հետևանքով սեփական շահերով առաջնորդվելու ռացիոնալ մտայնությամբ: Միացյալ Նահանգների շահը պահանջում էր վերահսկել Մերձավոր Արևելքի, մասնավորապես Քուվեյթի, նավթի արդյունահանման ու արտահանման գործընթացը՝ թույլ չտալով, որ այդ վերահսկողությունը հայտնվի Իրաքի

պես ԱՄՆ-ին հակադրվող պետության ձեռքին: Քուվեյթի զալթման նկատմամբ թողտվությունը կնշանակեր հիանալի նախադեպ Իրաքի համար՝ նավթառատ այլ տարածքներ հետագայում զավթելու առումով, ինչը միանգամայն ԱՄՆ-ի շահերին հակասող նշանակություն ուներ: Հետեւապես, ԱՄՆ-ն ջանում էր այլ պետություններին համոզել (պետություններ, որոնք դարձան կոալիցիայի անդամ), որ իրենց շահերից ևս բխում է Իրաքին հարվածելը: Ինչպես տեսնում ենք, այս փոքրիկ պատմության վերաբերյալ դատողություններ անելիս ռեալիստական վերլուծության բազան հիմնվում է «անարխիկ համակարգ», «ազգային շահ», «ազգային անվտանգություն» տերմինների վրա:

Ռադիկալները ռեալիստների նման վերլուծության ֆոկուսում կպահեն միջազգային համակարգը, սակայն նրանք կոնֆլիկտի առաջացումը կպատճառաբանեն ոչ թե այդ համակարգի անարխիկ բնույթով, որին նրանք չեն հավատում, այլ ընդհակառակը, կոնֆլիկտի պատճառը կփնտրեն համակարգի խիստ հիերարխիկ, շահագործողական բնույթի ու կառուցվածքի մեջ: Հստ ռադիկալների՝ այդ կառուցվածքը ժամանակին գրյություն ունեցած միջազգային հարաբերությունների գաղութային համակարգի ժառանգությունն է: Միջազգային հիերարխիկ-ստրատիֆիկացիոն համակարգի բաղկացուցիչ մասերից է նաև Մերձավոր Արևելք՝ իր տարածաշրջանային ու արտաքին դերակատարներով հանդերձ (տարածաշրջանային դերակատարներ – Իրաք, Իրան, Սաուդյան Արաբիա և այլն, արտաքին դերակատարներ – ԽՍՀՄ, ԱՄՆ, տնտեսապես ու ռազմաքաղաքականապես այլ հզոր պետություններ (Ճապոնիա, Մեծ Բրիտանիա, Ֆրանսիա) և այլն): Քանզի ռադիկալիզմն ընդունում է, որ միջազգային հարաբերություններում սկզբնական դերակատար հանդիսանում է բիզնես կլիտան (և՝ պետության մասշտաբով, և՝ միջազգային մասշտաբով), և որ պետությունների միջազգային վարքագծի հիմքում այդ բիզնես կլիտայի տնտեսական շահն է (վարքագծը պայմանավորված է տնտեսական շահերով), ուստի Ծոցի պատերազմը,

ըստ նրանց, հետևանքն էր Արևմուտքի բիզնես էլիտայի կողմից իր տնտեսական (նավթային) շահերն առաջ մղելուն և պաշտպանելուն ուղղված գործունեության: Եթե նախկինում բուրժուական/բիզնես իմպերիալիզմն իրականացվում էր պետությունների կողմից, պետական միջոցներով, ապա այժմ իմպերիալիզմն իրականացվում է բազմազգ կորպորացիաների միջոցով. վերջիններս են ստիպում իրենց պետություններին՝ իրենց տնտեսական շահերին համահունչ քաղաքականություն իրականացնել: Այսպիսով, նավթի արդյունահանմամբ ու արտահանմամբ զբաղվող միջազգային կորպորացիաները, որոնց շահերին խիստ հակասում էր Իրաքի կողմից նավթառատ Քուվեյթի բոնազավթումն ու Քուվեյթի նավթի միանձնյա տնօրինումը, ստիպեցին իրենց համապատասխան պետություններին ռազմական գործողությունների միջոցով վերադարձնել իրենց քուվեյթյան նավթը:

Կոնստրուկտիվիզմը Ծոցի պատերազմը մեկնաբանում է որպես կոնֆլիկտ երկու տարաբնույթ ինքնություններ ունեցող, ինքնություններով օժտված էլիտաների միջև (ավելին՝ նույնիսկ որպես կոնֆլիկտ հենց ինքնությունների միջև): Էլիտաների այդ ինքնություններն են. մի կողմից պանարաբիզմը (կամ արաբական աշխարհը), երբ էլիտայի համար ինքնության տեղորոշման ամենակարևոր շրջանակը համարվում է արաբ ազգը, դրան պատկանելը, ուստի և արաբների համախմբումը զերադասվում է պետական ինքնիշխանությունից, ինքը պանարաբիզմն է ենթադրում, որ արաբական բոլոր պետությունները (Իրաք, Քուվեյթ, Սիրիա, Եգիպտոս, Սաուդյան Արաբիա և այլն) ստիպված են հրաժարվել պետական ինքնիշխանությունից հանուն համարաբական մի հզոր միավորման), մյուս կողմից պետական ինքնիշխանության կամ պետական նացիոնալիզմի ինքնությունը (երբ էլիտայի համար ամենակարևորը սեփական պետության ինքնիշխանության պահպանումն է, ամենին էլ կարևորություն չի տրվում նրան, որ նույն ազգից բազմաթիվ պետություններ կան և որ կարելի է, ի հաշիվ ինքնիշխանության,

համախմբման միջոցով լուծել համարաբական կարևորության, մասշտաբի խնդիրներ): Այսպիսով, պանարաբիզմի ինքնություն ունեցող էլիտաները գտնում են, որ պանարաբիզմի գաղափարի իրականացմամբ է կարելի արդյունավետորեն լուծել անվտանգության ու բարեկեցության հետ կապված խնդիրները, մինչդեռ պետական ինքնիշխանության ինքնությամբ օժտված էլիտաների համար նույն խնդիրի լուծման կարևորագույն նախապայմանը պետական ինքնիշխանության պահպանումն ու ամրապնդումն է, անթույլատրելի է համարվում այլ պետության կողմից, թեկուզ և ազգակից, քո պետության ներքին գործերին միջամտելը: Հատկանշական է, որ այս երկու ինքնությունների հակադրությունը մինչ օրս էլ բնորոշ է արարական աշխարհին:

Ինչ վերաբերում է Ծոցի պատերազմին, ապա, ըստ կոնստրուկտիվիստների, Սադրամ Չուսեյնի ու նրա խոհակիցների սխալը նրանում էր, որ նրանք, օրինակ, Սաուդյան Արաբիային ընկալել էին իրքև պանարաբիզմի ինքնություն ունեցող պետություն (ըստ այդմ էլ ակնկալել էին, որ Սաուդյան Արաբիան ըմբռնումով կմոտենա Իրաքի կողմից Քուվեյթի նվաճման փաստին, երբեք թույլ չի տա, որ ԱՄՆ-ը իր տարածքում գործեր տեղակայի Իրաքի դեմ պատերազմելու համար), մինչդեռ իրականում Սաուդյան Արաբիայի էլիտան փաստորեն ավելի շատ կրում էր պետական ինքնություն: Սադրամ Չուսեյնի կարծիքով՝ ինքը միավորում էր արաբական աշխարհի մի մասը և նա չէր էլ ակնկալում նման հումկու դիմակայություն հենց արաբական երկրի կողմից: Եթե նա հստակ պատկերացում ունենար Սաուդյան Արաբիայի էլիտայի իրական ինքնության մասին, միզուցե չդիմեր էլ Քուվեյթի նվաճման քայլին: Այսպիսով, ըստ կոնստրուկտիվիզմի, Ծոցի պատերազմի բռնկման գործում մեծ դեր է խաղացել ինքնությունների կոնֆլիկտի հանգամանքը:

Դասախոսություն 8

Միջազգային համակարգը (միջազգային հարաբերությունների համակարգը)

Համակարգը փոխկապակցված տարրերի կայուն ամրողություն է: Փոխկապակցվածության հանգամանքը տարրերի այդ ամրողությունը վերածում է ամրողականության: Համակարգի բոլոր տարրերը փոխկապակցված և փոխդասավորված են: Ցուրաքանչյուրն ունի իր ուրույն կարգավիճակն ու դերը համակարգում և գունվում է համակարգի հիերարխիկ կառուցվածքում: Շրջակա միջավայրի հետ փոխազդող համակարգերը կոչվում են «քաց» համակարգեր: Այն պատճառով, որ համակարգի մասերը մշտապես փոխկապակցված են, համակարգի մի մասի հետ կատարվող փոփոխությունը փոփոխություն է առաջացնում մյուսների մոտ ևս: Միջազգային հարաբերությունների գիտության բնագավառում 1950-ական թթ. քաղաքական ռեալիզմի դիրքերի ամրապնդումը գիտնականներին դրդեց միջազգային քաղաքականությունը դիտարկել որպես համակարգ: Ընդ որում, համակարգի տարրեր սկսեցին դիտարկվել պետությունները:

Միջազգային համակարգը՝ ըստ լիբերալների

Լիբերալները միջազգային համակարգի՝ որպես առանձին ուժի դերին ու նշանակությանն այնքան կարևորություն չեն տալիս, որքան տալիս են ռեալիստները: Միջազգային համակարգի երևույթի և հասկացության վերաբերյալ լիբերալների մոտ առկա են հայեցակարգային 3 մոտեցումներ, մեկնաբանություններ:

Ըստ 1-ին հայեցակարգի՝ միջազգային համակարգը դիտարկվում է ոչ որպես կառուցվածք, այլ որպես գործընթաց, այսինքն միջազգային համակարգն իրենից ներկայացնում է տարրեր տարրերի միջև բազմաբնույթ փոխազդեցությունների ամրողություն:

Այս գործնթացում ներգրավված դերակատարների շրջանակն ընդգրկում է ինչպես պետություններին, այնպես էլ միջազգային կառավարական և ոչ կառավարական կազմակերպություններին, բազմազգ կորպորացիաներին, ներպետական մասշտաբի դերակատարներին (բյուրոկրատիաներ, պառլամենտներ և այլն): *Ոռքերու Կոհենը և Զողեֆ Նայր* միջազգային համակարգը բնութագրում են որպես փոխկախված, փոխկապակցված համակարգ, որի տարրերը խիստ զգայուն են միմյանց հանդեպ և խոցելի միմյանց գործողություններից: Դերակատարները հիմնականում խուսափում են ռազմական ուժի օգտագործումից:

2-րդ հայեցակարգի համաձայն, որը բխում է միջազգային հարաբերությունների անզիական դպրոցի համոզմունքներից, միջազգային համակարգը բնորոշվում է որպես «միջազգային հասարակություն»: Ըստ 2-րդ հայեցակարգի (*Հեղիի Բոլ և Աղամ Ռուտուն*), եթե միջազգային համակարգն անկախ քաղաքական հանրությունների համախումը է, ապա միջազգային հասարակությունն ավելին է քան այդ համախումը: Միջազգային հասարակությունում բոլոր դերակատարները ենթարկվում են համընդհանուր կանոնների, գործում են համընդհանուր ինստիտուտների ենթադատության ներքո և ճանաչում, ընդունում են համընդհանուր (փոխադարձ) շահերը: Միջազգային հասարակության անդամները միասնական ինքնություն ունեն, նրանք միմյանց համար յուրային են. առանց նման ինքնության հասարակությունը գոյություն ունենալ չի կարող: Նման համակարգը հիմնված է նորմատիվային հիմքերի վրա:

Միջազգային համակարգի մասին 3-րդ հայեցակարգը բխում է նեղիբերալ ինստիտուցիոնալիզմի սկզբունքներից: Նեղիբերալ ինստիտուցիոնալիստները թեև համարում են, որ միջազգային համակարգն անարխիկ է, որում յուրաքանչյուր պետություն գործում է ըստ իր սեփական շահերի, սակայն ի տարբերություն շատ ռեալիստների, նրանք տարբեր դերակատարների միջև առկա փոխարաբերությունները համարում են դրական արդյունքով հեռանկար

ունեցող փոխհարաբերություններ: Նրանք համարում են, որ այդ փոխհարաբերությունների արդյունքում ստեղծվող ինստիտուտները շրջանցում են պետությունների սեփական, եսասիրական շահերի շրջանակը: Այդ ինստիտուտները ստեղծված են պետությունների վարքագիծը վերահսկելու, չափավորեցնելու համար: Լիբերալները ողջունում են միջազգային համակարգում տեղի ունեցող փոփոխությունները: Ընդ որում, փոփոխությունները տարաբնույթ են, և տարբեր պատճառներ են թաքնված դրանց ետևում: Այսպես օրինակ, միջազգային համակարգի փոփոխության պատճառներից մեկը տեխնոլոգիական զարգացումն է. այս գործընթացը չի ենթարկվում դերակատարների կամքին, հսկողությանը: Հաղորդակցման, տրանսպորտի ոլորտներում առկա էվոլյուցիոն տեղաշարժերի հետևանքով մեծանում է համակարգի բաղադրամասերի միջև փոփոխականացությունը: Միջազգային համակարգի փոփոխությունները կարող են հանդիսանալ միջազգային օրակարգի փոփոխության հետևանքը: Եթե ռեալիստները համարում են, որ անվտանգության հարցն է միջազգային օրակարգի կարևորագույն խնդիրը և այն անփոփոխելի է, ապա լիբերալ մտածողության համաձայն, օրինակ՝ 20-րդ դարավերջին օրակարգի կարևորագույն հարց հանդիսանում էին տնտեսական հիմնախնդիրները, իսկ 21-րդ դարում՝ մարդու իրավունքներին և շրջակա միջավայրին առնչվող խնդիրները:

Միջազգային համակարգը՝ ըստ ռեալիստների

Միջազգային համակարգի էլության, դրա բնութագրիչների վերաբերյալ ռեալիստների տեսակետները բավականին հստակ են և հիմնված են հարուստ գիտական ավանդությունների վրա: Բոլոր ռեալիստները միջազգային համակարգը բնորոշում են որպես անարխիկ: Զկա ոչ մի իշխանություն, որը վեր է կանգնած պետությունից. պետությունն ինքնիշխան է: Աշխարհակարգի նման անարխիկ կառուցվածքն է ուղղորդում պետությունների լիդերներին արտաքին քաղաքականության ոլորտում որոշումներ կայացնելու հարցում,

այսինքն՝ այդ լիդերները որոշում կայացնելիս անպայմանորեն հաշվի են առնում համակարգի կառուցվածքային առանձնահատկությունները: Ուեալիստների շրջանում տարբերվող, հակասական տեսակետներ գոյություն ունեն պետություն-միջազգային համակարգ փոխհարաբերությունների, մասնավորապես միջազգային համակարգում պետության ինքնավարության աստիճանի (միջազգային համակարգից պետության կախվածության աստիճանի) վերաբերյալ: Դասական ռեալիստները համակարգն ածանցում են պետություններից, այսինքն, համակարգի կառուցվածքային առանձնահատկությունները պայմանավորում են պետությունների գործելակերպը, մինչդեռ նեռուեալիստները, ընդհակառակը, պետությունների վարքագիծն են ածանցում համակարգի կառուցվածքից, այսինքն, գտնում են, որ պետությունների գործելակերպը թելաղըրպում է համակարգի կողմից:

Համակարգի բնեոայնությունը

Միջազգային համակարգի բնեոայնության հիմնահարցը առանձնակի ուսումնասիրության առարկա է ռեալիստների համար, քանզի բնեոայնության երևույթն իրավիճակ է, երբ մեկ կամ մեկից ավելի դերակատարների կողմից ներհամակարգային հարաբերություններում առկա է գերիշխանություն մյուս դերակատարների հանդեպ: Ըստ բնեոայնության հայտանիշի՝ համակարգերը լինում են միարեւո, երկրսեռ և բազմաբնեռ:

ԽՍՀՄ-ի փլուզումից հետո միջազգային հարաբերությունների տեսաբանների մտահոգության առարկա դարձավ այն հարցը, որ աշխարհակարգը դառնում է միարեւո և որ ԱՄՆ-ին հակաշիռ ուժ չկա: 1950-60-ական թվականները ընդգծված երկրսեռ աշխարհակարգի ժամանակաշրջան էր: Մի բնեոր գլխավորվում էր ԱՄՆ-ի կողմից, որում ընդգրկված էին ՆԱՏՕ-ի անդամ պետություններն ու Ճապոնիան, իսկ ԽՍՀՄ-ի կողմից գլխավորվող մյուս բնեոում ընդգրկված էին Չինաստանն ու Վարչավյան պակտի երկրները: 1970-ականների կեսերից երկրսեռայնությունն սկսեց երերալ, քանզի

արևմտյան քնեռում Ֆրանսիան, արևելյան քնեռում Չինաստանը սկսեցին ինքնուրույն քաղաքականությամբ հանդես գալ:

Եթե միջազգային համակարգում երկուսից ավելի ազդեցիկ դերակատարներ են հանդես գալիս, ապա համակարգը կոչվում է բազմաբևեռ: Բազմաբևեռ համակարգը հաճախ անվանում են ուժերի հավասարակշռության համակարգ (Balance of power system): Ուժերի հավասարակշռության դասական մոդելի համակարգը ենթադրում է՝ առաջին՝ մասնակիցները բացառապես պետություններն են, երկրորդ՝ առնվազն 5 մասնակից, 5 քետը պետք է լինի: 19-րդ դարի ուժային հավասարակշռության համակարգը (Անգլիա, Ֆրանսիա, Ավստրիա, Ռուսաստան, Պրուսիա) բազմաբևեռության դասական օրինակ է: Այստեղ համակարգը կառուցվում էր հետևյալ տրամաբանությամբ. 2 քետը հակակշռում էին մյուս երկու քետուն, իսկ 5-րդը (սովորաբար Անգլիան էր) հանդիսանում էր արքիտր, *հավասարակշռող քնեռ* (balancer):

Ուժային հավասարակշռության համակարգում մասնակիցներն ընդունում են համակարգի կառուցվածքի կայունությունն ապահովող, համակարգաստեղծ նորմերը և առաջնորդվում են դրանցով: Այդ նորմերն են.

- Հեգեմոնիայի (գերիշխանության) ձգտող ցանկացած քնեռի մյուս քնեռների կողմից անպայմանորեն պիտի հակահարված տրվի:
- Պետություններն ավելացնում են իրենց հզորությունը՝ տարածքներ ձեռք բերելով, բնակչության շատանալով և տնտեսապես զարգանալով:
- Կոնֆլիկտային իրավիճակներում բանակցությունների միջոցով հարցը լուծելը նախընտրելի է ուղղական մեթոդներով հարցը լուծելուց:
- Այսուհանդերձ, հզորությունն ավելացնելու նպատակով պատերազմելն ավելի լավ է, քան ոչինչ չձեռնարկելն ու արդյունքում հզորություն չավելացնելը:

- Այլ պետությունները դիտվում են որպես դաշնակիցներ կամ հակառակորդներ:
- Պետություններն առաջնորդվում են իրենց սեփական շահերով, որոնք բնորոշվում են իշխանության հաստատման հրամայականով, այսինքն, պետության շահը գերիշխանություն ձեռք բերելն է այլ պետությունների հանդեպ:

Եթե բազմաքևեռ համակարգի որևէ դերակատար չհետևի այս կանոններին, ապա ուժային հավասարակշռության համակարգը կարող է ապակայունանալ:

Եթե համակարգի կարևոր դերակատարների թիվը նվազի, հասնի նվազագույնի՝ դառնա 3, համակարգի կայունությունը կդրվի սպառնալիքի տակ, քանզի նրանցից երկուսի միջև կոալիցիայի պարագայում երրորդ դերակատարը հայտնվում է միայնակի և թույլի վիճակում:

Այլ են երկրքեռ համակարգին բնորոշ դերակատարների վարքագծի նորմերը.

- Յուրաքանչյուր քևեռ (լինի դա պետություն թե դաշինք) ձբգտում է տապալել, քևեռի կարգավիճակից զրկել իր հակառակորդին:
- Երկրքեռ համակարգի պայմաններում դաշինքները հակված են ավելի հարատև լինել, դաշինքները հիմնված են հարաբերականորեն երկարատև, անփոփոխ շահերի վրա:
- Կոշտ երկրքեռ համակարգում միջազգային կազմակերպությունները որպես միջազգային քաղաքականության սույնեկտ կամ չեն ձևավորվում, կամ ել անարդյունավետ են գործում (օրինակ՝ ՄԱԿ-ը Սառը պատերազմի ժամանակ): Թույլ (մեղմ) երկրքեռ համակարգի պայմաններում միջազգային կազմակերպությունները կարող են զարգանալ և ստանձնել 2 դաշինքների միջև միջնորդի դերը:

Ուսալիստների քննարկման կիզակետում մշտապես առկա է եղել այն հարցը, թե քևեռայնության ո՞ր ձևի դեպքում են պատերազմներն առավել հավանական կամ անհավանական: Քեննեթ

Ուոլցը պնդում է, որ երկարաժամկետ հեռանկարում երկրսեռ համակարգն ամենակայունն է: Ըստ նրա՝ կողմերն ի վիճակի են նվազագույնի հասցնել միմյանց բռնություն առաջ բերող վարքագծերը: Երկրսեռությունը ենթադրում է, որ 2 քսեռները շատ ավելի հզոր են մյուսներից (բոլորին միասին վերցրած): Ուժերի այս դիսպարիտետը (քսեռ-ոչ քսեռ հարաբերություններում) հնարավորություն է տալիս իրենց ուշադրությունը զիսավորապես կենտրոնացնել մեկը մյուսի վրա, հակազդել մյուսի գործողություններին, կանխամտածել իր պատասխան քայլերը՝ հաշվի առնելով երկրսեռության համատեղ անցյալն ու իրենց փոխհարաբերությունների ներկա բնույթը: Յուրաքանչյուրը ձգտում է պահպանել նման ուժային հավասարակշռությունը, որպեսզի պահպանի ինքն իրեն: Զարգացնելով Ուոլցի դրույթները՝ իր հայտնի «Դարձ դեպի ապագա. անկայուն Եվրոպան Սառը պատերազմից հետո» (“Back to the Future: Instability in Europe after the Cold War”) հոդվածում Զոն Միջայմերը նշել է, որ երկրսեռության փլուզմամբ աշխարհը զրկվելու է այդ համակարգի արդյունքը հանդիսացող կայունությունից և կանխատեսելիությունից: Կոնֆլիկտները, պատերազմները կաձեն թվաքանակով ու մասշտաբայնությամբ:

Տեսականորեն համակարգի կայունության կարգավորիչ մեխանիզմն ավելի հեշտ կգործի բազմաթեր (ուժային հավասարակշռության) համակարգի պայմաններում. Առնվազն այն պատճառով, որ այստեղ առկա է հավասարակշռություն ապահովելու գործառույթ ստանձնած դերակատարը (the balancer), ինչպես օրինակ Անգլիան 19-րդ դարում: Բազմաթեր համակարգում երկու դերակատարների խիստ մերձեցումը, օրինակ, կարելի է չեզոքացնել մյուս 2-ի կամ 3-ի մերձեցմամբ:

Միարեն համակարգի կողմնակիցներն ել գտնում են, որ միարեն համակարգը կայունության տեսանկյունից ամենաարդյունավետն է: Կայունությունը հարատև է, եթե մեկ սուրյեկտ հեգեմոն է, վերահսկում է մյուս բոլորին: Փոլ Քենեդին, օրինակ, 19-րդ դարը

համարելով Անգլիայի հեգեմոնիայի, իսկ 2-րդ աշխարհամարտին հաջորդած ժամանակաշրջանը ԱՄՆ-ի հեգեմոնիայի ժամանակաշրջան, ասում է, որ այս երկու ժամանակաշրջաններում էլ աշխարհը առավել երկարատև խաղաղություն է վայելել:

Կոհենը գտնում է, որ հեգեմոնն ամեն ջանք ներդնում է միաբնեուայնությունը երկարատև դարձնելու համար, իսկ եթե այդ բնեոր կորցնում է իշխանությունը մյուսի հանդեպ, ապա համակարգը հայտնվում է վտանգի առջև:

Ստրատիֆիկացիան (Խորականությունը)

Միջազգային համակարգի կառուցվածքը, ըստ ռեալիստների, բնութագրվում է ինչպես բնեուայնությամբ, այնպես էլ ստրատիֆիկացիայով: Ստրատիֆիկացիայի անվան տակ հասկացվում է պետությունների հնարավորությունների տարրերությունները (տարրեր հնարավորությունները)` տիրապետելու կենսական կարևորություն ունեցող այն ռեսուրսներին, որոնք կարող են օգտագործվել իշխանության համար պայքարում: Ստրատիֆիկացիայի հանգամանքին մեծ ուշադրություն են դարձնում նաև ռադիկալները, սակայն այս հանգամանքը ռեալիստական մտածողության մեջ ևս արմատավորված է:

Դատմության մեջ եղած միջազգային տարրեր համակարգերի բնորոշ է եղել ստրատիֆիկացիայի տարրեր աստիճաններ, տարրեր վիճակներ: Ներկայիս միջազգային համակարգին բնորոշ է ստրատիֆիկացիայի բարձր աստիճան: Մեծ ութնյակի երկրները (ԱՄՆ, Ճապոնիա, Չինաստան, Գերմանիա, Ֆրանսիա, Բրիտանիա և Ռուսաստան) տիրապետում են ավելի շատ ռեսուրսների, քան աշխարհի մնացած մոտ 2 հարյուր երկրները միասին վերցրած: Ռեսուրսների տիրապետելու հանգամանքի հայտանիշով էլ այժմ պետությունների մի մասը դասվում է «ունեորների» (haves), մյուս մասը՝ «չունեորների» (have-nots) դասին: Ունեորներին հաճախ տրվում է Հյուսիս, չունեորներին՝ Հարավ ընդհանրական բնորոշումները (Ելնելով այն հանգամանքից, որ հարուստ, բարձր կենսամակարդակ

ունեցող պետությունները հիմնականում տեղակայված են Երկրագնդի հյուսիսային հատվածներում, ավելի աղքատները՝ հարավային): Այս դասակարգումը կարևորվում է միջազգային քաղաքատնտեսության դիմումների մեջ ուղղակի մասնակցությունը:

Ուսուրաների տիրապետման հարցում խորականության հանգամանքը կարևորվում է միջազգային համակարգի կայունության, ինքնակարգավորման տեսանկյունից: Եթե առկա է մեկ կամ մի քանի համեմատաբար ունակ, հզոր պետության կողմից ստրատիֆիկացիայի վիճակը փոխելու ռեալ և լուրջ հնարավորություն, ապա կարող ենք մտածել միջազգային համակարգի հնարավոր վերափոխման մասին. Գերմանիայի՝ գաղութատեր դառնալու, այսինքն՝ ուսուրաների տիրապետման առումով համաշխարհային խորական վիճակը փոփոխելու ձգտումն ու քայլերն ի վերջո խաթարեցին համակարգի կայունությունը:

Միջազգային համակարգի վերափոխումների պատճառները՝ ըստ ռեալիստների

Հստ ռեալիստների՝ 3 տիպի գործոններ կարող են պայմանավորել համակարգի վերափոխումը. 1. դերակատարների փոփոխություն, ինչը նշանակում է նրանց ուժերի հարաբերակցության փոփոխություն, 2. համակարգաստեղծ կամ համակարգի գոյության հիմքում ընկած նորմերի փոփոխություն, 3. համակարգի վերափոխում՝ պայմանավորված արտաքին գործոնի ազդեցությամբ:

Այսպես, համակարգը կարող է վերափոխվել՝ պայմանավորված կամ համակարգի գլխավոր դերակատարների թվի աճով, կամ նվազմամբ, կամ այդ դերակատարների միջև ուժերի հարաբերակցության փոփոխությամբ (ինչը տեղի է ունենում, եթե համակարգի 1 կամ ավելի դերակատարի/ների հզորությունն ավելանում կամ պակասում է): Նման կարգի վերափոխումները, որպես կանոն, տեղի են ունենում պատերազմների արդյունքում: Այսպես օրինակ՝ Երկրորդ համաշխարհային պատերազմի ավարտի շրջանում և դրանից

հետո խիստ նվազեց Մեծ Բրիտանիայի և Ֆրանսիայի հզորությունը, թեև այդ պետությունները պատերազմում հաղթող էին: Պատերազմը վերջ դրեց Գերմանիայի և Ճապոնիայի ինչպես իմպերիալիստական նկրտումներին, այնպես էլ նրանց երբեմնի ազգային հզորությանը: ԱԱՆ-ը և Խորհրդային Միությունը, որոնք նախկինում չէին հանդիսանում միջազգային համակարգի այնքան հզոր դերակատարներ, ինչպես օրինակ՝ Մեծ Բրիտանիան ու Ֆրանսիան էին, պատերազմից հետո դարձան համակարգի գերակշիռ ուժերը: Միջազգային համակարգի բնեուայնության ձևը փոխվեց. բազմաքետ համակարգը վերածվեց երկրսերի:

Նեռուեալիզմի խոշոր ներկայացուցիչ Ռոբերտ Գիլփինը իր «Պատերազմը և փոփոխությունները համաշխարհային քաղաքականության մեջ» աշխատությունում փաստարկում է, որ միջազգային համակարգը կարող է վերափոխվել պետությունների՝ իրենց ազգային շահերի իրացմանն ուղղված նպատակասլաց քաղաքականություն վարելու արդյունքում:

Համակարգի սոցիալական նորմերի փոփոխությունը կարող է ֆունդամենտալ փոփոխություններ առաջ բերել համակարգում: Ասվածը չի նշանակում, որ ցանկացած նորմի փոփոխություն կարող է փոխակերպել համակարգը, ասվածը վերաբերում է որոշ նորմերի: Այսպես, միջուկային գենքի ներմուծումը ֆունդամենտալ կերպով վերափոխեց դերակատարների միջև հարաբերությունների կանոնները: Միջուկային գենքի զապող էֆեկտը բացառեց միջազգային խոշոր դերակատարների միջև պատերազմների բռնկումը, ինչն էլ ավելի ամրապնդեց, կարծրացրեց միջազգային համակարգի երկրներու կառուցվածքը: Մեկ այլ օրինակ՝ միջազգային հարաբերությունների Վիեննայի համակարգի վերափոխումը 19-րդ դարի կեսերին, ի թիվս այլ պատճառների, պայմանավորված էր նաև դերակատարների կողմից համակարգի գաղափարաբանական գլխավոր նորմի՝ «Լեգիտիմիզմի» սկզբունքի վերանայման հետ: Վերափոխման արդյունքում համակարգը կորցրեց իր ձկունությունը, բնեուա-

ցումը սկսեց խորանալ դերակատարների միջև, ինչն արտահայտվեց հակամարտ ռազմաքաղաքական կարծր դաշինքների ձևավորմամբ:

Արտաքին միջավայրային պայմանները նույնպես ունակ են լուրջ վերափոխումների ենթարկել միջազգային համակարգը: Տեխնոլոգիաների զարգացումը, տրանսպորտային-կոմունիկացիոն ցանցի ընդլայնումն ու զարգացումը, արբանյակային համակարգերի ներդրումը և շատ այլ նմանատիպ արտաքին միջավայրային բնույթի գործոններ պայմանավորեցին մինչև 2-րդ աշխարհամարտը գոյություն ունեցող «Եվրոպենտրիկ» համակարգի (երբ Եվրոպան հանդիսանում էր համակարգի կենտրոն, առանցք, միջուկ) վերափոխումը իսկապես միջազգային համակարգի (երբ ընդլայնվեցին համակարգի աշխարհագրական սահմանները, երբ Եվրոպան սկսեց դիտարկվել որպես ենթահամակարգ, այնպես ինչպես Մերձավոր Արևելքը, Հարավային Ասիան և այլ տարածաշրջաններ):

Միջազգային համակարգը՝ ըստ ռադիկալների

Ռադիկալների պատկերացումները միջազգային համակարգի վերաբերյալ արմատապես տարբերվում են ռեալիստների պատկերացումներից: Եթե ռեալիստները կարևորում են համակարգի կայունությունը, ապա ռադիկալները կարևորում են փոփոխությունը և ձգուում դրան. եթե ռեալիստների համար կարևոր հարցը համակարգի կայունությունն ինչպես՝ պահպանելն է, ապա ռադիկալներին հուզում է «համակարգը վերափոխելն ինչու՝ է այդքան դժվար» հարցը:

Ռադիկալները միջազգային համակարգն առաջին հերթին բնութագրում են որպես ստրատիֆիկացված համակարգ: Արդյո՞ք միջազգային դերակատարների շրջանում ռեսուրսներն ու դրանց հասանելիության հնարավորությունները հավասարաշա՞փ են բաշխված. ըստ նրանց՝ միանշանակ ոչ: Արդյոք համաշխարհային ռեսուրսների գերակշիռ մասը կապիտալիստական տերությունների մի խմբի ձեռքի՞ն է, իսկ երկրների մնացած մեծ մասի հնարավորու-

թյունները սահմանափակվա՞ծ են խիստ քիչ ռեսուրսների տիրապետմամբ. անվերապահորեն՝ այս: Այս տեսանկյունից կարևորագույն հարցերից մեկն էլ այն է, թե ո՞րն է պետությունների մեջ առկա այս մեծ խտրականության պատճառը:

Մարքսիստների, ինչպես նաև այլ ռադիկալների գնահատմամբ միջազգային համակարգի այս ստրատիֆիկացված բնույթը բխում է կապիտալիզմից, կապիտալիստական տնտեսավարումից, կապիտալիստական հասարակարգից: Կապիտալիզմն ինքն է ծնում գերտերությունների կողմից թույլ, աղքատ պետությունների հանդեպ գերիշխանության պահպանման և ամրապնդման այնպիսի մեխանիզմներ, ինչպիսիք միջազգային ինստիտուտներն են, որոնց նորմերը (օրենքները, կանոնները) ստեղծվում, թելադրվում են հզոր, տնտեսապես բարգավաճ տերությունների կողմից՝ կապիտալիստական գործընթացներն ուժեղացնելու համար, այնպիսի մեխանիզմներ, ինչպիսիք բազմազգ կորպորացիաներն են, որոնց գիւտամասերը գտնվում են նույն այդ կապիտալիստական տերությունների տարածքում, բայց որոնց գործունեությունը գերազանցապես ծավալվում է կախվածության մեջ գտնվող, թույլ երկրներում: Կապիտալիստական միջազգային շահագործողական գործառույթ են իրականացնում նաև թույլ երկրների բուրժուական վերնախավերը, ովքեր հաճախ տիրապետում են այդ երկրների քաղաքական իշխանությանը և այդպիսով իրենց երկրները, հանուն սեփական տնտեսական շահի, դնում են հզորներից մշտական կախվածության մեջ:

Ռադիկալները միջազգային տնտեսական հարաբերությունների ձևերի արմատական վերափոխումներ են պահանջում: Նրանց կարծիքով՝ միջազգային համակարգում տեղի ունեցող գործընթացներն իրենցից կատաղի պայքար են ներկայացնում ուժեղների և թույլերի միջև: 1970 թ. տնտեսապես խիստ թույլ, աղքատ երկրները (under-dogs) հանդես եկան «Նոր միջազգային տնտեսական կարգ» ստեղծելու պահանջով, ինչը ներառում էր գերտերությունների կողմից թույլ երկրների պարտքերի չեղյալ հայտարարում, բազմազգ

կորպորացիաների նկատմամբ միջազգային վերահսկողության սահմանում, միջազգային շուկայում առաջնահերթ ապրանքների գների սահմանման ձևերի վերանայում և այլն: Նույն ժամանակահատվածում համեմատաբար ավելի բարվոք վիճակում գտնվող երկրները՝ «զարգացողները», հանդես էին գալիս առավել ռեֆորմիստական կեցվածքով՝ պահանջելով պարտքերի վերաֆինանսավորում, այլ ոչ ներում, բազմազգ կորպորացիաների նկատմամբ ոչ պարտադիր, այլ կամավորության սկզբունքով վերահսկողության իրականացում և այլն:

Այսպիսով՝ ռադիկալները աշխարհի երկրների միջև գոյություն ունեցող տնտեսական մեծ անհամաշափությունը բացատրում էն միջազգային համակարգի կառուցվածքի բնույթով: Այդ կառուցվածքն է կարգավորում, ուղղորդում, սահմանափակում միջազգային հարաբերություններում տեղի ունեցող բոլոր գործընթացները: Եթե ռեալիստների համար միջազգային համակարգի կառուցվածքի այդ պարտադրանքը դրական նշանակություն ունի, քանի որ միտված է ստատուս քվոյի պահպանմանը և հետևապես ցնցումների կանխմանը, ապա ռադիկալների համար կառուցվածքի պարտադրանքը խիստ բացասական նշանակություն ունի, քանի որ արգելակում է համակարգում հնարավոր վերափոխումները և հետևապես տնտեսական զարգացումները: Հատ Իմանուել Վալերշտայնի՝ միջազգային համակարգի կառուցվածքն ինքը՝ կապիտալիզմն է, որը 16-րդ դարից սկսած, միջազգային համակարգի ամենաեական բնութագրիչն է: Միջազգային կապիտալիստական հարաբերություններն են ուղղորդում, սահմանում և սահմանափակում պետությունների վարքագիծը:

Ռադիկալների Աշխարհ-համակարգ տեսության ներկայացուցիչները հնարավոր են համարում միջազգային համակարգի անցընցում վերափոխումը. դա, ըստ նրանց, տեղի է ունենում, եթե որոշ պետություններ փոխում են իրենց կարգավիճակը պերիֆերիայից դեպի սեմիպերիֆերիա, սեմիպերիֆերիայից դեպի կենտրոն: Ժա-

մանակին Նիդերլանդներին Անգլիան զրկեց կապիտալիստական համակարգի ուժային կենտրոնի կարգավիճակից և ինքը գրավեց նրա տեղը: Անգլիային էլ նույն դերում փոխարինեց ԱՄՆ-ը: Այստեղ, իհարկե, խոսքը քանակական բնույթի վերափոխման մասին է: Իսկ այն հարցին, թե կարող է կապիտալիստական համակարգը ամրող-ջովին որակական վերափոխման ենթարկվել (նույնկերպ, ինչպես ֆեռդալական համակարգը փոխարինվեց կապիտալիստականով), ուղիկալները հաճախ հակասական պատասխաններ են տալիս: Վալերյանը, օրինակ, խիստ հոռեւտես է այս հարցում՝ մատնա-նշելով այն հանգամանքը, որ կապիտալիստական համակարգում փոփոխությունները չափազանց դանդաղ են տեղի ունենում, ինչը չի կարող ապահովել ողջ համակարգի ամրողական տրանսֆորմա-ցիա (փոխակերպում):

Հանձնարարվող գրականություն

1. Morton Kaplan, System and Process in International Politics, NY, Krieger, 1976
2. Robert Keohane and Joseph Nye, Power and Interdependence, 3rd edition, NY, Longman, 2001
3. Robert Keohane, Power and Governance in a partially globalized World, Routledge, London-NY, 2004, pp. 16-88
4. Hedley Bull and Adam Watson, eds., The Expansion of International Society, Oxford University Press, 1984
5. Kenneth Waltz, International Structure, National Force and the Balance of World Power, in Kenneth Waltz, Realism and International Politics, Routledge, NY-London, 2008, pp.137-151
6. John Mearsheimer, Back to the Future, : Instability In Europe after the Cold War, International Security, 15:1, Summer 1990,
7. Paul Kennedy, The Rise and Fall of the Great Powers: Economic Change and Military Conflict from 1500 to 2000, NY, Random House, 1987
8. Robert Gilpin, War and Change in World Politics, Cambridge University Press, 1981

Դասախոսություն 9

Միջազգային հարաբերությունների վերլուծության միավորային (պետական) մակարդակը

Ինչպես գիտենք, միջազգային հարաբերությունների վերլուծության պետական մակարդակում վերլուծության, ընդհանրացումների ու հետազոտությունների ելակետը պետության ատրիբուտիկան է, այսինքն, միջազգային հարաբերություններում տեղի ունեցող զարգացումները բացատրվում են՝ ելնելով պետության տարբեր հատկանիշներից (ինչպիսի քաղաքական համակարգ ունի, ներպետական ո՞ր դերակատարներն են առավել ազդեցիկ արտաքին քաղաքականության ոլորտում որոշումներ կայացնելու հարցում, ի՞նչպես է ձևակերպվում պետության շահը և այլն): Ի տարբերություն համակարգակենտրոն վերլուծաբանների (system-level analysts – վերլուծաբաններ, որոնք միջազգային հարաբերությունների տարբեր ասպեկտների մեկնաբանման ելակետ ընդունում են գերազանցապես միջազգային համակարգի կառուցվածքային առանձնահատկությունը), որոնք պնդում են, որ համակարգն է ստիպում/դրդում պետություններին դրսնորել այս կամ այն վարքագիծը, պետականակենտրոն վերլուծաբանները (state-level analysts) գտնում են, որ պետությունը միջազգային արենայում վարքագիծ դրսնորելու հարցում բավականին ինքնուրույն է: Իհարկե, պետականակենտրոն վերլուծաբանները անպայմանորեն հաշվի են նստում համակարգային մակարդակի իրողությունների, համակարգի կառուցվածքային առանձնահատկությունների հետ, բայց և ընդունում են այն կանխավարկածը, որ «նոյնիսկ ամենաթույլ պետությունը չի կարող միջազգային համակարգի «խամաճիկը» հանդիսանալ»:

Այսպիսով, պետական մակարդակի վերլուծությունը կենտրոնանում է այն հարցերի վրա, թե ի՞նչ են անում պետությունները և թե ինչո՞ւ և ինչպե՞ս են նրանք որոշում դա անել: Ի՞նչ են անում պետու-

թյունները հարցին պատասխանելու համար կիրառվում է իրադարձությունների փաստացի վերլուծության ձևը (event analysis), որի էլությունը է հետևյալում է. պետության կողմից կատարված մի քանի գործողություններ համադրելով, կշռադատելով դրանց հետևանքները, կատարվում է ընդհանրական եզրակացություն, թե ինչ քաղաքականություն է վարում պետությունն այս հարցում (ինչ է անում): Պետական մակարդակի վերլուծության երկրորդ թիրախն է «ինչո՞ւ և ինչպե՞ս են որոշում անել» հարցը: Իսկ այստեղ կիրառվում է որոշումների կայացման վերլուծության մոդելը (decision-making analysis), որի էլությունը որոշումների կայացման դրդապատճառների և կայացման գործընթացի վրա ազդող գործոնների համալիրի բացահայտումն է:

Պետականության չափանիշները

Որևէ սոցիալական կառույց, համակարգ որպես պետություն բնորոշվելու համար չորս հիմնական չափանիշներ պետք է բավարարի. 1. Պետությունը պետք է տարածքային հիմք, աշխարհագրորեն հաստատված սահմաններ ունենա: 2. Իր տարածքում որոշակի բնակչություն պետք է բնակվի: 3. Պետք է ունենա իշխանություն, որին ենթարկվելու է բնակչությունը: 4. Պետությունը պետք է մյուս պետությունների կողմից դե յուրէ ճանաչված լինի*:

Իհարկե, պետականության չափանիշները կարող են և բացարձակ չլինել. օրինակ՝ պետության սահմանները կարող են միջազգայնորեն ճանաչված չլինել, պետության իշխանությունը կարող է անհրաժեշտ չափով լեզիտիմություն չունենալ, բնակչությունը անհնագանդություն հայտնի իր պետական իշխանությանը, շատ պետություններ կան, որ դիվանագիտական ճանաչում կա' մ ոչ մեկի

* Ի տարբերություն դե ֆակտո ճանաչման, դե յուրէ ճանաչումն իրենից ենթադրում է դիվանագիտական հարաբերությունների հաստատում ճանաչող և ճանաչվող պետությունների միջև: Այսպես օրինակ՝ Թուրքիան Հայաստանին մինչ օրս դե յուրէ չի ճանաչել, նրանց միջև դիվանագիտական հարաբերություններ չկան:

կողմից ձեռք չեն բերել, կամ շատ քիչ պետությունների կողմից են ձեռք բերել:

Պետության հայեցակարգային մոտեցումները

Սոցիալական գիտությունների տարբեր ուղղություններ տարբեր կերպ են մեկնաբանում պետության ֆենոմենը, տարբեր կերպ են իմաստավորում և արժևորում պետության ատրիբուտները, պետականության չափանիշները: Վերը նշված 4 չափանիշները իրավական բնույթ ունեն, մինչդեռ շատ տարբեր պարադիզմաներ պետությանը վերագրում են ոչ իրավական բնույթի շատ չափանիշներ, այսինքն՝ պնդում են, որ պետություն բնորոշվելու համար քաղաքական այսինչ կառույցը պետք է բավարարի այսինչ չափանիշները ես (Վերոնշյալներից բացի): Այսպիսով, երեսան են զալիս պետության հայեցակարգային տարբեր մոտեցումներ, որոնցից 3-ը կներկայացնենք ստորև:

Պետության լիբերալ հայեցակարգային մոտեցումը

Հստ լիբերալների՝ պետությունը թեև ինքնիշխան քաղաքական միավոր է, բայց ինքնուրույն, ավտոնոմ դերակատար չի: Պետության գործառույթը (Փունկցիան) քաղաքական խաղի հիմնական կանոնների պահպանումն է, ինչը հնարավորություն է տալիս, որ ներպետական տարբեր դերակատարներ, խմբեր իրենց շահերի իրացմանն ուղղված գործունեության ընթացքում արդար և արդյունավետ մրցակցության պայմաններում գտնվեն: Ազգային շահը չի կարող բնորոշվել որպես միակ և համընդհանուր: Ազգային շահերը բազմաթիվ են: Այդ շահերը հաճախ մրցակցում են պյուրալիստական^{**} միջավայրում: Պետության ազգային շահերը փոփոխվում են՝ արտացոլելով ներպետական դերակատարների միջև ուժային, դիրքային հարաբերակցությունները կամ դրանց փոփոխությունները:

^{**} Պյուրալիզմ նշանակում է բազմակարծություն:

Պետության ռեալիստական հայեցակարգային մոտեցումը: Ռեալիստների կողմից պետության՝ որպես միասեռ օրգանիզմի, դերը միջազգային քաղաքական գործընթացներում խիստ արժնորելու պատճառով ընդունված է համարել, որ միջազգային հարաբերությունների բազում հիմնախնդիրների դիտարկման, դրանց մեկնաբանման հարցում ռեալիստները հանդես են բերում պետականակենտրոն մոտեցումներ: Նրանք պնդում են, որ պետությունը ինքնավար, ավտոնոմ դերակատար է, և որ նրա ազգային շահերից բխող նպատակավաց գործունեությունը կարող է խոչընդոտվել կամ մոդիֆիկացվել միայն միջազգային հարաբերությունների անարխիկ համակարգի կառուցվածքի պատճառով: Պետությունն օժնված է ինքնիշխանությամբ. իր սահմանների ներսում տեղի ունեցող բազմաբնույթ պրոցեսները, ծագող բազմաթիվ խնդիրները միայն պետության ենթադատությանն են պատկանում: Պետության իրավասության շրջանակներում են գտնվում անվտանգության, տնտեսության, կառավարման ոլորտի բազում հիմնախնդիրները: Միջազգային ասպարեզում պետության հետապնդած նպատակների ամբողջությունը հանգում է մի տրամաբանական վերջնակետի. դա պետության ազգային շահն է, որը բնորոշվում է որպես իշխանություն, հզորություն:

Պետության ռարիկալ հայեցակարգային մոտեցումները: Ռարիկալները առաջ են քաշում պետության երկու հայեցակարգային տեսակետ, երկու դեպքում էլ ընդգծելով պետության ձևավորման և գործառնության հարցում կապիտալիզմի և կապիտալիստական դասակարգի դերը: Ըստ առաջին տեսակետի՝ պետությունը բուժուազիայի գործակալն է, նրա ձեռքի գործիքը: 2-րդ տեսակետը պետությունը դիտարկում է որպես կապիտալիստական համակարգի կառուցվածքային տարր: Պետությունը էքսպանսիոնիստական քաղաքականություն է վարում ոչ թե բոլժուազիայի թելադրանքով, այլ այն պատճառով, որ համաշխարհային կապիտալիստական համակարգի տրամաբանությունն է մղում պետությանը դիմել էքսպան-

սիայի (պետությունը հայտնվում է մրցակցության մեջ մյուս պետությունների հետ մեկտեղ՝ «բարիքները վայելելու հարցում», և եթե նա չվարի նման քաղաքականություն, չի օգտվի այդ բարիքներից, կթուլանա պետական մեքենան՝ իրենից բխող բոլոր հետևանքներով): Երկու տեսակետներն ել չեն ընդունում ազգային շահի գաղափարը. տնտեսական շահերն են թելադրում պետության վարքագիծը: Ինքնիշխանությունը, ըստ ռադիկալների, ձևական է, քանզի պետությունը ենթարկվում է կա՛մ բուրժուազիային (1-ին տեսակետ), կա՛մ էլ կապիտալիստական համակարգի պարտադրանքին (2-րդ տեսակետ):

Լիբերալ, ռեալիստական և ռադիկալ հայեցակետերի հակադրությունը: Այս հակադրությունը կարելի է բավականին հեշտությամբ բացահայտել, եթե վերլուծության մեկնակետ վերցնենք, օրինակ, նավթը:

Այսպես, լիբերալ տեսանկյունից պետության վարքագիծը պայմանավորված է ներապետական դերակատարների շահերի պայքարով ու համաձայնեցմամբ: Սպառողները (դերակատար Ա) ձգտում են նավթի գները հնարավորինս ցածր պահել: Նավթը որպես հիմնական վառելիք օգտագործող արդյունաբերական ձեռնարկությունների տերերը (դերակատար Բ) կրկին ձգտում են հնարավորինս ցածր գնով գնել նավթը, սակայն նրանց ավելի շատ հետաքրքրում է ոչ թե նավթի գինը, այլ նավթի մատակարարումների կայունությունը, որպեսզի ձեռնարկություններն անխափան աշխատեն: Իսկ նավթ արտադրող կամ նավթ ներմուծող ընկերությունները (դերակատար Գ) ձգտում են նավթի գները բարձրացնել: Լիբերալները գտնում են, որ պետությունն ինքը ոչ մի շահագրգություն չպետք է ունենա նավթի գների հարցում. պետության ֆունկցիան պետք է լինի բոլոր դերակատարների, շահերի բոլոր խմբերի համար հավասար հնարավորությունների տրամադրումը, խաղի հստակ կանոնների պահպանումը:

Ռեալիստական հայեցակետի համաձայն՝ պետությունը նավ-թային քաղաքականությունը ծառայեցնում է իր ազգային շահերին: Պետությունը ձգում է կայունության՝ նավթի և այլ լայն սպառողական ապրանքների գների ու մատակարարումների հարցում: Օրինակ՝ ԱՄՆ-ը ձգում է երաշխավորել նավթի անվտանգ և ապահով մատակարարումը կայուն, ընդունելի գներով: Սակայն հնարավոր է նաև, որ պետությունը նպաստի նավթի գների բարձրացման գործում, եթե ազգային շահը պահանջի, որ իր նավթ արդյունահանող ձեռնարկությունները կապիտալ կուտակեն և հզորանան:

Ռադիկալ մոտեցման համաձայն՝ նավթի (ինչպես և այլ լայն սպառողական ապրանքների) քաղաքականությունը բխում է կապիտալիստական դասակարգի շահերից և արտացոլում է համաշխարհային կապիտալիստական համակարգի տրամաբանությունը: Նավթի գնի և մատակարարումների վերաբերյալ բանակցությունները ռադիկալիզմը համարում է շահագործողական, թույլ պետությունները կամ խմբերը զիշում են իրենց դիրքերն ուժեղներին: Ռադիկալ մտքի համաձայն՝ նավթով հարուստ, բայց թույլ և աղքատ երկրները (Նիգերիա, Մեքսիկա և այլն) մշտապես գործում են միջազգային նավթային ընկերությունների (որոնք սերտածած են համաշխարհային կապիտալիստական համակարգի հետ) ու հզոր, հարուստ պետությունների թելադրանքով:

Պետության հզորության/իշխանության տարրերը

Իշխանությունը պետության ամենաբնութագրական հատկանիշներից մեկն է: Այսպիսով, մենք գործ ենք ունենում իշխանության արտաքին չափման հետ (power), երբ դիտարկում ենք պետության հարաբերություններն այլ պետությունների հետ և իշխանության ներքին չափման հետ (authority, power), երբ դիտարկման օբյեկտ հանդիսանում է պետական իշխանության հարաբերությունները քաղաքական համակարգի այլ սուբյեկտների, ներպետական ակտորների հետ: «Հզորություն» եզրը օգտագործում ենք ավելի շատ

իշխանության արտաքին չափման պարագայում, «իշխանություն» և «հզորություն» հասկացությունները գրեթե նույնացնելով: Այսինքն՝ նկատի ենք ունենում այն դրույթը, որ արտաքին միջավայրում պետության իշխանության հաստատման սահմանագիծը ուղիղ համեմատական է նրա հզորության հետ. որքան հզոր է պետությունը, այնքան մյուս պետությունների հետ ունեցած իշխանական հարաբերությունները (power relationship) նրա շահերին են ծառայում:

Հզորությունը հստակորեն գնահատելը, չափելը գրեթե անհնարի, սակայն կան որոշ չափորոշչներ, որոնց կիրառմամբ հնարավոր է չափել պետության համեմատական/հարաբերական հզորությունը: Խոսքը զնում է պետության հզորության տարրերի մասին: Այդ տարրերը տարրեր կերպ կարելի է դասակարգել՝ բնական-սոցիալական, հաշվեի-անհաշվելի և այլն:

Պետության բնական հզորության տարրերը մեծ նշանակություն ունեն արտաքին միջավայրում պետության իշխանական հարաբերությունների իրականացման արդյունավետության տեսանկյունից: Բնական տարրերի շարքում առանձնակի նշանակություն է տրվում երեքին՝ տարածք և աշխարհագրական դիրք, բնական ռեսուրսներ, բնակչություն:

Տարածք և աշխարհագրական դիրք: Տարածքի մեծությունն ինքնին հզորության չափանիշ է. մեծ տարածք ունենալ, ենթարրում է ունենալ նաև շատ բնական ռեսուրսներ, բազմազան ռելյեֆ. Վերջինս, մեծ տարածության հետ միասին հուսալի պատվար է թշնամիների ներխուժումից պաշտպանվելու, կամ, առնվազն, որոշ ժամանակ շահելու առումով: Ի թիվս այլ պատճառների (խստաշունչ կլիմա, ռուսների բազմաքանակություն և այլն)՝ Ռուսաստանի՝ մեծ տարածք ունենալու հանգամանքը ազդեցիկ գործոն էր Նապոլեոնի 1812թ. արշավանքի ձախողման գործում: Այսուհանդերձ, ամեն մի լայնատարած պետություն չէ, որին կարելի է բնութագրել իրեն հզոր (մասնավորապես ին աշխարհի և միջին դարերի սակավակյաց կայսրությունները՝ Աքեմենյան Պարսկաստանը, Մակեդոնացու պե-

տուրքունը, Հոների պէտությունը, Սելջուկյան պէտությունը և այլն): Մեծ տարածքը, առանց անհրաժեշտ զարգացած ենթակառուցների, հզորության տարր հազիվ թե հանդիսանա: Մեծ տարածքն իրենից ենթադրում է նաև երկարաձիգ սահմաններ, իսկ սահմանների երկարությունն ուղիղ համեմատական է պէտության խոցելիությանը. ուրեմն երկար սահմաններ ունենալու պարագայում պէտությունը պետք է ավելի շատ ռեսուրսներ ներդնի սահմանների անխախտելիությունն ապահովելու համար: Տարածական չափորոշիչների մեջ կարևոր նշանակություն ունի մայրաքաղաքի տեղակայման հարցը. որքան մայրաքաղաքն ու այլ մարդաշատ քաղաքներ գտնվեն պէտության խորքում, այնքան պէտությունը հեռու կմնա դեկապտացիայի վտանգից (թարգմանաբար՝ զլիատում, տվյալ դեպքում նկատի ունենք մայրաքաղաքի գրավումը կամ նրան ուժեղ հարվածներ հասցնելը): Որոշ տեսաբանների կարծիքով Ղազախստանի իշխանությունների կողմից երկրի մայրաքաղաքը Ալմա-Արտայից Աստանա տեղափոխելը, ի թիվս այլ պատճառների, բացատրվում է նաև նշված նկատառումով:

Միջազգային հարաբերություններում աշխարհագրական գործոնների դերը խիստ արժնորվում է քաղաքագիտության դիսցիպլիններից մեկի՝ աշխարհաքաղաքականության (գեռպոլիտիկա) կողմից: 1890-ական թթ. վերջերին աշխարհաքաղաքականության հիմնադիրներից մեկը՝ Ալֆրեդ Մեհենն իր աշխատության մեջ (The influence of Seapower upon History 1660-1783) չափազանց կարևորելով ծովային տարածքը վերահսկելու հանգամանքը, փաստարկում էր, որ այն պէտությունը, որ կվերահսկի օվկիանոսի ափերը, կտիրի աշխարհին: 20-րդ դ. սկզբին բրիտանացի աշխարհագետ սըր Հալֆորդ Մաքինդերը, հակադրվելով Մեհենի այս տեսությանը, փաստարկում էր, որ աշխարհի հզորագույնը կլինի այն պէտությունը, որը կվերահսկի Եվրասիական «Հարթենդր»: «Ուզ տիրում է Արևելյան Եվրոպային, վերահսկում է Եվրասիական Հարթենդր, ով տիրում է Հարթենդին, վերահսկում է Համաշխարհային կղզին

(Եվրոպա, Ասիա և Աֆրիկա), ով տիրում է Համաշխարհային կղզուն, վերահսկում է ողջ աշխարհը»: Զարգացնելով Մաքինդերի գաղափարները՝ գերմանացի աշխարհագետ և ստրատեգ Կարլ Հաուսհոֆերը պնդում էր, որ Առաջին աշխարհամարտում պարտված Գերմանիան հզոր պետություն կդառնա, եթե տիրի Եվրասիական Հարթենդին: Հատկանշական է, որ նացիստական Գերմանիայի նվաճողական քաղաքականության գիտատեսական հիմքում մեծ չափով դրված էին Հաուսհոֆերի գաղափարները:

Բնական ռեսուրսները, լինեն վերականգնվող կամ ոչ, պետության հզորության խիստ կարևոր չափանիշ են: ԱՄՆ-ը, Ռուսաստանը, Չինաստանը, Ղազախստանը, Իրանը և այլ պետություններ, ի թիվս այլ պատճառների, նաև իրենց բնական ռեսուրսների շնորհիվ են հզոր պետություններ: Բնական ռեսուրսների մեջ բնականաբար մեծ նշանակություն ունեն Էներգակիրները (նավթ, գազ, ուրան և այլն): Էներգակիրների տիրապետելը այն հաղթաթուղթն է, հզորության այն կարևոր տարրն է, որի շնորհիվ պետությունը կարողանում է արտաքին միջավայրի իշխանական հարաբերություններում հաղթողի դիրքերից հանդես գալ: Եվ որքան աճում են Էներգակիրների գները, այնքան աճում է պետությունների հզորությունը (այդուհանդերձ, նավթային խաղի տեսություններից մեկի համաձայն, նավթի գների բարձրացումը պետությանը ներքուստ ավելի ավտորիտար է դարձնում, արտաքուստ ավելի կոշտ, ինչը վերջին հաշվով նպաստում է պետության թուլացմանը): Այսօր Քուվեյթի, Միացյալ Արաբական Էմիրությունների պես տարածքով փոքրիկ պետությունները միջազգային թատերաբեմում մեծ հեղինակություն ունեն: Էներգակիրներից բացի, կարևորվում են նաև այլ մետաղական և ոչ մետաղական օգտակար հանածոները, իմելու ջրի պաշարները, ռոռոգելի հողերի մասշտաբը, բուսական և կենդանական աշխարհի բազմազանությունը և այլն: Բնական ռեսուրսների առատությունը նույնպես կարող է հանդիսանալ պետության խոցելի կողմերից մեկը. Քուվեյթի՝ նավթառատ երկիր հանդիսանալու հանգա-

մանքը Իրաքին դրդեց 1990 թ. օգոստոսին զավթել Քուվեյթը: Կոնզու-
յում թանկարժեք քարերի առատությունն այստեղ մշտապես արյու-
նալի բախումների պատճառ է: Այսպիսով, բնական ռեսուրսների
առատությունը նպաստում է հզորության աճին այն դեպքում, եթե
այդ ռեսուրսները շահագործվում են ռացիոնալ կերպով, ճիշտ
մենեջմենթի միջոցով: Մյուս կողմից, բնական ռեսուրսների
սակավությունը չի ենթադրում, որ պետությունը պարտադիր պետք
է հզոր չլինի. Ճապոնիայի օրինակն այս առումով միանգամայն
հատկանշական է:

Բնակչություն: Շատ բնակչությունը հզորության չափանիշ է
(մարդաշատ բանակ, մարդաշատ սպառողական շուկա, արտադրա-
կան ներուժ, տարբեր ոլորտներում պրոֆեսիոնալների ընտրության
լայն հնարավորություն և այլն): Գերմանիայի միավորման առաքե-
լությունն իրականացրած կանցելը Օտտո Բիսմարկը Ռուսաստանի
դեմ պատերազմելու վտանգավոր կողմերից մեկը համարում էր այդ
երկրի իիստ մարդաշատ լինելը: Սակայն պետք է կրկին նշենք, որ
հզոր կոչվելու համար մեծաքանակ բնակչություն ունեցող պետու-
թյունը մի քանի չափանիշներ պետք է բավարարի. բնակչության
կրթվածության մակարդակ, եկամուտների բաշխվածության տար-
բերություն, սոցիալական ծառայությունների որակ և այլն:

Պետության՝ վերը նշված բնական հզորության տարրերի կարե-
վորությունը մեծապես պայմանավորվում է հզորության մյուս տիպի
(ոչ բնական) չափելի և ոչ չափելի տարրերի առկայությամբ: Այսպես,
արդյունաբերական զարգացվածությունը համարվում է ազգային
հզորության կարևորագույն չափելի տարրերից մեկը: Արդյունաբե-
րական զարգացման բարձր մակարդակի պայմաններում պետու-
թյան տարածքի մեծության կամ բնակչության շատ լինելու կարևո-
րությունը կարող է նվազել: Օրինակ՝ արդյունաբերապես զարգա-
ցած պետությունը կարող է շատ լավ կազմակերպել իր պաշտպա-
նական գործը փոքր տարածքի և սակավաթիվ բնակչության պայ-
մաններում: Ազգային հզորության ոչ չափելի տարրերից է հասա-

րակական աջակցության հանգամանքը: Որքան հասարակությունն աջակցի իր իշխանություններին (այսինքն՝ որքան իշխանությունները լեզվատիմ լինեն իրենց երկրի ներսում) արտաքին քաղաքական այս կամ այն խնդրի կապակցությամբ, այնքան պէտությունը միջազգային թատերաբեմում ավելի վստահ հանդես կգա: Հասարակության միաբանությունը, աջակցությունը խիստ կարևորվում է հատկապես ձգնաժամային իրավիճակների, պատերազմների ժամանակ: Հայության նվիրվածությունն ու հանրային աջակցությունը հիրավի ամենակարևոր նախապայմանը հանդիսացավ Արցախի գոյամարտում մեր ազգի հաղթանակը կերտելու գործում: Խսրայելի իշխանությունները նույնպես իրենց հասարակության ջերմ աջակցությունն ունեին իրենց թիկունքում, երբ Մերձավոր Արևելքում մղած բոլոր պատերազմներում հաղթող դուրս եկան: Մինչդեռ Վիետնամի դեմ պատերազմում ԱՄՆ-ի կրած անհաջողության պատճառներից մեկն այն էր, որ պատերազմը չէր վայելում ամերիկյան հասարակության աջակցությունը:

Պետության հզորության ոչ չափելի տարրերից է նաև ազգային իսիջը: Ազգային իմիջ կերտելու հարցում հաջողություն են ունենում հատկապես այն երկրները, որոնք ավելի շատ են ներգրավված համաշխարհային և միջազգային տնտեսական, գիտամշակութային համագրդակցության և ինտեգրացիոն գործընթացների մեջ: Օրինակ՝ Շվեյցարիան միջազգային հանրության կողմից ընկալվում է որպես հուսալի ֆինանսաբանկային կենտրոն, Ճապոնիան՝ որպես տեխնոլոգիապես խիստ զարգացած երկիր, Կանադան, Շվեյցարիան, Սկանդինավյան երկրները՝ որպես բարեկեցության սիմվոլներ և որպես հումանիտար օգնություն ցուցաբերող երկրներ: Թուրքիան, որի բնակչության ճնշող մեծամասնությունը դավանում է իսլամը, մշտապես փորձել է միջազգային հանրության աշխին ստեղծել աշխարհիկ, արևմտյան տիպի, ժողովրդավար պետության իմիջ, որը ժուրդիային մեծամասամբ հաջողվել է: Մինչդեռ Իրանը քունդամենտալ իսլամիստ հասարակությունների աշխին ունի «արևմբարյան

քաղաքակրթության, ԱՄՆ-ի ճնշումներին դիմակայող» պետության իմիջ:

Պետության հզորության գործադրումը

Պետության հզորության գործադրում ասելով հասկանում ենք պետության հզորության տարրերի այնպիսի կիրառում, որը նպատակառության է արտաքին իշխանական հարաբերությունները իշխանական պետության ուղղորդմանը: Այնքան ժամանակ, քանի դեռ չի գործադրվում պետության հզորությունը, այն անվանում ենք պոտենցիալ հզորություն, իսկ գործադրման պրոցեսում գտնվող հզորությունն անվանում ենք արյունավետ/էֆեկտիվ հզորություն: Պետությունները ձեռնարկում են բազմաթիվ միջոցներ՝ իրենց հզորության պոտենցիալն իրացնելու համար: Պետության կողմից ձեռնարկվող միջոցառումների այդ համալիրը (statecraft) պարունակում է 3 հիմնական միջոցներ՝ դիվանագիտություն, տնտեսական միջոցներ, ուժային միջոցներ: Հատկանշական է, որ այդ միջոցները կարող են ձեռք առնվել ինչպես հաջորդական, այնպես էլ միաժամանակյա սկզբունքով: Այն պետությունը, որը գործադրում է իր հզորությունը այլ պետության հանդեպ, պայմանականորեն կոչենք սուրյեկտ պետություն: Այն պետությունը, որի դերը ուղղված է սուրյեկտ պետության հզորությունը, կոչենք թիրախ պետություն:

Դիվանագիտություն

Դիվանագիտությունը խաղաղ միջոցների ամբողջություն է (քանակցություններ, սակարկություններ, հայտարարություններ, հնարքներ և այլն)` ուղղված թիրախ պետության վարչագծի ուղղորդմանը, փոփոխմանը կամ վերահսկմանը: Պետության հզորությունը դիվանագիտությամբ գործադրելու ձևեր կարող են հանդես գալ հետևյալները.

- Ցույց տալ թիրախ պետությանը, որ խիստ դժգոհ է այսինչ հարցում նրա վարած քաղաքականությունից:

- Հավաստել, որ իրենց միջև հարաբերությունները կբարելավ-վեն, եթե թիրախ պետությունը վերանայի իր քաղաքակա-նությունը:
- Զգուշացնել, սպառնալ, թե ինչ վտանգավոր հետևանքներ կարող է ունենալ թիրախ պետության կողմից նույն քաղա-քականության շարունակումը:
- Իր դիրքորոշման աջակիցներ գտնել (կա'մ որևէ միջազգային կազմակերպության շրջանակներում, կա'մ այլ պետություն-ների հետ երկկողմ հարաբերություններում)` թիրախ պե-տության վրա ճնշում գործադրելու նպատակով:
- Զիջել, տալ թիրախ պետությանը այն, ինչ նրան անհրաժեշտ է (դիվանագիտական ձանաշում, քաղաքական, դիվանագի-տական աջակցություն)` վերջինիս կողմից սուրյեկտ պետու-թյանը ցանկալի վարքագիծ դրսեորելու պայմանով:
- Դադարեցնել քաղաքական, դիվանագիտական աջակցու-թյունը, խզել դիվանագիտական կապերը, եթք թիրախը շա-րունակի իր համար անցանկալի վարքագիծ դրսեորելը:

Բանակցությունները հանդիսանում են դիվանագիտության իրականացման ամենատարածված և արդյունավետ միջոցներից մե-կը: Սակարկությունը (bargaining) բանակցության մի ձև է, որի գոր-ծելակերպն է համարժեք ռեսուրսների, արժեքների առաջարկումն ու ընդունումը: Կան բանակցությունների այլ ձևեր, որտեղ սակար-կություն տեղի չի ունենում: Դրանցից են օրինակ՝ ուժի դիրքերից բանակցությունները (Նապոլեոն Բոնապարտը հաճախ էր օգտա-գործում այս մեթոդը):

Բանակցություններին ու սակարկություններին բնորոշ կարևոր հատկանիշներից մեկը երկմակարդակ բնույթն է: Լիբերալ ընկալ-մամբ երկմակարդակ բնույթի կությունը նրանում է, որ բանակցու-թյուններն ու սակարկությունները կատարվում են ինչպես թիրախ պետության հետ, այնպես էլ ներպետական ակտորների (քաղաքա-կան ուժեր, հասարակություն, պառլամենտ և այլն) հետ: Այսպիսով,

բանակցողը ստիպված է լինում կա՝ մ բանակցությունների արդյունքը համաձայնեցնել վստահորդների հետ, կա՝ մ նրանց դիրքորոշումը հաշվի առնելով՝ փոխել բանակցային ռազմավարությունը կամ մարտավարությունը և այդպես շարունակ: Ուելիստական ընկալմամբ «երկմակարդակ խաղի» էությունը նրանում է, որ բանակցությունների ու սակարկությունների արդյունքները համաձայնեցվում են միջազգային համակարգի առաջադրած խաղի կանոններին: Այսպիսով, եթե լիբերալները բանակցային գործընթացի երկրորդ մակարդակը համարում են բանակցող-վստահորդներ (ներպետական դերակատարներ) հարաբերությունները, ապա ուելիստներն ավելի շատ կարևորություն են տալիս պետություն-միջազգային համակարգ հարաբերություններին:

Բանակցություններին բնորոշ մյուս կարևոր հատկանիշը բանակցային մշակույթն/կուլտուրան է: Բանակցային մշակույթը բանակցային ավանդույթների, սովորույթների ամբողջություն է, որը բնորոշ է տվյալ սոցիալական հանրությանը (կրոնական համայնք, դասակարգ, ազգ, քաղաքակրթություն և այլն): Բանակցային մշակութային տարբերությունները կամ ընդհանրությունները, ըստ լիբերալ մոտեցման, կարևոր ազդեցություն են թողնում բանակցությունների արդյունքների վրա:

Տնտեսական միջոցներ

Եթե դիվանագիտությունը հզորության գործադրման վերբալ (խոսքային, եթե խոսքն է հզորության գործադրման/ցուցադրման գործիքը, միջոցը) տարբերակ է, ապա տնտեսական միջոցները հզորության գործադրման ավելի շոշափելի, գործնական տարբերակ են: Այսպիսով, սուրբեկտ պետությունը թիրախ պետության վարքագծի ուղղորդման, փոփոխման, դադարեցման կամ վերահսկման նպատակով կարող է նրա հանդեպ տնտեսական սանկցիաներ կիրարել: Տնտեսական պողիտիվ սանկցիաներն այն միջոցներն են, որոնք թիրախ պետության համար տնտեսական օգուտ են նախա-

տեսում՝ վերջինիս կողմից իր վարքագիծը վերանայելու պայմանով կամ դեպքում (պողիտիվ սանկցիաների գործադրումը հաճախ անվանվում «քաղցրաբիթի քաղաքականություն»): Տնտեսական նեգատիվ սանկցիաները նախատեսում են տնտեսական սահմանափակումներ, վնասներ կամ պատիժներ՝ թիրախ պետության կողմից իր քաղաքականության չվերանայման պարագայում (նեգատիվ սանկցիաների գործադրումը հաճախ անվանվում է «մահակի քաղաքականություն»):

Բնականարար տնտեսական սանկցիաներ կարող է գործադրել համեմատաբար հզոր պետությունը: Միայն տնտեսապես զարգացած երկրները կարող են, օրինակ, դրամաշնորհներ տրամադրել ներդրումներ իրականացնել, արտոնություններ տալ, արդյունավետորեն բոյկոտել և այլն՝ այս ամենը ծառայեցնելով քաղաքական նպատակների: Ռադիկալները հաճախ են մատնանշում այս հանգամանքը՝ ցույց տալու համար միջազգային կապիտալիստական համակարգի գերակա, գերիշխող կարգավիճակը: Լիբերալները գտնում են, որ զարգացող երկրներն ել են որոշակի իրավիճակներում տիրապետում տնտեսական լծակների (թեև ռադիկալները մերժում են այս տեսակետը): Օրինակ՝ այն զարգացող երկիրը, որը տիրապետում է դժվարամատչելի, թանկարժեք և խիստ կարևոր հումքային կամ այլ ռեսուրսի, կվարողանա օգտագործել այդ որպես հզորության տարր և գործադրել այն ի նպաստ իր շահերին: Արդարության դեմ չմեղանչելու համար, սակայն պետք է նշենք, որ նման ռեսուրսների տեսականին կա' մ թիշ է, կա' մ իրավիճակներն են հազվադեպ դասավորվում ի նպաստ զարգացողների: Այսպես, այդ սակավատեսակ ռեսուրսների թվում կարելի է առանձնացնել նավթը: Նավթ արտահանող երկրների կազմակերպության (OPEC-Organization of Petroleum Exporting Countries) անդամ արարական երկրները 1973 թ. կարողացան նավթային սանկցիաներ կիրառել ԱՄՆ-ի և Նիդերլանդների նկատմամբ, որոնք բացահայտ աջակցում էին Իսրայելին արարա-իսրայելական պատերազմի ժամանակ:

Թույլ երկրները թեև չեն կարող նման սանկցիաներ կիրառել, սակայն կարող են առավել քիչ հարկադրական բնույթի միջոցներով ազդել թիրախ պետությունների արտաքին քաղաքական որոշումների ընդունման գործընթացների վրա: Ազդեցության նման միջոցների օրինակներից են՝ որոշում ընդունողների դիրքորոշումների փոփոխություն միջնորդության, անձնական կապերի, համակրանքի, համոզման միջոցով, լոբբիստական գործունեություն իրականացնելով և այլն: Բնականաբար ազդեցության նման արսենալի տիրապետում են (և ավելի լավ են տիրապետում) հզոր պետությունները: Լիբերալ տեսաբանները շեշտադրում են հզորության գործադրման դիվանագիտական, տնտեսական, առավել քիչ հարկադրողական միջոցների վրա, քանզի նրանք հզորությունը համարում են բազմաչափ կատեգորիա (ի տարրերություն ունախստների, որոնք հզորության առավել ռազմակենտրոն ընկալում ունեն): Ունախստները, ընդհակառակը, գտնում են, որ ուժի գործադրմանը պետք է դիմել հաճախակի և կանոնավոր կերպով:

Ուժի գործադրումը

Ուժը կամ ուժի գործադրման սպառնալիքը պետական միջոցների համալիրի մյուս կարևորագույն տարրն է՝ առանցքային դեր գրադեցնելով ռեալիստական մտածողությունում: Եթե ուժը կամ սպառնալիքը գործադրվում է թիրախ պետությանը ստիպելու համար այսինչ քայլը կատարել կամ հրաժարվել, ետ կանգնել իր կողմից արդեն իսկ վարվող քաղաքականությունից, այս գործելակերպը կոչվում է հարկադրանք (compellence): Իսկ եթե ուժը կամ սպառնալիքը գործադրվում է թիրախ պետությանը ետ պահելու, հրաժարվելու իր կողմից պլանավորված, բայց դեռ չիրագործված քայլից, քաղաքականությունից, ապա նման գործելակերպը կոչվում է զապում (deterrence):

Այսպես, հարկադրանքի ռազմավարության կիրառմամբ պետությունը ձգուում է թիրախ պետությանը ստիպել հրաժարվել, ետ

կանգնել իր կողմից վարվող քաղաքականությունից: ԱՄՆ-ը, ՄԱԿ-ը և բազմազգ կոալիցիայի անդամները փորձում են ստիպել Սադրամ Հուսեյնին հրաժարվել Քուվեյթի հանդեպ ցուցաբերվող ազրեսիայի քաղաքականությունից՝ ուժի գործադրման սպառնալիքներ հնչեցնելով: Ազգում ՄԱԿ-ը դատապարտում էր Սադրամի վարչակազմին և կոչ անում ետ կանգնել ազրեսիվ քաղաքականությունից: Այնուհետև, Իրաքի դեմ սկսեցին տնտեսական պատժամիջոցներ կիրառվել: Վերջապես իրականացվեց ԱՄՆ-ի և կոալիցիոն ռազմական ուժերի արագ մոբիլիզացիա ու տեղակայում, և Իրաքի վարչակազմի համար զորքերը Քուվեյթից դուրս բերման վերջնաժամկետ սահմանվեց: Ինչպես գիտենք, այս պարագայում ուժի կիրառման սպառնալիքը չօգնեց, և դաշնակիցները սպառնալիքից անցան կոնկրետ ռազմական գործողությունների:

Զապման (դետերենտ) ռազմավարության կիրառմամբ սուբյեկտ պետությունը թիրախ պետությանը ստիպում է չիրականացնել, ետ կանգնել պլանավորված, քայլ տակավին չձեռնարկված քայլից՝ խստագույնս պատժելու սպառնալիքով: Եթե թիրախ երկիրը, հաշվի առնելով խստագույնս պատժվելու հանգամանքը, չի ձեռնարկում իր կողմից ծրագրավորված քայլը, նշանակում է, որ դետերենտ ռազմավարությունը հաջողվում է, և այս դեպքում խուսափում են կոնֆլիկտից: Դետերենտ ռազմավարությունները ի ցույց են դրել իրենց արդյունավետությունը հատկապես միջուկային գենքերի ստեղծումից հետո: Քանզի միջուկային գենքը ունի կործանարար ուժ, ուստի միջուկային պետությունը լավագույնս կարող է կիրառել զայման ռազմավարություն:

Ե՛վ հարկադրանքի, և՝ զայման ռազմավարությունները արդյունավետ կիրառելու համար պետությունները պետք է մի քանի շափանիշներ բավարարեն: Նրանք պետք է ունենան իրենց կողմից գործադրվող ուժի սպառնալիքին ադեկվատ (համաշափ, համահունչ) ռազմական ուժ: Նրանք պետք է նաև սպառնալիքից կոնկրետ քայլերի անցնելու ունակ լինեն, այնքան, որ թիրախ պետություն-

ները հստակ գիտակցեն նրանց ունակությունը: Յուրաքանչյուր մարտավարության իրականացումը պետք է զուգորդվի համապատասխան ռազմական մարտակարգով: Այսպես, հարկադրանքի ռազմավարություն կիրառելիս պետությունը պետք է ուշադրությունը սևերի առաջնահարվածի մարտակարգ զարգացնելու վրա (First-strike capability): Զսպման ռազմավարության պարագայում առաջնահերթ համարվում է պատասխան հարվածի մարտակարգն ու կարողությունը (Second-strike capability):

Հարկադրանքի ու զսպման ռազմավարությունները, այնուամենայնիվ, կարող են ձախողվել: Այս դեպքում ռազմական գործողությունները դառնում են գրեթե անխուսափելի: Բայց նույնիսկ պատերազմի սկսման դեպքում էլ պետությունները կանգնում են ուժի գործադրման միջոցների, ձևերի ընտրության առաջ: Նրանք պետք է ընտրություն կատարեն զինատեսակների հարցում (միջուկայի՞ն, թե՝ կոնվենցիոնալ/սովորական սպառազինություններ, ստրատեգիակա՞ն, թե տակտիկական զենքեր), նշանակետերի տեսակների հարցում (քաղաքացիակա՞ն, թե՝ ռազմական օբյեկտներ), հարվածի աշխարհագրական ընդգրկման/լոկուսի հարցում (քաղա՞ք, երկի՞ր, տարածաշրջա՞ն):

Արտաքին քաղաքական որոշումների ընդունման մոդելները

Արտաքին քաղաքական որոշումների ընդունման գործընթացի վերաբերյալ Ռեալիստները, լիբերալները և ռադիկալները տարբեր մոտեցումներ, ընկալումներ ունեն:

Ռացիոնալ (ստատիստ) պետականակենտրոն մոդելը

Ռեալիստները գտնում են, որ արտաքին քաղաքական որոշումների ընդունումը ռացիոնալ գործելակերպի վրա հիմնված գործընթաց է, երբ պետության կողմից ընտրվում է արտաքին քաղաքականության այնպիսի ուղղեցիծ, որը առավելագույնս է արտացոլում պետության ռազմավարական նպատակներն ու ինդիքները: Պետու-

թյունը ռեալիստների կողմից դիտվում է որպես ունիտար դերակատար, որն ունակ է հստակ ձևակերպել իր նպատակները՝ իր շահերին համահունչ կերպով, նպատակներին հասնելու տարբերակները և ունակ է սահմանել այն ալգորիթմը, որի միջոցով որոշում է թե որ տարբերակով առաջնորդվելը լավագույնս կնպաստի սահմանված նպատակին հասնելուն: Արտաքին քաղաքականության որոշումների ընդունման գործընթացը հիշեցնում է ուղղաձիգ հաջորդականության տեսք: Ուղղաձիգ հաջորդականությունը արտահայտվում է հետևյալ կերպ՝ **ՊԵՏՈՒԹՅՈՒՆԸ**. 1. հստակորեն ձևակերպում է հիմնախնդիրը/պրոբլեմը, 2. սահմանում է նպատակները, 3. սահմանում է քաղաքական այլընտրանքները (նպատակներին հասնելու տարբերակները), 4. վերլուծում, վերհանում է այդ տարբերակների իրականացման համար պահանջվող ջանքերը, ներդրվելիք ռեսուրսները և ակնկալվող արդյունքները, 5. ընտրում է օպտիմալ տարբերակը, այսինքն այն տարբերակը, որն ապահովում է հնարավորինս առավելագույն արդյունք հնարավորինս նվազագույն ռեսուրսների գնով: Ներկայացված այս 5 քայլերի միջև առկա են տրամաբանական, պատճառահետևանքային կապեր, այդ պատճառով էլ համարվում է, որ արտաքին քաղաքական որոշումների ընդունման գործընթացը հիմնված է ռացիոնալ գործելակերպի վրա և որ այդ գործընթացն ունի ուղղաձիգ վեկտորի տեսք: Քանի որ որոշման կայացնողը պետությունն է, պետական իշխանությունը, որը այդ որոշումը կայացնելիս հիմնականում ինքնուրույն է, ուստի ըստ ռեալիստների, արտաքին քաղաքական որոշումների ընդունման մոդելը ռացիոնալ և պետականակենտրոն է: Որպես դեպքային ուսումնասիրություն՝ դիտենք 1996 թ. տեղի ունեցած միջադեպը, երբ Չինաստանը իրականացնում էր հրթիռային փորձարկումներ. ընդ որում հրթիռները նշանակետին հարվածում էին՝ թռնելով Թայվանի օղային տարածքի վրայով: Նման իրավիճակում Թայվանի կողմից համապատասխան արտաքին քաղաքական որոշման ընդունման գործընթացի մեկնաբանումը ռացիոնալ մոտեցմամբ

կունենա հետևյալ տեսքը (համարները համապատասխանում են վերոնշյալ համարներին):

1. ՀԻՄՆԱԽՈՒՐԻ ԶԵՎԱԿԵՐՊՈՒՄ: Չինաստանի կողմից Թայվանի օդային տարածքի վրայով հրթիռների փորձարկումը սպառնալիք է Թայվանի ազգային անվտանգությանը (և դա այն պայմաններում, երբ Թայվանը նախապատրաստվում էր իր առաջին ժողովրդավարական ընտրություններին):

2. ՆՊԱՏԱԿԻ ՍԱՀՄԱՆՈՒՄ: Թայվանի, ինչպես նաև նրա դաշնակից ԱՄՆ-ի նպատակն էր Չինաստանի կողմից հրթիռային փորձարկումների անհապաղ դադարեցումը:

3. ՏԱՐԲԵՐԱԿՆԵՐԻ ՍԱՀՄԱՆՈՒՄ: Նպատակին հասնելու համար Թայվանի դեկավարությունն առաջադրել էր մի քանի տարբերակներ. ա. ոչինչ չձեռնարկել, բ. սպասել մինչև ընտրությունների ավարտը՝ հուսալով, որ Չինաստանը ընտրությունների ավարտից հետո կդադարեցնի այդ փորձարկումները (Թայվանին տիրանալու հույսը կորցնելով) գ. իրականացնել դիվանագիտական դեմարշ (եռանդուն բողոք), դ. հիմնախնդիրը տեղափոխել ՄԱԿ-ի անվտանգության խորհուրդ, ե. ուժ կամ ուժով սպառնալիք գործադրել Չինաստանի վրա՝ հարվածելով նրա հրթիռներին, զ. Չինաստանի վրա գործադրել տնտեսական սանկցիաներ:

4. ՏԱՐԲԵՐԱԿՆԵՐԻ ԿՇՈԱԴԱԾՈՒՄ: Թայվանի իշխանությունները կշռադատում, վերլուծում են նշված տարբերակների գինն ու արդյունավետությունը. այսպես օրինակ՝ չինական հրթիռներին հարվածելով միգուցե հիմնախնդիրը լուծվեր, բայց նման տարբերակն ամենայն հավանականությամբ կհանգեցներ Թայվանի կործանմանը:

5. ՈՐՈՇՄԱՆ ԸՆԴՈՒՆՈՒՄ: Թայվանը ընտրում է ԱՄՆ-ի աջակցությամբ դիվանագիտական բողոքի տարբերակը՝ ցույց տալով, որ ԱՄՆ-ը սատարում է Թայվանի ինքնիշխանությանը: Եթե Թայվանը ոչինչ չձեռնարկեր, դա կնշանակեր, որ ընդունելի է համարում Չինաստանի կողմից իրականացվող հրթիռային փորձարկում-

ները: Զինաստանի հանդեպ ռազմական գործողությունների ձեռնարկումը Թայվանի համար կարող էր ունենալ կործանարար հետևանքներ:

Բյուրոկրատիկ/կազմակերպակենտրոն մոդելը

Արտաքին քաղաքական որոշումների ընդունման գործընթացն այս մոդելով մեկնաբանելու պարագայում ընդունված է համարել, որ որոշումները կայացվում են ներպետական կազմակերպությունների (պետական կառույցների) և բյուրոկրատիաների կողմից որպես նրանց շահերի, տեսակետների արտահայտություն: Արտաքին քաղաքական որոշումների ընդունումը ստանդարտ արարողակարգային գործընթաց է, երբ որոշումներն ընդունվում են ստանդարտ ձևերով՝ հիմնվելով նախադեպերի վրա. Նման պարագայում քաղաքականության մեջ խոշոր փոփոխությունների հավանականությունը խիստ քիչ է: Որոշման կայացումը հանդիսանում է բյուրոկրատական տարրեր կառույցների (օրինակ՝ տարրեր նախարարություններ), խմբերի, անհատների միջև շահերի և տեսակետների պայքարի արդյունք: Փաստորեն, որոշման ընդունումը կախված է կազմակերպության/բյուրոկրատիայի սուբյեկտների հզորության աստիճանից. ով ավելի հզոր է, նրա տեսակետն էլ գերակայում է, կամ նրա շահն էլ իրացվում է: Հարկավոր է ուշադրություն հրավիրել այն հանգամանքի վրա, որ այս մոդելը ենթադրում է որոշման կայացում գործ պետական կառույցների միջև փոխհարաբերությունների արդյունքում:

Արտաքին առևտուրը քաղաքականության այն ոլորտն է, որտեղ քաղաքական որոշման ընդունման բյուրոկրատիկ/կազմակերպային մոդելն առավել կիրառելի, առավել տեսանելի է: Այսպես, երկար ժամանակ Հարավային Կորեան պրոտեկցիոնիստական քաղաքականություն էր վարում գյուղատնտեսական որոշ մթերքների ոլորտում. թույլ չտալով արտասահմանյան ծխախոտի, բրնձի և մսի մուտքը կորեական շուկա՝ այդպիսով խթանում էր հայրենական

արտադրությունը: 1980-ականներին ԱՄՆ-ը սկսեց մեծացնել քաղաքական ճնշումը Հարավային Կորեայի վրա, որպեսզի վերջինս ազատականացնի իր գյուղմթերքների շուկան: Հարավային Կորեայի գյուղատնտեսության և ձկնաբուծության նախարարությունները խիստ դեմ էին արտահայտվում այդ շուկայի ազատականացմանը՝ համարելով, որ այդ հանգամանքը կորեացի գյուղատնտեսներին, ֆերմերներին խիստ կվնասի: Բայց Առևտրի և արդյունաբերության, ինչպես և Ֆինանսների նախարարությունները ահազանգում էին, որ Հարավային Կորեայի կողմից նման փակ շուկայի քաղաքականությունը շարունակելու դեպքում ԱՄՆ-ն կարող է փակել ամերիկյան շուկան կորեական արդյունաբերական արտադրանքի առջև, ինչը կաթվածահար կաներ իրենց երկրի տնտեսությունը: Ի վերջո, Հարավային Կորեայի գյուղնախարարությունը որոշ չափով տեղի տվեց, ինչի արդյունքում ազատականացավ ծխախոտի շուկան: Բայց օրինակ՝ բրնձի շուկան շատ դանդաղ սկսեց ազատականանալ, քանզի բրինձ արտադրողները կազմակերպված պայքար մղեցին ազատականացման գործընթացի դեմ՝ գործելով միասնաբար և միավորված լինելով տարբեր շահերի խմբերի մեջ:

Արտաքին քաղաքական որոշումների ընդունումը բյուրոկրատիկ/կազմակերպային մոդելով տեղի է ունենում առավելապես ոչ ճգնաժամային իրավիճակների պարագայում, երբ, օրինակ, օրակարգում դրված չէ պետության անվտանգության հարցը: Ոչ ճգնաժամային իրավիճակներում ժամանակի խիստ սղության, վերջնաժամկետների խնդիր չկա, ուստի որոշման կայացումը տեղի է ունենում պետական կառույցների միջև քննարկումների, մրցակցության, պայքարի արդյունքում, ինչը կարող է տևական գործընթաց լինել: Նրանք կարող են երկար ժամանակ քննարկել, թե ընդունվելիք որոշումը որքանով կարող է հնարավորինս արտահայտել բոլոր շահագրգիռ կողմերի ցանկություններն ու տեսակետները: Մինչեւ ճգնաժամային իրավիճակներում, երբ պահանջվում է տարբեր իրատապ ինդիքների հնարավորինս շուտափույթ լուծում,

որոշումը սովորաբար չի կայացվում պետական կառույցների տեսակետների մրցակցության արդյունքում. այս պարագայում, ելնելով պահի հրամայականից, կիրառվում է ռացիոնալ/պետականակենտրոն մոդելը:

Պյուրալիստ մոդելը

Արտաքին քաղաքական որոշումների ընդունման պյուրալիստ մոդելն ձևաչափ է, որտեղ այդ որոշումներն ընդունվում են ներպետական, բայց ոչ պետական դերակատարների՝ կազմակերպությունների, շահերի, խմբերի, բազմազգ կորպորացիաների, հասարակական շարժումների, հոսանքների միջև սակարկումների, բանակցությունների, մրցակցության ու համաձայնեցման արդյունքում։ Կրկին պետք է նշենք, որ այս կարգի դերակատարների դերը արտաքին քաղաքական որոշումների ընդունման հարցում առավել ընդգծվում, կարևորվում է հատկապես ոչ ճգնաժամային, ոչ հրատապ իրավիճակներում և առավելապես տնտեսական բնույթի խնդիրների դեպքում։ Բնականաբար անվիճելի է, որ Ֆրանսիայի գինեգործներին հաջողվում է կանխել հունական կամ իսպանական էժանազին գինու մուտքը Ֆրանսիա՝ քարոզության տարբեր միջոցներ կիրառելով։ Անկասկած ԱՄՆ-ի կաշեգործական արդյունաբերական ձեռնարկությունները բավականին հզոր են բրազիլական արտադրության կոշիկների մուտքն ԱՄՆ սահմանափակելու գործում, չնայած այն բանին, որ ԱՄՆ-ի կառավարության պաշտոնական դիրքորոշումն է խթանել զարգացող երկրների ապրանքների ներմուծումը։

Հասարակական խմբերը տարբեր լծակներ են գործադրում իրենց շահերից բխող որոշումների ընդունման համար։ Նրանք ի զորու են մորիլիզացնել լրատվամիջոցներին, ձևավորել հասարակական կարծիք, լոբբինգ իրականացնել որոշումների ընդունման պատասխանատու պետական գործակալությունների նկատմամբ, ազդեցություն գործել բարձրագույն ատյանների, ներկայացուցական մարմինների (կառավարություն, պառլամենտ) վրա, կազմակերպել

համանման շահեր հետապնդող հասարակական խմբերի միջև կայուն հաղորդակցություն թեկուզ բազմազգ հենքի վրա (օրինակ՝ կապված տարածաշրջանի էկոմիջավայրն աղտոտող գործարանի գործունեությունն արգելափակելու հետ): Ընդունվող/ընդունվելիք որոշումն արտահայտում է հասարակական տարբեր խմբերի շահերը, ինչը բնորոշ է լիբերալ մտածողությանը:

Թեև ռեալիստներն ընդունում են արտաքին քաղաքական որոշումների կայացման ռացիոնալ մոդելը, և լիբերալներն ընդունում են բյուրոկրատիկ/կազմակերպային և պյուրալիստ մոդելները, ռադիկալների մեծ մասը հակված չեն պատկերացնելու, որ պետական որոշում կայացնողները կամ ինքնուրույնություն, կամ էլ ընտրության հնարավորություն ունեն որոշումների կայացման հարցում: Ռադիկալ հայեցակետի համաձայն՝ կապիտալիստական պետությունների շահերը պայմանավորված են միջազգային կապիտալիստական համակարգի կառուցվածքով, և նրանց որոշումները թելադրվում են տիրապետող դասակարգի տնտեսական հրամայականներով: Քանի որ այդ տիրապետող դասակարգին հակակշռող լուրջ ուժ գրեթե չի լինում, ապա որոշումների ընդունման պյուրալիստ մոդելի մասին խոսել, ըստ ռադիկալների, անիմաստ է:

Հանձնարարվող գրականություն

1. Chris Brown with Kirsten Ainley, Understanding International Relations, 3rd edition, Palgrave Macmillan, 2005, pp. 63-79
2. John Hobson, The State and International Relations, Cambridge University Press, 2003
3. Fred Chernoff, Theory and Metatheory in International Relations: Concepts and Contending Accounts, Palgrave Macmillan, 2007, pp. 8-77
4. Ole Holsti, Theories of International Relations, Essay, pp. 20-32

Դասախոսություն 10
**Միջազգային հարաբերությունների վերլուծության
ինդիվիդուալ մակարդակը**

**Արտաքին քաղաքական գործընթացում դերակատարություն
հանդես բերող պետական անձինք - լիդերներ (Լիտաներ)**

Այս հարցին, թե արդյոք անձի/ինդիվիդուալ գործոնը կարող է լուրջ դեր խաղալ արտաքին քաղաքականության մեջ, կարելի է պատասխանել, օրինակ, հաշվի առնելով այն հանգամանքը, որ երբ փոխվում են պետությունների լիդերները, ապա այդ պետություններից ակնկալվում են արտաքին քաղաքականության փոփոխություններ ևս: Այսպես, 1965 թ. Ռումինիայի կոմունիստական կուսակցության ղեկավար դարձավ Նիկոլայ Չառչեսկուն: Նրա կառավարման 22 տարիների ընթացքում Ռումինիայի արտաքին քաղաքականության մեջ էական փոփոխություններ տեղի ունեցան: Գնալով նվազեց Ռումինիայի կախվածությունը ԽՍՀՄ-ից: Չնայած ԽՍՀՄ-ի բացահայտ առարկություններին՝ Ռումինիան պահպանեց դիվանագիտական հարաբերություններն Իսրայելի հետ 1967 թ. արաբա-իսրայելական պատերազմից հետո: Նույն թվականին դիվանագիտական հարաբերություններ հաստատեց Գերմանիայի Ֆեդերատիվ Հանրապետության միացյալ զինուժի 1968 թ. ներխուժումը Չեխոսլովակիա և սերտացրեց Ռումինիայի հարաբերությունները մյուս «այլախոհ» երկրի՝ Զարավալավիայի հետ: ԽՍՀՄ վերջին առաջնորդ Միխայիլ Գորբաչովի օրինակը նույնպես վկայում է, որ արտաքին քաղաքականության մեջ լիդերի դերակատարության հանգամանքը խիստ կարևոր ու զգալի է, որ լիդերը կարող է մեծապես փոխել որևէ պետության արտաքին քաղաքական կուրսը:

Լիդերից բացի, խիստ կարևորվում է նաև էլիտայի դերը արտաքին քաղաքականության բնագավառում: Այս հանգամանքը կարևորվում է հատկապես կոնստրուկտիվիստական մտածողության մեջ: Կոնստրուկտիվիզմի ուղղության ներկայացուցիչ Ռոբերտ Հերմանի կարծիքով գորբաշովյան վերակառուցման, «նոր մտածողության» ձևավորման գործում մեծ դեր խաղաց Գորբաշովի վարչակազմում արևմտյան կողմնորոշում ունեցող, նոր գաղափարներով տոգորված ուժորմիստական էլիտան:

Լիդերի և էլիտայի ազդեցության չափումը

Արտաքին քաղաքական գործընթացների վրա լիդերի և էլիտայի ազդեցությունը չափվում է 2 տեսակի չափորոշիչներով՝ անձնային և ոչ անձնային (արտաքին): Եթե լիդերը կամ էլիտան արտաքին քաղաքական գործընթացի վրա ազդեցություն է գործում զիսավորապես անձնային հատկանիշների գործադրման միջոցով, ապա այս դեպքում գործ ունենք անձնային չափորոշիչների հետ: Եթե էլիտան այդպիսի ազդեցություն է գործում զիսավորապես ոչ իր անձնային հատկանիշների գործադրման միջոցով (այլ, օրինակ, եթե ազդեցություն գործելու հնարավորություն տալիս է ուժերի փոխասավորությունը, արտաքին քաղաքական բարենպաստ իրավիճակը, երկրի քաղաքական համակարգի կառուցվածքը և այլն), ապա գործ ունենք ոչ անձնային չափորոշիչների հետ:

Ոչ անձնային չափորոշիչներ: Այդ չափորոշիչներից մեկը համարվում է երկրի քաղաքական համակարգի անկայունությունը կամ ճշնաժամային վիճակը: Այսպես, Զորջ Վաշինգտոնը ԱՄՆ-ում, Մոհանդաս Գանդին Հնդկաստանում, Վ. Լենինը Խորհրդային Ռուսաստանում լրջագույն ազդեցություն ունեին ներքին և արտաքին քաղաքական գործընթացների վրա գերազանցապես այն պատճառով, որ այդ երկրների քաղաքական համակարգերն ու կառավարման կառույցները նոր էին ձևավորվում: Աղոլֆ Հիտլերի, Ֆրանկլին Ռուզվելտի, Միխայիլ Գորբաշովի այդշափ մեծ ազդեցությունը բա-

ցատրվում էր նախ և առաջ այն հանգամանքով, որ իրենց երկրները գտնվում էին քաղաքական և տնտեսական ճգնաժամի ձիրաններում: Մյուս չափորոշիչը հանդիսանում է լիդերի գործունեության վրա ինստիտուցիոնալ սահմանափակումների բացակայությունը կամ սակագությունը, ինչը նշանակում է իրավիճակ, երբ քաղաքական համակարգի ինստիտուտները (քաղաքացիական հասարակություն, պառլամենտ, քաղաքական ուժեր և այլն) ունակ չեն վերահսկել լիդերի վարքագիծը: Նման իրավիճակ առկա է դիկտատուրայի պայմաններում (Օլիվեր Կրոմվել, Նապոլեոն Բոնապարտ), երբ բացակայում է քաղաքական ընդդիմությունը կամ հասարակական վերահսկողությունը, ինչի պարագայում լիդերն ուրվագծում և իրականացնում է արտաքին քաղաքական ուղղությունը լիարժեք ինքնուրույն: Մյուս կողմից լիդերի կամ էլիտայի չափազանց մեծ ծավալի լեզիսիմությունը նույնպես կարող է հանդիսանալ արտաքին քաղաքական գործընթացի վրա նրանց մեծ ազդեցության չափորոշիչ, այս պարագայում ևս լիդերը, հաշվի առնելով հասարակության կողմից իր հանդեպ վատահության բարձր մակարդակը, կարող է երբեմն հաշվի չնստել քաղաքական այլ ակտորների առարկությունների հետ: Այսպես օրինակ՝ թեև ԱՍԴ-ի պրեզիդենտ Ռիչարդ Նիքունի հանրապետական վարչակազմն ու ԱՍԴ կոնգրեսը խիստ հակառակունիստական ուղղվածություն ունեին և դեմ էին կոմունիստական պետությունների հետ ԱՍԴ-ի հարաբերությունների զարգացմանը, այդուհանդերձ Նիքունը 1972 թ. իր արտաքին քաղաքական հարցերով խորհրդական Հենրի Քիսախնջերին գաղտնի գործուղեց Չինաստան՝ վարչապետ Չու Էն Լայի հետ հանդիպումներ ունենալու համար: Նիքունը նաև ԽՍՀՄ-ի հետ լարված հարաբերությունները թուլացնելու ուղղությունը էր որդեգրել: Լիդերի դերն արտաքին քաղաքական գործընթացում ընդգծվում է նաև արտակարգ, ճգնաժամային իրավիճակների պարագայում, երբ այդ իրավիճակներին արձագանքելու համար պահանջվում են ոչ ստանդարտ, կանոնակարգով չնախատեսված միջոցներ: Որպես օրինակ կարելի

Է բերել 1962 թ. կարիքյան ճգնաժամը (կապված այն բանի հետ, որ ԽՍՀՄ-ի կողմից Կուրայում միջին հեռահարության հրթիռային համակարգերի տեղադրման փաստը ԱՄՆ հետախուզության կողմից բացահայտվելուց հետո խորհրդաամերիկյան հարաբերությունները հասան լարվածության զագաքնակետին՝ սպառնալով վերածվել կործանիչ պատերազմի), երբ հիմնականում պրեզիդենտ Ջոն Ֆենեդու վճռական գործողությունների շնորհիվ հնարավոր եղավ շտկել ստեղծված իրավիճակը:

Անձնային չափովոշշներ: Արտաքին քաղաքական որոշումների ընդունման հարցում խիստ կարևորվում է նաև լիդերի անձնական բնութագրիշները՝ հակումները, աշխարհայացքը, զգացմունքայնության աստիճանը և այլն: Հաճախ է պատահում, որ երկու պետություններում առկա համանման քաղաքական, սոցիալ-տնտեսական կացությունների պարագայում մի պետության լիդերը մյուսի համեմատ ազդեցության մեջ չափաբաժին ունենա իր երկրի արտաքին և ներքին քաղաքական գործընթացների, որոշումների կայացման վրա: Քաղաքական հոգեբան Մարգրեթ Շերմանն առանձնացրել է մարդկային անհատականության մի շարք գծեր, որոնք ազդում են լիդերի կողմից արտաքին քաղաքական որոշումների ընդունման վրա: Քանզի Շերմանը հնարավորություն չի ունեցել պետությունների լիդերների հետ հոգեբանական թեսուեր անցկացնել, նա 1959-68 թթ. միջև ընկած ժամանակահատվածում հավաքել է 38 երկրների 80 լիդերների տվյալ հարցազրույցներ, ելույթներ և մամուլի ասուլիսներ, որոնց համադրումից ու վերլուծությունից նա առանձնացրել է անհատականության հետևյալ բնորոշիչ գծերը. ազգայնականություն (նացիոնալիզմ – ազգի հանդեպ ուժեղ զգացմունքային կապվածություն, ազգային արժանապատվության բարձր մակարդակ), վերահսկողական ընկալունակություն (հավատ իրավիճակը վերահսկելու հարցում սեփական կարողությունների հանդեպ), ուժի ձգուում (ձգուում հասնելու ազդեցության այլոց հանդեպ), բարեկամներ ձեռք բերելու հակվածություն, պյուրալիստական հա-

կումներ (հակում կամ կարողություն այլոց հետ քննարկելու ինչ-ինչ հարցեր, ռազմավարություն, տակտիկա), ինքնավստահություն (սեփական անձի դերի կարևորում, պատրաստակամություն ընդունելու ցանկացած անակնկալ մարտահրավեր): Կախված նրանից, թե նշված ինդիվիդուալ գծերը որքան են արտահայտված, ընդգծված, ուժեղ կամ թույլ մարդկանց մոտ, Հերմանն առանձնացրել է լիդերի անհատականության 2 տիպ: Առաջինն անկախ լիդերն է, որին բնորոշ են. ազգայնականության բարձր մակարդակ, վերահսկողական բարձր ընկալունակություն, ուժի ձգտման մեծ հակվածություն, պյուրալիստական հակումների բացակայություն կամ ցածր մակարդակ, ուրիշների հանդեպ անվստահության բարձր մակարդակ: Երկրորդ տիպը գործակցող լիդերն է, որին էլ բնորոշ են. ազգայնականության ցածր մակարդակ, վերահսկողական ցածր ընկալունակություն, բարեկամներ ձեռք բերելու բարձր հակվածություն, պյուրալիստական բարձր հակվածություն, ուրիշների հանդեպ անվստահության ցածր մակարդակ:

Մարդկային էությունը/բնույթը և միջազգային հարաբերությունները

Առաջին հարցը, որ ծագում է այս երկու երևույթների փոխկապակցվածության առնչությամբ, հարցն է այն մասին, թե մարդկային էության հատկանիշներն ինչպես են անդրադառնում արտաքին քաղաքականության վրա: Այդ հարցին լույս սփռելու համար առաջին քայլը, որ պետք է անենք, դա հասկանալն է այն, որ լիարժեք ռացիոնալ որոշումներ ընդունելու համար մարդկային էությունը խիստ սահմանափակ հնարավորություններ ունի. այսինքն՝ մարդն ունակ չէ ընդունել անհրաժեշտ քանակի ինֆորմացիա, մշակել այդ ինֆորմացիան և արդյունքում կայացնել օպտիմալ (նվազագույն ռեսուրսների ներդրմամբ առավելագույն օգուտ ապահովող) որոշում: Այս փաստարկն ավելի է ամրապնդվում նաև երբ հաշվի ենք առնում այն, որ մարդու կողմից որոշման կայացման գործընթացում երբեմն

նրա հույզերն ու զգացմունքներն են (և ոչ բանականությունը) որոշիչ դեր խաղում: Ստորև կփորձենք դիտարկել մարդկային էության այն հատկանիշները, որոնք ազդեցություն են գործում արտաքին քաղաքական որոշումների կայացման գործընթացի վրա՝ սահմանափակելով այդ որոշումների կայացման ռացիոնալ գործելակերպը: Խոսքը գնում է որոշումների ընդունման կողմիցիվ (իմացական/ձանաշողական), հոգեբանական և կենսաբանական գործոնների մասին:

Որոշումների կայացման կողմիցիվ բնույթը/գործոնները: Որոշումների կայացման կողմիցիվ բնույթը/գործոններ ասելով նկատի ենք ունենում հանգամանք, եթե որոշումներն ընդունվում են առկա ինֆորմացիայի սահմանափակության պայմաններում, այսինքն, եթե որոշումներն ընդունվում են՝ հիմնվելով միայն այն ինֆորմացիայի վրա, որը հասանելի է մարդուն, որոշում կայացնողին: Բնականաբար որքան շատ ինֆորմացիայի մշակման պայմաններում կայացվի արտաքին քաղաքական որոշումը, այնքան այդ որոշումը շատ ռացիոնալիզմով օժտված կլինի: Եվ քանի որ գործնականում անհնար է, որ մարդը կարողանա տիրապետել տվյալ ոլորտում առկա ամբողջ տեղեկատվությանը, ուստի նա ստիպված է որոշում կայացնել իր իմացածի, տիրապետածի չափով: Հետևապես որոշումների կայացման կողմիցիվ գործոնները հաճախ անվանվում են «սահմանափակ ռացիոնալության գործոններ»: Ընդ որում, գոյություն ունեն ռացիոնալիզմը սահմանափակող արտաքին և ներքին գործոններ: Արտաքին գործոնները վերաբերում են տեղեկատվության անհասանելիությանը կամ սխալ տեղեկատվությանը (այսինքն՝ որոշումների ռացիոնալությունը սահմանափակվում է, եթե մարդուն հասանելի չէ անհրաժեշտ տեղեկատվություն, կամ եթե մատուցվող տեղեկատվությունը սխալ է), ներքին գործոններն առնչվում են տեղեկատվության ընդունման և մշակման գործում մարդու մտավոր և ֆիզիկական ունակությունների սահմանափակությանը (այսինքն որոշումների ռացիոնալությունը սահմանափակվում է, եթե մարդը (որոշում կայացնողը) չի կարողանում ընդունել, ընկալել կամ մշակել անհրա-

ԺԵշտ քանակի ինֆորմացիա, բայց այդ ինֆորմացիան նրան հասանելի է:

Արտաքին քաղաքական որոշումները ևս կայացվում են սահմանափակ ռացիոնալության պայմաններում: Կողնիտիվ սահմանափակումների պայմաններում որոշում ընդունելու համար որոշում կայացնողը կիրառում է մի շարք հնարներ: Դրանցից են.

- **Կողնիտիվ դիսոնանսի հաղթահարման հնարք**

Կողնիտիվ դիսոնանսը որոշում կայացնողի այնպիսի զգացում, հոգեվիճակ է, երբ մարդը մի կողմից հետապնդում է կարևոր մի նպատակ և մյուս կողմից գիտակցում է, որ չի կարողանում գտնել իր համար խիստ ցանկալի այդ նպատակին տանող ոչ ռիսկային, մատչելի ուղին, կամ էլ գիտակցում է, որ այդ նպատակին հասնելու իրեն հայտնի ուղին/ներք ռիսկային, դժվարամատչելի է/են: Ի վերջո, ընտրություն կատարելով նպատակին հասնելու այդ ռիսկային, դժվարամատչելի միջոցների մեջ, լիդերը իր որոշման կայացման կողնիտիվ դիսոնանսը հաղթահարում է որոշ հնարների միջոցով. սկսում է ամեն փաստարկ օգտագործել իր որոշումն արդարացնելու համար, տարբեր պատճառաբանություններով դիմակայում է իր խորհրդատուների կամ ենթակաների կարծիքներին, անտեսում է նրանց զգուշացումները, մի խորքով անում է ամեն ինչ իր որոշման՝ տվյալ պահին միակ ճիշտը լինելու հարցում ինքն իրեն և մյուսներին համոզելու համար¹⁴:

- **Որոշման առարկա հանդիսացող հարցերի նշանակության նվազեցման հնարք**

Առավել կարևոր նշանակություն ունեցող հարցերի շուրջ որոշում ընդունելը տեղեկատվության սահմանափակության պայմաններում խիստ ռիսկային և պատասխանատու քայլ է: Ուստի մեծ բարդություններից ապահովագրվելու համար լիդերը որոշումներ է

¹⁴ Կողնիտիվ դիսոնանսի վար օրինակ է Եզրպոսի հայտնի առակն այն մասին, որ երբ աղվեար տեսնում է, որ չի գտնում խաղողին հասնելու միջոցը, բողնում խաղողն ուտելու միտքը և իր որոշումն արդարացնում խաղողի խակ լինելով:

կայացնում այդ կարևոր նշանակության խնդրին առնչվող առավել երկրորդական նշանակության հարցերի շուրջ: Օրինակ, եթե պետության լիդերը կանգնած է ռազմական գործողություններ սկսելու կամ չսկսելու երկընտրանքի առաջ, նա բավարարվում է լրացուցիչ սպառնալիքներ տեղալով, կամ դիվանագիտական պայքար սկսելով ազրեսոր պետության դեմ:

- **Եվրիստիկ հնարների կիրառումը**

Եվրիստիկան ինդրալուծման այնպիսի գործելակերպ է, որը հիմնված է համանման խնդիրների լուծման հետ կապված պատմական փորձի, անձնական փորձառության, գոյություն ունեցող սովորութային նորմերի և այլնի վրա: Որեկիցեւ հարցի շուրջ որոշում ընդունելիս լիդերը, մանրամասն տեղեկատվություն հավաքելուց, վերլուծելուց խուսափելու նպատակով (նամանավանդ, երբ ինֆորմացիայի հավաքագրումն ու մշակումը երկարատև է, իսկ որոշում կայացնողը քիչ ժամանակ ունի), կիրառում է որոշման կայացման Եվրիստիկ գործելակերպը: Այսպես, 1938 թ. Մյունիենյան գործարքի ձախողումը (երբ Հիտլերին խաղաղեցնելու նպատակով Զեխիային պատկանող Սուլդետական մարզը տրվեց Գերմանիային) աշքի առջև ունենալով՝ միջազգային հանրությունը թույլ չտվեց, որ 1990 թ. Իրաքի կողմից Քուվեյթի զավթումն անպատճ մնա:

Հոգեքանական գործոնները: Միջազգային հարաբերություններում (արտաքին քաղաքականության մեջ) մարդկային էության հատկանիշների դրսնորումները որոշ տեսություններ բացատրում են հոգեքանական գործոններով: Տեսական նման մոտեցումներից է ֆրուստրացիայի¹⁵ ազրեսիայի տեսությունը, ըստ որի, ֆրուստրացիոն իրավիճակներում գտնվող հասարակությունները դառնում են ազրեսիվ, ազրեսիվությունը դրսնորվում է հասարակական մակարդակում, ողջ հասարակության կտրվածքով: Գերմանական հասա-

¹⁵ Ֆրուստրացիա նշանակում է զայրույթ, հուսախարություն: Այն մարդու էմոցիոնալ արձագանքն է նրա կամքի իրականացմանը խոչընդոտող, սահմանափակող հանգամանքների դեմ:

րակության ֆրուստրացված վիճակը այդ հասարակությանը հեշտությամբ դարձրեց ազրեսիվ, նպաստեց նացիզմի ծավալմանը և հիտլերականների իշխանության գալուն: Առաջին աշխարհամարտի վերջին շրջանում, երբ Գերմանիան հաղթել էր Ռուսաստանին (պարտադրելով նրան Բրեստ-Լիտովսկի պայմանագիրը), և երբ գերմանական զորքերը տակավին գտնվում էին Ֆրանսիայում, գերմանական հասարակության համար անակնակալ կերպով իրենց պետությունը ենթարկվեց կապիտույացիայի: Այնուհետև դաշնակիցները Գերմանիայի վրա դրեցին բազմամիլիարդանոց ռազմատուգանքի (ռեպարացիա) բեռը, երկիրը սկսեց տնտեսական վայրէջք ապրել, ինչից ազգային (փողի արժեզրկումը) աճում էր օրավոր և հասնում ահուելի չափերի, ծայր էին առնում գործազրկությունը, սովը: Կայսրության փլատակների վրա դեմոկրատական սկզբունքներով ձևավորված Վայմարյան Հանրապետությունը (իշխանության նստավայրը Վայմար քաղաքն էր) պրեզիդենտ Հինդենբուրգի գլխավորությամբ չէր կարողանում հաղթահարել տնտեսության քայլայումը: Այս ամենը պարարտ հող էր նացիզմի վերելքի համար, երբ ստեղծված կացության մեջ մեղքը քարդվում էր հրեաների, բոլշևիկների վրա, միաժամանակ հասարակությունը սնուցվում էր ռևանշիստական տրամադրություններով: Իզորանալ, գրավել ողջ աշխարհը: Իր հայտնի «Մայն կամփ» (իմ պայքարը) աշխատությունում Հիտլերը ներկայացնում էր այն երկրնտրանքը, որ կա՝ մ Գերմանիան պիտի դառնա հզորագույն գերտերություն, կա՝ մ պիտի գոյություն չունենա: Ինչպես հասարակության, այնպես էլ որոշում կայացնողների հոգեբանական նման վիճակի պարագայում էլ մշակվում և իրականացվում էր նացիստական Գերմանիայի արտաքին քաղաքականությունը:

Որոշումների կայացման կենսարանական գործոնները: Մարդու քաղաքական վարքագիծն ուսումնասիրվում է նաև բիոլոգիական տեսությունների կողմից, այդ տեսությունները մարդու կենսաբանական հատկանիշների դիրքերից են մեկնաբանում մարդու

վարքագծի պատճառերը, դրսնորման ձևերը: Մարդու վարքագծի բացահայտման պրոբլեմներից մեկը «բնություն, թե դաստիարակություն» ("nature versus nurture") հակադրությունն է, երբ փորձ է կատարվում մարդու վարքագիծը բացատրել մի կողմից նրա կենսաբանական բնագիների, հակումների, զգացական դրդապատճառների ("nature"), մյուս կողմից նրա սոցիալական հատկանիշների, բանականության, ինտելեկտի ("nurture") հիման վրա: Կենսաբաղաքականությունը (բիոպոլիտիկա) ուսումնասիրում է մարդու կենսաբանական էության և նրա քաղաքական վարքագծի փոխառնչությունները, այսինքն՝ կենտրոնանում է այն բանի վրա, թե մարդու կենսաբանական էության որ հատկանիշներն ինչպես են ազդում նրա քաղաքական վարքագծի դրսնորման վրա: Այսպես օրինակ, Էթոլոգ¹⁶ գիտնականները պետությունների միջև տարածքի համար տեղի ունեցող պատերազմները երբեմն վերագրում են տարածքի համար կովելու կենդանական բնագին: Որոշ լիդերների վարքաբանության ուսումնասիրության արդյունքում էթոլոգները զալիս են եզրակացության, որ լիդերի կողմից իր պետության ներգրավումը հզորության համար պայքարի մեջ ունի իր ենթագիտակցական բացարությունը. արուի ձգտումը՝ հզորանալու, հզոր երևալու, ինչպես նաև գոտեմարտելու, պայմանավորված է էզին հրապուրելու բնագով: Տղամարդիկ, ինչպես և կենդանական աշխարհի մյուս արու ներկայացուցիչները ավելի ազրեսիվ են, պատերազմելու ավելի են հակված, քան կանայք, ինչպես և էզ կենդանիները: Եվ քանի որ շատ քաղաքագետների հետաքրքրել է այն հարցը, թե որքան շատ կանայք լիդերներ դառնան իրենց պետություններում, արդյո՞ք այնքան չեն մեծանա խաղաղության հնարավորությունները, շատերն էլ դրականորեն են պատասխանում այս հարցադրմանը:

¹⁶ Էթոլոգիան ուսումնասիրում է մարդու և կենդանու համեմատական վարքաբանությունը՝ բնագիների նույնության վրա շեշտադրում կատարելով՝ էթոլոգիան ցույց է տալիս նաև մարդու և կենդանու վարքագծերի նույնությունները:

Հանձնարարվող գրականություն

1. Chris Brown with Kirsten Ainley, Understanding International Relations, 3rd edition, Palgrave Macmillan, 2005, pp. 207-31
2. Kenneth Waltz, Man, the State and War: a theoretical analysis, Columbia University Press, NY, 2001, pp. 16-79
3. Betty Glad, Personality, Political and Group Process Variables in Foreign Policy Decision Making: Jimmy Carter's Handling of the Iranian Hostage Crisis, International Political Science Review 10 (1989)
4. Margaret Hermann, Explaining Foreign Policy Behavior Using the Personal Characteristics of Political Leaders, International Studies Quarterly, 24:1 (March 1980) pp.7-46
5. Karen Mingst, Essentials of International Relations, 2nd edition, W.W. Norton&Company, NY-London, 2003, pp. 131-51

ԵՐԵՎԱՆԻ ՊԵՏԱԿԱՆ ՀԱՍՏԱՏՄԱՐԱՆ

ՄԻԶԱՋԳԱՅԻՆ ՀԱՐԱԲԵՐՈՒԹՅՈՒՆՆԵՐԻ ՏԵՍՈՒԹՅՈՒՆՆԵՐ ԵՎ ՎԵՐԼՈՒԾՈՒԹՅԱՆ ՄԱԿԱՐԴԱԿԱՆԵՐ

Համակարգչային ձևավորումը՝ Կ. Չալաբյանի
Կազմի ձևավորումը՝ Ա. Պատվականյանի
Հրատ. խմբագրումը՝ Լ. Հովհաննիսյանի

Չափսը՝ 60x84 1/16: Տպ. մամուլ 6,25:
Տպաքանակը՝ 200 օրինակ:

ԵՊՀ հրատարակչություն

ք. Երևան, 0025, Ալեք Մանուկյան 1



ՀԱՅԱՍՏԱՆԻ
ՆԱԿԱՆ
ԵՐԵՎԱՆ 2014